

## WIA WU-ZOMO-LA JOOŋ SI ŊMUŊSA

### *Wii-la si pi niaa miisinj*

<sup>1</sup> Ka di Wia ne ŋaa dunia, wii-la fa he dime ne, u fa he Wia teenj ne. Ba di Wia kala fa ŋaa kubala ne. <sup>2</sup> Buŋbuŋ kala ne u fa he Wia teenj. <sup>3</sup> U le ne Wia to a ta kuŋ-kala. Kuŋ-kala si he dunia le, u ne ta. <sup>4</sup> Wii-la fa weye ne a keŋ pulumuŋ kaa ku pi niaa. <sup>5</sup> Puluŋ-la chaane birimiŋ tuoŋ, biriŋ-la bi puluŋ-la wuo to.

<sup>6</sup> Ŋii ne Wia tiŋ u tiŋdaara kubala baa yire Jooŋ. <sup>7</sup> U ne ko duu bul puluŋ-la wiaa pi niaa. U ŋaa ŋii di nuu-kala wuo nii a tou le a laa puluŋ-la wiaa dii. <sup>8</sup> Jooŋ fa dee bi puluŋ-la ŋaa, ama u ta ko duu bul puluŋ-la wiaa ne a pi niaa.

<sup>9</sup> Ŋii ne puluŋ-la titia ku tuu dunia duu chaana he nuu-kala le. <sup>10</sup> U fa he dunia-la le Wia si tou le ta ne, ama dunia niaa buu jinj. <sup>11</sup> U ko u titia jaŋ, ama u jaŋ niaa buu laa. <sup>12</sup> Anj ka niaa doŋsuŋ-na laau a laa u wiaa dii. Ŋii ne u piba worŋbiinj di ba wuo ŋaa Wia biirinj. <sup>13</sup> Niaa deenba bi naga baala si jinj u haala ba lul biirinj ŋii ne. Wia titia ne ŋaa ba Nyimma.

<sup>14</sup> Ŋii ne wii-la birime nuhuobiine a ku he la tuoŋ. U fa he la teenj a fifála nennige woruŋ, a keŋ wutitii. La na u si keŋ yiriŋ. Yiriŋ deenj u Nyimma Wia ne joŋo pu, ari u ne ŋaa u Bie kala. <sup>15</sup> Jooŋ bul u wiaa pila. Wialinj u si heele

bul ne ŋla: “Nii-la si jaŋ to mi hariŋ kɔ, u ne kiimi, bɛɛ wiaa u he dime ne, ka ba-na lulmi.”  
<sup>16</sup> Ku-la kala u si kɛɛ, la ma na kpaaliŋ u tuɔŋ ne. U yie fála nennige a pela le bua-na kala le.  
<sup>17</sup> Wia to Moosis le ne a bil u niŋ pila. Ama Yesu Kirisito le ne Wia to a fála nennige a pela le woruŋ, a dagela wutitii. <sup>18</sup> Nuu-kala ha bi Wia naa. U Bii-bala-la si hoŋ u sɛmɛ ne dagela u wiaa.

*JƆƆŋ bula ari u dee bi Kirisito ŋaa*

*Mat. 3.1-12; Maak 1.1-8; Luuk 3.1-18*

<sup>19</sup> Juu tiŋŋaa fa si he Jerusalem le tiŋ nialiŋ si kpu pusuŋ pipi Wia ari nialiŋ ba síi yire Liivai timma, ba kɔ JƆƆŋ teenŋ a piɛsu a bul, “Kubɛɛ ne ŋ ŋaa?” <sup>20</sup> Ŋii ne JƆƆŋ bi wiaa nyia aŋ chaasa bul ari u dee Kirisito, nii-la Wia si liisa. <sup>21</sup> Ŋii ne ba bira piɛsu a bul, “Kubɛɛ ne saa ŋ ŋaa? Ŋ ne ŋaa Ilaaja?” U bul duu dee. Ŋii ne ba bira piɛsu, “Ŋ ne ŋaa nii-la síi bul wiaa, Wia Diŋ-zɔŋ-la doluŋ le la síi gberu?” U bira si duu dee. <sup>22</sup> Ŋii ne ba bira piɛsu, “Kubɛɛ ne saa ŋ ŋaa? U maga di ŋ dagela, di la mu bula pi nialiŋ si tiŋla. Wu-bɛɛ ne ŋ bul a tige ŋ titia le?” <sup>23</sup> Ŋii ne JƆƆŋ bul, “Mi ne ŋaa yiikori-la si he giri-bine tuɔŋ aa bul, ‘Má wase wonbiŋ bil di la Tiina kɔ.’ Ŋla ne Azaaya fa bul di ma ŋaa.” Azaaya fa ŋaa nii-la síi bul wiaa, Wia Diŋ-zɔŋ-la doluŋ le ne.

<sup>24</sup> Nialiŋ fa si ku piɛɛ JƆƆŋ wiaa deɛŋba, Farisii tiŋŋaa ne fa tiŋba. <sup>25</sup> Ŋii ne ba bira piɛɛ JƆƆŋ a bul, “Ŋ dee bi Kirisito ŋaa, nii-la Wia si liisa, ŋ dee bi Ilaaja ma ŋaa, ŋ bira bi nii-la síi bul wiaa, Wia Diŋ-zɔŋ-la doluŋ le ma ŋaa. Bɛɛ

ne saa tii ŋ fufo niaa Wii-chuoŋe liiŋ?” <sup>26</sup> Ŋii ne JƆƆŋ bul, “Mi sii fo niaa Wii-chuoŋe liiŋ, liiŋ dunɔɔŋa ne mi kaa fufoba, ama nuu dɔŋ ne he ma tuɔŋ ŋii, ka ma buu jiiŋ. <sup>27</sup> U ne to mi hariŋ kɔ. Mi paala bi maga di mi keŋ u neŋteŋŋee ŋmeniŋ ma kaa puri.” <sup>28</sup> Ba sii bul wiaa deenba kala ŋii, Betani le ne ba he, JƆƆɔŋ fuo-la seme dɔŋɔ. Lee-la ne JƆƆŋ faa fo niaa Wii-chuoŋe liiŋ.

### *JƆƆŋ bul Wia piesi-la wiaa*

<sup>29</sup> U taŋ si pula, JƆƆŋ na Yesu duu kɔ. U si nau, u bul, “Bee na, Wia Pie-bie-la ne ŋii. U ne laa dunia haache ta. <sup>30</sup> Baala deen wiaa ne mi faa bul ŋii, mi si bula ari nuu ne jaŋ kɔ mi hariŋ. U ne kiimi, u he dime ne, ka ba-na lulmi. <sup>31</sup> Mi fa bi jiiŋ nii-la kala u si ŋaa. Ama mi ta ku fufo niaa Wii-chuoŋe liiŋ ne, di Iziral tiŋŋaa ku jimu.” <sup>32</sup> Wialiiŋ JƆƆŋ si bula pi niaa a tigeu le ne ŋla: U si, “Mi na Wia Diŋ-zɔŋ-la duu lii wia nyuŋ a nage kokomo, a ku tuu togiliu le. <sup>33</sup> Mi ma titia fa buu jiiŋ. Ama Wia si tiŋmi di mi fo niaa Wii-chuoŋe liiŋ, u ne bula pimi a bul, ‘Ŋ jaŋ na Wia Diŋ-zɔŋ-la duu ku tuu a he nuu le, tiina ne jaŋ jɔŋ Wia Diŋ-zɔŋ-la a he niaa le!’ ” <sup>34</sup> Ŋii ne JƆƆŋ bira bul, “Mi sene nau a bulaa pima ari u ne ŋaa Wia Bie.”

### *Nialiiŋ si laa sipaŋ ku to Yesu hariŋ*

<sup>35</sup> U taŋ si pula, JƆƆŋ ari u haritooro balia bira chiiŋ lee-la a na Yesu. <sup>36</sup> JƆƆŋ si nau duu bal, ŋii ne u bul, “Bee na, Wia Pie-bie-la ne ŋla.” <sup>37</sup> U haritooro-la balia nii u si bul wiŋŋ deen a to Yesu hariŋ. <sup>38</sup> Yesu miira daase, di baa to u hariŋ. U pieseba a bul, “Bee kuŋ

ne maa che?" Ɔii ne ba ma piesu a bul, "La kuhian, nii le ne Ɔ jujuu?" <sup>39</sup> Ɔii ne Yesu bula piba a bul, "Má kɔ na mi síi juu lee-la." Ɔii ne ba to u hariƆ mu a na lee-la u síi juu. Bua-la le Ɔaa didaanƆ ne. Ɔii ne ba he u teen wii-kaanƆ tiire juu. <sup>40</sup> NialƆ balia fa si nii wii-la JƆƆŋ si bula a to Yesu hariƆ, dɔƆɔ yiriƆ ne AƆduru. U fa Ɔaa SaamƆŋ Piita Ɔaana ne. <sup>41</sup> Ɔii ne AƆduru ma che u malima SaamƆŋ leriƆ, a bula pu a bul, "La na Kirisito, nii-la Wia si liisa." <sup>42</sup> U keƆ SaamƆŋ kaa kɔ Yesu teen. Ɔii ne Yesu benu aƆ bula pu a bul, "Ɔ ne JƆƆŋ bie SaamƆŋ. Ba jaƆ kenƆ kaa yire Kiifas." Kiifas ari Piita fa Ɔaa yiri-bala ne. U bubuƆŋ ne buƆ.

### *Yesu yire Filip ari Nataniel*

<sup>43</sup> U taƆ si pula Yesu sii duu mu Galilii tiƆteen. Ɔii ne u na Filip a bula pu a bul, "To mi hariƆ." Ɔii ne Filip to u hariƆ. <sup>44</sup> Filip fa lii Betisaada ne, taƆ-la AƆduru ari Piita ma si lia. <sup>45</sup> Ɔii ne Filip na Nataniel a bula pu, "La na nii-la, u wiaa ne Moosis fa ƆmuƆsa bil di niaa tuto Ɔii. NialƆ síi bul wiaa, Wia DiƆ-zɔƆ-la doluƆ le ma fa bul u wiaa ne, ba ƆmuƆsa bil. Ba fa ƆmuƆsa ari u ne Josef bie Yesu a lii Nazaret." <sup>46</sup> Ɔii ne Nataniel piesu a bul, "Ɔ ha na ku-zɔƆ duu lii taƆ-la ba síi yire Nazaret?" Ɔii ne Filip bula pu a bul, "Ku nau." <sup>47</sup> Yesu si na Nataniel duu kɔ u teen, u bubul u wiaa a bul, "Nia deƆ Ɔaa Iziral tiina titii ne. U keƆ wutitii." <sup>48</sup> Ɔii ne Nataniel piesu a bul, "Ɔe ne Ɔ Ɔaa jƆŋmi?" Ɔii ne Yesu bula pu a bul, "Mi naƆ ne Ɔ si hoƆ tutogo bubuƆŋ, ka Filip-na yiriƆ."

49 Ŋii ne Nataniel bula pu a bul, “Kuhian, ŋ ne ŋaa Wia Bie. Ŋ ne ŋaa Iziral tinŋaa kuoro maa.” 50 Ŋii ne Yesu piesu, “Mi si bula bul di mi naŋ di ŋ hoŋ tutogo bubuoŋ ne tii, ŋ laa mi wiaa dii koo? Ŋ jaŋ na wu-kpuŋkperisiŋ a kii ŋla.” 51 Ŋii ne Yesu bula pu a bul, “Wutitii ne mi bulaa piŋ, ma jaŋ na wia nyuŋ duu suro, di Wia tinŋdaaraa lii dime a ku tuu mi-na Nuhuobiine Bie teen, aŋ miira jijil.”

## 2

### *Ba gbieli ha-jaari gbiele*

1 Tapulaa balia si bala, baa che di ba gbieli ha-jaari gbiele taŋ kubala le baa yire Keena. Keena he Galilii tinŋteen le ne. Yesu naaŋ ma fa he dime. 2 Ba fa yire Yesu ari u haritooro maa ha-jaari gbiele-la lerin. 3 Ba sii gbieli gbiele-la ŋii, ba nyunyua sinin. Ba si nyua sinin kala dere, Yesu naaŋ bula pu di sin-la dere ne. 4 Ŋii ne Yesu bula pu a bul, “U bi maga di ŋ dagemi ŋii mi si jaŋ ŋaa. Bua-la le mi si jaŋ tin tinŋinŋaa ha bi yie.” 5 Yesu naaŋ saa bula pi dia-la tinŋinnaa a bul, “Má ŋaa wii-la kala u si bula pima.” 6 Juu tinŋaa fa keŋ ba Wii-chuoŋe woŋbiin ne aa soŋ liin. Ŋii wiaa pupoi-balaa balidu ma fa he dime ari liin. Kuŋ-kala tuoŋ liin yi galaŋ mara a kaa mu galaŋ mara ari fi. 7 Ŋii ne Yesu bula pi dia-la tinŋinnaa a bul, “Má ŋaa liin a su pupoye-la.” Ba ŋaa liin su pupoye-la pilim pilim. 8 Ŋii ne Yesu bira bula piba di ba ŋaa lii-la pupoi-la tuoŋ a kaa mu pi nii-la sii beŋ gbiele-la. Ba ŋaa mu pu. 9 U laa lii-la nyua

a na lii-la, duu birime siniŋ. U bi jinŋ lee-la ba si na siŋ-la. Ama dia-la tiŋtinnaa-na jinŋ. Ŋii ne u yire haal-la tiina <sup>10</sup> a bula pu a bul, “Gbiele-na kala, lee-na kala ba yie laa sipaanŋ ne a keŋ si-zomuŋ a lii ba nyua. Nuu-kala si nyua voge, ŋ saa-na keŋ siŋ-la si bi siŋ a kaa to hariŋ ko. Ka ŋ-na joŋ si-zomuŋ bil hariŋ u ku yi bua deen kala le.”

<sup>11</sup> Yesu si ŋaa liiŋ birime siniŋ Keena le Galilii tiŋteenŋ ne ŋaa u wu-magil-bunbuŋ u si ŋaa. Dime ne u dage ŋii Wia doluŋ si heu le. U haritooro si na ŋii, ba laa u wiaa dii.

<sup>12</sup> A lii gbiele-la hariŋ Yesu ari u naanŋ ari u ŋaanaa ari u haritooro sii mu Kapenam tiŋteenŋ a he dime tapulaa baŋmene.

### *Yesu juu Wia-dia*

*Mat. 21.12-13; Maak 11.15-17; Luuk 19.45-46*

<sup>13</sup> U ka mua, ka di Juu tiŋŋaa diisiŋ kieliŋ gbiele-la yi. Ŋii ne Yesu sii mu Jerusalem a juu Wia-dia. <sup>14</sup> U si juu dime, u na niaa di baa yalle nesinŋ, piesee ari kokosuŋ. Nialiŋ si yere moribiee ma hoŋ ba teebulba nyuŋ. <sup>15</sup> Ŋii ne Yesu keŋ ŋmeniŋ a birime chiba a kiri nialiŋ ari ba piesee ari ba nesinŋ kala ta ba lii Wia-dia-la le, aŋ keŋ moribii-yiyerile-la ma teebulba-la kaa birima chu, aŋ keŋ ba moribii-biiŋ ma jaase tiŋteenŋ. <sup>16</sup> Ŋii ne ka u bula pi nialiŋ ma si yalle kokosuŋ a bul, “Má kaa lii dia-la tuoŋ. Ma si mi Nyimma dia kaa birime yobo.” <sup>17</sup> U haritooro liisi wii-la ba si ŋmuŋse Wia teniŋ tuoŋ a bul, “Wia-dia wiaa ka diimi ne woruŋ a nage nyiniŋ.” <sup>18</sup> Ŋii ne Juu tiŋŋaa miira ko u

teenj a piesu, “Bee kuŋ wu-magil ne η jaŋ wuo joŋo dagela ari η keŋ doluŋ di η wuo ŋaa wiin deenj?” <sup>19</sup> Ŋii ne Yesu bula piba a bul, “Má ŋmoo Wia-dia deenj lo, mi jaŋ wuo joŋ tapulaa batori a bira saau.” <sup>20</sup> Ŋii ne ba bula pu a bul, “Jisiŋ mahiŋ balia ari balidu ne ba joŋo saa Wia-dia deenj, ka η-na bul di η jaŋ keŋ tapulaa batori saau koo?” <sup>21</sup> Ama Yesu si bul Wia-dia-la wiaa ŋii, u titia yaraa wiaa ne u bubul ŋii. <sup>22</sup> Bua-la le u si sii suuŋ le ne u haritooroŋ liisi a yi wii-la u fa si bula le. Ŋii ne ba laa wialin ba fa si ŋmuŋsa Wia tenin tuonj dii, a laa wialin ma Yesu si bula dii.

<sup>23</sup> Yesu fa si he Jerusalem le, diisiŋ kielin gbiele-la le, niaa yuga a laa u wiaa dii a tin ba si na wu-magila-la u sii ŋaa le. <sup>24</sup> Ama Yesu bi u titia kaa pulle ba teenj, bee wiaa u jin nuhuobiinee kala ne woruŋ. <sup>25</sup> U fa bi maga di nuu-kala bira bul nuhuobiinee wiaa pu, bee wiaa u fa jin nuhuobiinee tuonj wu-kenin kala ne.

### 3

#### *Nikodiimas cheŋ Yesu*

<sup>1</sup> Baal kubala ne fa he dime. Baa yire Nikodiimas. U fa ŋaa Juu tinŋaa kuhian ne a he Farisii tinŋaa paati tuonj. <sup>2</sup> Titanj kubala u sii ko Yesu teenj a bul, “Kuhian, la jima ari η ne ŋaa nii-la Wia si ta di η dage niaa. Nuukala bi jaŋ wuo ŋaa wu-magila-la η sii ŋaa, see di Wia pe tiina le.” <sup>3</sup> Ŋii ne Yesu bula pu a bul, “Wutitii ne mi bulaa pinj, nuu-kala bi jaŋ wuo juu Wia kuorii-la tuonj, see di ba wasa lul

tiina.” <sup>4</sup> Ŋii ne Nikodiimas piesu a bul, “ƐƐ ne ba-nihian jaŋ wuo ŋaa di ba bira wasa lulu? U jaŋ bira wuo juu u naaŋ luoruŋ di u bira wasa lulu koo?” <sup>5</sup> Ŋii ne Yesu bul, “Wutitii ne mi bulaa piŋ, nuu-kala bi jaŋ wuo juu Wia kuorii-la tuɔŋ, see di Wia joŋ u Diŋ-zɔŋ-la he tiina le, di tiina ma pe fo Wii-chuo le liiŋ. <sup>6</sup> Nuhuobiine yie lul nuhuobiine u keŋ miisiŋ ne tiŋteen deen le. Aŋ ka Wia ma yie joŋ u Diŋ-zɔŋ-la a heu le duu keŋ miisiŋ Wia teen. Nuhuobiine bi Wia Diŋ-zɔŋ-la jaŋ wuo joŋo he nuu le. <sup>7</sup> Sí leŋe duu ŋaa wu-kpuŋkpere ŋ le mi si bula piŋ ari u maga di ba wasa luluŋ. <sup>8</sup> Peliŋ yie lu lee-na kala u si cho ne. Ŋ ninii u dɔmɔ, ama ŋ bi jiŋ lee-la u si lii kɔ, koo ŋ bira bi jiŋ lee-la u sí mu. U saa nage ŋii ne nuu-kala le Wia si joŋ u Diŋ-zɔŋ-la heu le.” <sup>9</sup> Ŋii ne Nikodiimas piese, “ƐƐ ne wiŋ deen jaŋ wuo ŋaa?” <sup>10</sup> Ŋii ne Yesu bula pu a bul, “Ŋ ŋaa kerichi-bal ne Iziral tiŋteen le, aŋ ka beƐ ne tii ŋ bi wiŋ deen bubuɔŋ jiŋ? <sup>11</sup> Wutitii ne mi bulaa piŋ, la yie bul wii-la la si jima ne, a ŋaa siada ari wii-la la si na. Ama ma kuŋ-kala bi che di ma sei wii-la la si bula. <sup>12</sup> Mi bul dunia wiaa ne pipiŋ, ka ŋ bi laa dii. ƐƐ ne saa ŋ jaŋ wuo laa dii di mi ne bul Wia-jaŋ wiaa piŋ? <sup>13</sup> Nuu-kala ha bi Wia-jaŋ jila, see mi-na Nuhuobiine Bie si lii dime ku tuu. <sup>14</sup> Moosis fa si he giri-bine tuɔŋ, u fa keŋ hoɔŋ a libi dimiŋ, a joŋo mere daaŋ le a kaa jee. Ŋii titia ne ba jaŋ kpaase mi-na Nuhuobiine Bie ma daaŋ le a kaa jee, <sup>15</sup> di nuu-kala si laa mi wiaa dii, u jaŋ wuo keŋ miisi-la si bi dere.

<sup>16</sup> Wia cho dunia niaa a mu kieli, ŋii ne tii



u joŋ u Bii-bala a pila, di nii-la kala si laa u wiaa dii, u bi jaŋ lel, ama u jaŋ keŋ miisi-la si bi dere. <sup>17</sup> Wia bi u Bie ta duu ku tuu laa dunia niaa wiaa jin, ama duu laa dunia niaa ta. <sup>18</sup> Nuu-na kala si laa Yesu wiaa dii, u bi jaŋ dii u tiina sariya a joŋ cheeriŋ pu, ama nii-la kala si bi u wiaa laa dii, u paala dii u tiina sariya a joŋ cheeriŋ pu, beɛ wiaa u bi Wia Bii-bala-la wiaa laa dii. <sup>19</sup> Wii-la si tii Wia dii dunia niaa sariya a joŋ cheeriŋ piba ne ŋla: Pulumuŋ ku tuu dunia ne, ama niaa cho birimiŋ ne a kii puluŋ-la, beɛ wiaa baa ŋaa wu-boŋŋoo ne. <sup>20</sup> Nuu-na kala sii ŋaa wu-boŋŋoo bi pulumuŋ cho, u bi pulumuŋ tuoŋ lii, beɛ wiaa u bi che di u wu-boŋŋo-la lii pulumuŋ. <sup>21</sup> Ama nuu-na kala sii ŋaa wu-zoŋŋoo cho pulumuŋ a yie lili pulumuŋ tuoŋ, di niaa wuo na ari uu ŋaa wu-zoŋŋo-la Wia doluŋ le ne.”

### *Jooŋ cheŋ Yesu*

<sup>22</sup> Ŋii hariŋ ne Yesu ari u haritooroo lii Jerusalem a mu Judiya tinteen, a dieni mua dime aa fo niaa Wii-chuoŋe liiŋ. <sup>23</sup> Jooŋ ma fa he lee kubala baa yire Aanŋ le a kpage Seelim aa fo niaa Wii-chuoŋe liiŋ, beɛ wiaa liiŋ fa yuga kiŋkeŋ dime. Niaa faa mu u teen u fufoba Wii-chuoŋe liiŋ. <sup>24</sup> (Bua-la le di ba ha bi Jooŋ kaa to dia.)

<sup>25</sup> Ŋii ne Jooŋ haritooroo doŋsuŋ ari Juu tiina kubala keŋ liiŋ somuŋ wiaa a kaa lilere. <sup>26</sup> Ba mu Jooŋ teen a piesu a bul, “La kuhian, ŋ liisi baal-la fa si he Jooŋaŋ fuo-la seme doŋo wiaa ne, nii-la ŋ si bul u wiaa? Leele u maa fo niaa Wii-chuoŋe liiŋ ne, niaa kala mumu u teen.”

27 Ŋii ne Jooŋ bul, “Nuu-kala bi jaŋ wuo keŋ kuŋ-kala, see di Wia joŋo pu. 28 Ma titia ŋaa mi danŋia, ka mi bul ari mi dee bi Kirisito-la ŋaa, nii-la Wia si liisa, ama Wia ta tiŋmi ne di mi laa u sipaŋ. 29 Ha-faliŋ tiina ne tii haala, ama di ha-faliŋ tiina nanɔɔŋɔ ne chiŋ dime a jijegili wialiŋ ba sii bul, u tuoŋ yie tore ne duu ne nii ha-faliŋ tiina-la yiikoro. Ŋii titia ne mi tuoŋ ma tore woruŋ Yesu nyuŋ. 30 U maga duu ne miira ku ŋaa ni-baliŋ mi teeŋ, ka di mi miira ŋaa ni-bie.”

### *Nii-la si lii Wia-jaŋ*

31 Nii-la si lii Wia-jaŋ ne kii kuŋ-kala. Nii-la si lii tiŋteenŋ ŋaa tiŋteenŋ kuŋ ne aa bul tiŋteenŋ wiaa. Ama nii-la si lii Wia-jaŋ ne kii kuŋ-kala. 32 Uu bul wialiŋ u si na aŋ nii ma ne, ama nuu-kala bi u niŋ wiaa seye. 33 Nii-la kala si sei u niŋ wialiŋ jima ari Wia he dime ne a keŋ wutitii. 34 Mi-na nii-la Wia si tima, mii bul Wia niŋ wiaa ne, bee wiaa Wia joŋ u Diŋ-zoŋ-la doluŋ kala a pimi ne. 35 Mi Nyimma Wia cho mi-na u Bie, a joŋ u doluŋ kala a he mi nisiŋ le. 36 Nii-la kala si laa mi-na Wia Bie wiaa dii, u jaŋ keŋ miisi-la si bi dere; ama nii-la kala si bi mi-na Wia Bie wialiŋ ka to, u bi jaŋ ko duu keŋ miisi-la si bi dere, ama Wia jaŋ na baaniŋ u tiina nyuŋ a kaa mu wuu.

## 4

### *Yesu bul wiaa a pi Samaria tiŋŋaa haala*

1 Ŋii ne Farisii tiŋŋaa nii ari Yesu na niaa yuge a kii Jooŋ, baa tou u foba Wii-chuoŋe liiŋ.

2 (Ama Yesu titia bi nuu-kala Wii-chuoŋe liiŋ fo, u haritooroo duŋduŋa nɛ.) 3 Yesu si nia di baa bul ŋii, u sii lii Judiya tiŋteenŋ ɛ a miiraa mu Galilii tiŋteenŋ. 4 U sii mu Galilii ŋii, u to Samaria tiŋteenŋ 5 a ku yi taŋ kubala Samaria tiŋteenŋ ɛ baa yire Sika. Tiŋtee-la Jekob fa si joŋo pi u bie Josef fa kpage dime nɛ. 6 Jekob fa si lu vil-la he dime. Yesu fa si veŋ woŋbiŋ ŋii a lol, u mu hoŋ vil-la semɛ.

7 Di wia jil nyu-gbaŋa, ŋii nɛ Samaria tiŋŋaa haal kubala ko vil-la duu ŋaa liiŋ. Ŋii nɛ Yesu bula pu a bul, “Ŋaa liiŋ pimi di mi nyua.” 8 Bua-la ɛ di u haritooroo-na mu taŋ-la tuoŋ di ba yoo kudiilee. 9 Ŋii nɛ Samaria tiŋŋaa haal-la piɛɛ Yesu a bul, “Bɛɛ nɛ tii ŋ-na Juu tiina chiche di mi-na Samaria tiina ŋaa liiŋ piŋ di ŋ nyua?” Juu tiŋŋaa ari Samaria tiŋŋaa bi wii pɛ. Ŋii nɛ tii haal-la bul ŋii. 10 Ŋii nɛ Yesu bula pu a bul, “Di ŋ nɛ fa jiŋ ku-la Wia si joŋo pi niaa, a fa jiŋ nii-la si suluŋ di ŋ ŋaa liiŋ pu duu nyua, ŋ fa jaŋ sulu duu piŋ lii-la si keŋ miisiŋ.” 11 Ŋii nɛ haal-la piɛsu a bul, “Kuhiaŋ, ŋ bi guga keɛ di ŋ kaa ŋaa liiŋ, ka vil-la ma luŋ. Nii ɛ nɛ saa ŋ jaŋ na lii-la si keŋ miisiŋ? 12 La naabalima Jekob nɛ joŋ viliŋ deenŋ pila. Ba di u biiriŋ ari u pusuŋ kala nyua viliŋ deenŋ liiŋ nɛ. Ŋ jaŋ bul di ŋ kii Jekob nɛ?” 13 Ŋii nɛ Yesu bula pu a bul, “Nuu-kala si nyua liiŋ deenŋ, lii-nyuasuŋ jaŋ bira keŋ tiina. 14 Ama nii-la kala si jaŋ nyua lii-la mi si jaŋ pu, lii-nyuasuŋ bira bi jaŋ kenu da. Lii-la mi si jaŋ pu jaŋ birime lii-bulo u tuoŋ ɛ a bubul, a pu miisiŋ si bi dɛɛ.” 15 Ŋii nɛ haal-la bula pu a bul, “Mi Tiina, pimi liiŋ deenŋ, di lii-nyuasuŋ

bira sími kenɛ, di mi bira sí kɔ di mi ɲaa liiɲ daha.”

<sup>16</sup> Ɔii nɛ Yesu bula pu a bul, “Mu yirɛ ɲ bala aɲ miira kɔ daha.” <sup>17</sup> Haal-la si duu bi bala kenɛ. Ɔii nɛ Yesu bira bul, “Ɔ kiaa sima ɲ si jaɲ bul di ɲ bi bala kenɛ, <sup>18</sup> bɛɛ wiaa ɲ fa jaa baalaa banɔɲ nɛ, ama ma di baal-la si hɛ dime lɛɛɛ sɛnɛ bi ɲ bal-titii ɲaa. Ɔ bul wutitii nɛ pimi.” <sup>19</sup> Ɔii nɛ haal-la bula pi Yesu a bul, “Mi Tiina, u naga ɲ ɲaa nii-la síi bul wiaa, Wia Diɲ-zɔɲ-la doluɲ lɛ nɛ.” <sup>20</sup> Haal-la bira bula pu a bul, “La-na Samaria tiɲɲaa naabalimaba, baa chuɔɛ Wia peeliɲ deɛɲ nyuɲ nɛ, aɲ ka ma Juu tiɲɲaa si, di Jerusalem nɛ lee-la la si maga di laa chuɔɛ Wia.” <sup>21</sup> Ɔii nɛ Yesu bula pu a bul, “Bua kubala jaɲ yi, niaa si bi jaɲ chuɔɛ la Nyimma Wia peeliɲ deɛɲ nyuɲ koo Jerusalem lɛ. Laa wiɲɲ deɛɲ dii. <sup>22</sup> Ma-na Samaria tiɲɲaa sɛnɛ bi jiɲ nii-la ma síi chuɔlu. La-na Juu tiɲɲaa jiɲ Nii-la la síi chuɔlu nɛ. Nii-la lɛ Wia si jaɲ to a laa dunia niaa ta, u lii Juu tiɲɲaa tuɔɲ nɛ. <sup>23</sup> Bua kubala jaɲ yi, u paala yi nɛ, nialiɲ si jaɲ sɛnɛ chuɔɛ Wia, ba jaɲ chuɔɛ la Nyimma Wia ari wutitii, Wia Diɲ-zɔɲ-la doluɲ lɛ. Ɔii nɛ Wia chɛ di niaa chuchuɔlu. <sup>24</sup> Wia ɲaa ni-dima nɛ, nialiɲ síi chɛ di ba chuɔlu, u maga di ba chuɔlu ari wutitii, u Diɲ-zɔɲ-la doluɲ lɛ.” <sup>25</sup> Ɔii nɛ haal-la bula pu di u jima ari nii-la ba síi yirɛ Kirisito, nii-la Wia si liisa, u jaɲ kɔ. Di u nɛ kɔ, u jaɲ dageba wii-na kala. <sup>26</sup> Yesu miira bula pu a bul, “Mi nɛ ɲii, mi níi bul wiaa ɲ teenɲ ɲii.”

<sup>27</sup> Bua-la di Yesu haritooroo miira kɔ. U kperiba ba si ku nau, duu bul wiaa haal-la teenɲ.

Ama ba kuŋ-kala bi niinŋ suro a piesu a bul, “Bee ne ŋŋ che u teenŋ?” Koo ba bira bi piesa bul, “Bee ne tii ŋ bubul wiaa haal-la teenŋ?”

<sup>28</sup> Ŋii ne haal-la leŋ u pupoinŋ dime, aŋ miira mu jaŋ tuonŋ, a yire niaa a bula piba, <sup>29</sup> “Má ko na baal kubala si wuo dage wialinŋ kala mi si ŋaa. Nia deenŋ ne saa ŋaa Kirisito, nii-la Wia si liisaa, koo?” <sup>30</sup> Niaa si nii wiinŋ deenŋ, ba lii mu Yesu teenŋ. <sup>31</sup> Bua-la le di Yesu haritooroo ka sulu a bul, “La kuhianŋ, laa kiaa dii.” <sup>32</sup> Ŋii ne Yesu bula piba a bul, “Mi keŋ kudiilee ne mi dii, ama ma bi kialinŋ wiaa jinŋ.” <sup>33</sup> Ŋii ne Yesu haritooro-la miira chinaa piесе doŋo a bul, “Nuu ne saa keŋ kudiilee ku pu koo?” <sup>34</sup> Yesu bula piba a bul, “Mi kudiilee ne di mi sei nii-la si tinŋmi niinŋ, a tinŋ tinŋtimii-la u si pimi dere. <sup>35</sup> Ma si u ha ka cheŋsinŋ banese ne, ka di ma wase бага kiaa he doŋo le. Mi jaŋ bula pima, má bee na, kiaa ne bia a gollima ŋii di ma wasa he doŋo le. Ba ne nialinŋ si ŋaa siri di ba laa mi wiaa dii. <sup>36</sup> Nialinŋ kala si wase kialinŋ he doŋo le, ba jaŋ laa ba time. Kialinŋ ma ma si wasa he doŋo le, ba ma ne ŋaa nialinŋ si laa mi wiaa dii. Ba ne jaŋ keŋ miisi-la si bi dere. Ŋii wiaa nialinŋ si keŋe nialinŋ si laa mi wiaa dii ari nialinŋ sii bul Wia wiaa pipi niaa, ba kala tuonŋ jaŋ tɔre. <sup>37</sup> Wii-la sene ŋaa wutitii ne. Nuu doŋ ne bul Wia wiaa, nuu doŋ ma keŋe nialinŋ si laa mi wiaa dii he doŋo le. <sup>38</sup> Mi tinŋma ne di ma mu keŋe nialinŋ si laa mi wiaa dii. Ma si ŋaa ŋii, ma nage nialinŋ si mu wase бага kiaa ne he doŋo le, бага-la le ba si bi tima. Niaa doŋsunŋ ne tinŋ бага-la le, ka ba pe nii бага-la sima ŋii.”

<sup>39</sup> Ŋii ne niaa yuga Samaria tiŋteenŋ le a laa Yesu wiaa dii. Haal-la si bul wialinŋ Yesu si bula a tigeu le ne tii ba laa Yesu wiaa dii ŋii. <sup>40</sup> Samaria nialinŋ si ko Yesu teenŋ, ba sulu duu chua ba teenŋ. Yesu sei a chua dime tapulaa balia. <sup>41</sup> Niaa bira yuga a laa u wiaa dii a tiŋ wialinŋ u si dageba wiaa. <sup>42</sup> Ŋii ne nialinŋ bula pi haal-la a bul, “Lɛɛle la laa u wiaa dii a tiŋ la titia si nii u niinŋ wiaa ŋii ne, u bi naga wii-la ŋ si bula pila ne tii. La titia wuo jinŋ ari u ne sene ŋaa dunia Laataara.”

*Yesu vaare kerichi-bal kubala bie*

<sup>43</sup> Yesu si chua dime tapulaa balia-la, u sii a bira mu Galilii tiŋteenŋ. <sup>44</sup> Yesu titia fa bula pi niaa ari nii-la sii bul wiaa, Wia Diŋ-zoŋ-la doluŋ le, ba buu jirima ka pa u titia jaŋ le. <sup>45</sup> U si mu Galilii tiŋteenŋ ŋii, ba kenu woruŋ a tiŋ wialinŋ kala u si ŋaa ba-na Juu tinŋaa gbiele-la le Jerusalem le. Ba ma fa he dime.

<sup>46</sup> Yesu bira miira mu lee-la ba sii yire Keena a he Galilii tiŋteenŋ le, lee-la u fa si keŋ liinŋ birime siniŋ. Di kerichi-bal kubala fa he taŋ kubala le baa yire Kapenam le. U bie fa wiwiile. <sup>47</sup> U si nia di Yesu lii Judiya tiŋteenŋ a ko Galilii tiŋteenŋ, u mu Yesu teenŋ a sulu duu ku vaare u bie pu, di u kpage suuŋ ne. <sup>48</sup> Ŋii ne Yesu bula pu, “See di ma na wu-magilaa ari wu-kpuŋkperisinŋ, ma bi jaŋ ŋaa yarida.” <sup>49</sup> Ŋii ne kerichi-la bula pu, “Mi kuhianŋ, ko lagi di mi bie sí suu.” <sup>50</sup> Ŋii ne Yesu bula pu, “Mu dia, ŋ bie duoro ne.” Baal-la laa wii-la Yesu si bula pu dii a joŋ u wonbiinŋ aa veŋ. <sup>51</sup> Uu mu ŋii, u tiŋtinna ku chemu a bula pu ari bile duoro

ne. <sup>52</sup> U piese duu na bua-la le u si duoro. Ba bula pu ari diamij wiiheye, kerifi kubala le ne waari-la leŋu. <sup>53</sup> Ŋii ne bile nyimma jii ari bua-la le ne Yesu bula pu ari u bie keŋ miisin ne. Ŋii ne ba di u dia niaa kala laa u wiaa dii. <sup>54</sup> Wu-liamij ne jii Yesu si ŋaa, u si bira lii Judiya ko Galilii tinteen.

## 5

### *Yesu vaare baal kubala fuoŋ le*

<sup>1</sup> Ŋii hariŋ le ne Juu tinŋaa gbiele kubala bira yi Jerusalem le. Ŋii ne Yesu sii mu lee-la.

<sup>2</sup> Jerusalem le, fuo kubala ne fa he dime. U fa kpage boiŋniiri-la doŋo ba fa si to juuu taŋ-la tuoŋ ne. U yiriŋ ne fa piese boiŋniin. Hiiburu yiikoro le ba keŋ fuo-la kaa yire Betizata. Ba he palaa banŋ ne a kere fuo-la. <sup>3</sup> Nyanyal tinŋaa fa yuga a he pala-la tuoŋ. Doŋsuŋ nyulime, doŋsuŋ fa ŋaa naa-suunuŋ ari na-suunuŋ tinŋaa. Doŋsuŋ ma gberike. [Ba fa hoŋo gberɛ fuo-la di lii-la fa vuugi.] <sup>4</sup> Bua doŋo Wia tinɗaaru ne fa yie ku tuu fuo-la a keŋ lii-la kaa vuugi. Di Wia tinɗaari-la ne keŋ lii-la vuugi, nyanyal tiina-la si laa sipaan tuu lii-la, u nyanyaliŋ cho duu nage jii ma kala, u yie duori ne. <sup>5</sup> Baal kubala ma ne fa he nyanyal timma-la tuoŋ. U fa wiila ne a yi jisiiŋ mara ari fii ari chori. <sup>6</sup> Yesu si na baal-la duu piŋ dime, u jii ari baal-la wiila dieni ne. Ŋii ne u piesu a bul, “Ŋŋ che di ŋ duori nee?” <sup>7</sup> Ŋii ne baal-la bul, “Mi kuhiaŋ, mi bi nuu kene daha u si jaŋ wuo joŋmi kaa tuu he fuo-la le di ba ne keŋ lii-la vuugi. Ba yie keŋ lii-la vuugi, mii nerike di

mi tuu, di nuu laa sipaŋ tuumi ɛ.” <sup>8</sup> Ŋii nɛ Yesu bula pi baal-la a bul, “Sii a chuoli ŋ bɔsɔ a viiri.” <sup>9</sup> Baal-la guu duori a sii chuoli u bɔsɔ a chuŋaa viiri. Tapuluŋ deɛŋ ŋaa chɛ-wiesii-la chɛɛŋ nɛ.

<sup>10</sup> Ŋii nɛ Juu tiŋŋaa bula pi baal-la Yesu si vaara a bul, “Jiniŋ ŋaa chɛ-wiesii-la chɛɛŋ nɛ. Uu kise nɛ di ŋ chuŋ bɔsɔ tapuluŋ deɛŋ chɛɛŋ.”

<sup>11</sup> Ŋii nɛ baal-la ma bul, “Nii-la si vaaremi nɛ bula pimi di mi chuoli mi bɔsɔ a viiri.” <sup>12</sup> Ŋii nɛ ba piɛsu, “Kubɛɛ nɛ baal-la si bula piŋ di ŋ chuoli ŋ bɔsɔ a viiri?” <sup>13</sup> Ama baal-la bi nii-la si vaaru jiŋ. Bua-la ɛ di niaa si yuga ŋii, Yesu ɛɛl. <sup>14</sup> U ŋii hariŋ nɛ Yesu na baal-la Wia-dia ɛ a bula pu, “Na, ɛɛɛɛ ŋ duoro nɛ, bira sí haache ŋaa. Di ŋii dee, wiŋŋ jaŋ wasa juuŋ ɛ a kii ŋii.” <sup>15</sup> Ŋii nɛ baal-la sii a mu bula pi Juu timma-la ari Yesu nɛ fa vaaru ŋii. <sup>16</sup> Yesu si ŋaa ŋii chɛ-wiesii-la chɛɛŋ, ŋii nɛ tii Juu tiŋŋaa suomo to Yesu naasiŋ di ba dɔgisu. <sup>17</sup> Ŋii nɛ Yesu bula piba a bul, “Mi Nyimma ka tiŋ nɛ, ŋii nɛ tii mi maa tiŋ.” <sup>18</sup> Yesu si bul ŋii ŋaa Juu timma-la wasa chiche wonɓii-la ba si jaŋ to kpuu. Wiaa balia nɛ ba si duu cheye, u chei ba kisiŋ ɛ chɛ-wiesii-la chɛɛŋ, aŋ pɛ bul di Wia nɛ ŋaa u Nyimma, a bul ŋii di ba di Wia mage dɔŋɔ nɛ.

### *Wia Bie si keŋ doluŋ ŋii*

<sup>19</sup> Ŋii nɛ Yesu bula pi niaa a bul, “Mi bul wutitii nɛ aa pima, mi-na Wia Bie bi wii-kala wuo ŋaa mi titia doluŋ ɛ. Mi yie ŋiŋaa wialiŋ mi si na di mi Nyimma ŋaa nɛ. Wii-na kala



u síi ŋaa ne, mi ma u Bie ŋiŋaa, <sup>20</sup> beɛ wiaa mi Nyimma chomi, mi si ŋaa u Bie, aa dagemi wialɪŋ kala u titia síi ŋaa. U jaŋ dagemi wiaa a kii ŋla di mi ŋaa, di ba ŋaama wu-kpuŋkpere. <sup>21</sup> Mi Nyimma si chise nialɪŋ si suba ba bira keŋ miisiŋ ŋii, ŋii titia ne mi ma u Bie joŋ miisiŋ a pipi nialɪŋ mi síi che. <sup>22</sup> Mi Nyimma-na bi nuu-kala sariya ka dii, ama u joŋba kala he mi-na u Bie nisiŋ le ne. <sup>23</sup> U ŋaa ŋii di nuu-kala to ŋii le a zizil mi-na u Bie ne, ari ba síi zil mi Nyimma ŋii. Nii-la-na kala si bi mi-na Wia Bie ka zil, u tiina ma bi mi Nyimma Wia si tiŋmi ka zil. <sup>24</sup> Wutitii ne mi bula pipima, nii-la kala si jegile nii mi niŋ wiaa a laa nii-la ma si tiŋmi wiaa dii, u jaŋ keŋ miisi-la si bi deɛ. U tiina, ba bi u-na sariya ka dii, u saa lii suuŋ bua le ne a keŋ miisiŋ.

<sup>25</sup> Wutitii ne mi bula pipima, bua-la jaŋ yi, u saa yie ma ne, di nialɪŋ si suba jaŋ nii mi-na Wia Bie yiikoro. Nialɪŋ saa si nii mi yiikoro, ba jaŋ keŋ miisiŋ. <sup>26</sup> Mi Nyimma si keŋ doluŋ duu pi niaa miisiŋ ŋii, ŋii ne u ŋaa mi ma u Bie keŋ doluŋ di mi pi niaa miisiŋ. <sup>27</sup> U saa pi mi-na u Bie doluŋ ne di mi dii niaa sariya, beɛ wiaa mi ne ŋaa Nuhuobiine Bie. <sup>28</sup> Ma sí leŋe di wiŋ deeŋ ŋaama wu-kpuŋkpere. Bua-la jaŋ ko di nialɪŋ kala si suba a he buasuŋ le jaŋ nii mi yiikoro. <sup>29</sup> Ba saa jaŋ sii ba buasuŋ le. Nialɪŋ si ŋaa wu-zoŋŋoo jaŋ sii a keŋ miisiŋ, nialɪŋ ma si ŋaa wu-boŋŋoo, di ba ma sii di Wia dii ba sariya a joŋ cheeriŋ piba.”

<sup>30</sup> ŋii ne Yesu bira bul, “Mi-na bi wii-kala wuo ŋaa mi titia doluŋ le. Mi yie dii sariya ari

Wia si si mi dii ŋii nɛ. Ŋii wiaa mi si yie dii sariya-la ŋii, u ŋaa wutitii nɛ, bɛɛ wiaa mi bi che di mi ŋaa wii-la mi sii che, ama wii-la nii-la si tiŋmi sii che. <sup>31</sup> Di mi duŋduŋa nɛ bul mi wiaa, u bi yuŋuŋ jaŋ keŋ. <sup>32</sup> Ama nuu ma nɛ hɛ dime a bubul mi wiaa. Mi saa jima wialiq u sii bul a tigemi lɛ, ba ŋaa wutitiiba nɛ. <sup>33</sup> Ma tiŋ ma tiŋdaaraa ba mu JOOŋ teenŋ a piɛsɛ mi wiaa. JOOŋ bul wutitii nɛ piba a tigemi lɛ. <sup>34</sup> U saa bi naga wialiq nuhuobiinee si bula a tigemi lɛ wiaa nɛ mi chil, ama mii bul wiinq deeq di ma ŋaa siri di Wia wuo laama ta nɛ. <sup>35</sup> JOOŋ fa nage chaaniŋ nɛ a chaanɛ, ma fa cho di ma nii u chaanŋ-la sima muapilii. <sup>36</sup> Ama wiinq doŋo hɛ dime a laa mi nyuŋ a bubul wiaa. U nɛ kii JOOŋ. Tiŋtimii-la mi sii tiŋ nɛ ŋii, tiŋtimii-la mi Nyimma si joŋo pimi di mi tiŋ. Ŋii daga ari mi Nyimma nɛ tiŋmi. <sup>37</sup> Mi Nyimma-la si tiŋmi, u maa bul mi wiaa nɛ. Ma ha bi u yiikoro nia, ma ha buu na ari ma siaa maa. <sup>38</sup> U niinq wiaa bima lɛ hɛ, bɛɛ wiaa ma bi mi-na nii-la u si tima wiaa laa dii. <sup>39</sup> Ma yie fiɛsɛ siinq a kikarime Wia teniŋ. Ma biina ari ma nii ŋaa ŋii, ma jaŋ wuo keŋ miisi-la si bi dɛɛ. Wia teŋ-la ma sii karimu ma paala bul mi wiaa nɛ. <sup>40</sup> Ka ma via di ma kɔ mi teenŋ a wuo keŋ miisiŋ. <sup>41</sup> Mi bi che di nuhuobiinee besɛmi lɛ. <sup>42</sup> Mi jima ari ma tuoŋ lɛ ma bi Wia cho. <sup>43</sup> Mi kɔ mi Nyimma doluŋ lɛ nɛ, ka ma bimi kɛnɛ woruŋ. Di nuu doŋ nɛ fa kɔ u titia doluŋ lɛ, u nɛ ma fa jaŋ keŋ woruŋ. <sup>44</sup> Ma cho di niaa besɛma lɛ nɛ, ama ma bi cho di Wia nɛ besɛma lɛ. Ɛɛ nɛ saa ma jaŋ wuo laa mi wiaa dii? <sup>45</sup> Ma si biina bul ari mi jaŋ joŋ

cheeriŋ pima mi Nyimma sipaaŋ. Moosis ne jaŋ joŋ cheeriŋ pima. Ma yielaa kala heu le ne. <sup>46</sup> Di ma ne sene fa laa Moosis wiaa dii, ma fa jaŋ laa mi ma wiaa dii. Mi wiaa ne Moosis fa ŋmuŋse ŋii. <sup>47</sup> Ama di ma bi wialin u si ŋmuŋsa laa dii, ee ne ma jaŋ wuo laa wialin mi sii bul dii?”

## 6

*Yesu pi niaa bui banŋ kudiilee*

*Mat. 14.13-21; Maak 6.30-44; Luuk 9.10-17*

<sup>1</sup> U ŋii hariŋ ne Yesu miira chol mugi-balin kubala baa yire Galilii mugi-balin. U yiriŋ doŋo ma ne Tabiiras. <sup>2</sup> Niaa yuga a tuto u hariŋ, bee wiaa ba fa na u si ŋaa wu-magilala a vaare nyanyal tiŋŋaa ne. <sup>3</sup> Ŋii ne Yesu ari u haritooro mu jil peelin nyuŋ a hoŋ dime. <sup>4</sup> Di Juu tiŋŋaa diisiŋ kielin gbiele-la ma kpaga. <sup>5</sup> Ba si hoŋ dime, Yesu bee na di ni-daj nii ko u teenŋ ŋii. U piесе Filip a bul, “Nii ne la jaŋ na kudiilee a yoo a pi niaa deenba kala di ba dii voge?” <sup>6</sup> Yesu titia fa jin wii-la u si jaŋ ŋaa ne, ama u ta bul ŋii duu magise Filip ne. <sup>7</sup> Ŋii ne Filip bula pu a bul, “Di la ne yoo boroboro a yi siidi bui balia maa, u bi niaa deenba wii-kala wuo ŋaa, ba doŋsun paala bi mua mua maa na.” <sup>8</sup> Ŋii ne di u haritooro doŋo he dime, baa yire Anḡuru. U fa ŋaa Saamŋ Piita naanbie ne. U bula pi Yesu a bul, <sup>9</sup> “Bii-bie kubala ne he la tuŋ a keŋ boroboroba banŋ ari cheŋfilee balia. Ee ne saa kiaa deenba jaŋ wuo ŋaa niaa deenba?” <sup>10</sup> Ŋii ne Yesu bul di ba leŋ di nialin

hōŋ. Di yaŋ bumo tōse lee-la. Ŋii ne nialiŋ hōŋ. Ba tuōŋ baalaa fa ŋaa bui banōŋ ne. <sup>11</sup> Ŋii ne Yesu laa boroboroba-la a chuōle Wia, aŋ kaa kpaā nialiŋ si hōnō. Ŋii ne u keŋ cheŋfilie-la ma kpaaba. Ba kuŋ-kala dii a vōge. <sup>12</sup> Ba si dii a vōge ŋii, u bula pi u haritooroo di ba mu paa boroboroba-la si ka, di kuŋ-kala sí lel. <sup>13</sup> Ŋii ne ba paa ku-kaana-la nialiŋ si die aŋ ka, a su siŋsiŋ fii ari balia. <sup>14</sup> Nialiŋ si he dime a na Yesu si ŋaa wu-magiliŋ deeŋ, ba bul di wutitii, baala deeŋ sene ŋaa nii-la síi bul wiaa, Wia Diŋ-zōŋ-la doluŋ le ba si si u jaŋ kō dunia ne.

<sup>15</sup> Ŋii ne Yesu jiŋ ari ba ŋaa siri ne di ba ku fugu duu dii ba kuoruŋ. Ŋii ne u mu faa peeliŋ nyuŋ.

*Yesu veŋ liiŋ nyuŋ*

*Mat. 14.22-33; Maak 6.45-52*

<sup>16</sup> Didaanŋ, Yesu haritooroo tuu muga <sup>17</sup> a juu liiŋ daboro, a bira duoroo chol muga aa mu Kapenam. Taŋ bire di Yesu ha bi ba teeŋ kō. <sup>18</sup> Bua-la le di pel-duo kubala maa lu a keŋ liiŋ kala ŋaa u viviisi. <sup>19</sup> Di u haritooro-la ma duoro a mu yi meel-daasiŋ batori koo banese, aŋ na Yesu duu veŋ liiŋ nyuŋ a kukō daboro-la teeŋ. Ba si na ŋii, fawulluŋ keŋba. <sup>20</sup> Ŋii ne Yesu bula piba a bul, “Ma sí leŋe di fawulluŋ keŋma, mi-na ne.” <sup>21</sup> Ŋii ne ba tuōŋ tōre, ba joŋu he liiŋ daboro-la tuōŋ. Di liiŋ daboro-la guu yi lee-la ba fa síi mu.

*Niaa yuga aa che Yesu*

<sup>22</sup> Taŋ si pula, ni-daŋ-la bira chiŋ muga-la cholo seme dōŋō, lee-la ba si mua. Didaaŋ-la

ba fa na liiŋ daboro kubala ne duu chiŋ dime. Ba jima ari Yesu haritooro duŋduŋa ne juu liiŋ daboro-la. Yesu tuo ba tuoŋ. <sup>23</sup> Ba si chiŋ dime ŋii, liiŋ daborusuŋ doŋsuŋ lii Tabiiras ko lee-la, a kpage lee-la Yesu fa si chuole Wia aŋ joŋ boroboro piba di ba dii. <sup>24</sup> Nialiŋ si na di Yesu tuo, u haritooro ma tuo, ba sii juu liiŋ daborosu-la a mu Kapenam aa cheu.

*Yesu si duu ne ŋaa boroboro-la si keŋ miisiŋ*

<sup>25</sup> Nialiŋ si na Yesu muga-la cholo doŋo, ba piesu a bul, “La kuhiaŋ, bua beε le ne η ko daha?” <sup>26</sup> Ŋii ne Yesu bula piba a bul, “Wutitii ne mi bulaa pima, maa chemi a tiŋ boroboro-la ma si dii voŋe wiaa ne, ama wu-magila-la ma si na di mi ŋaa wiaa dee. <sup>27</sup> Ma sí ma doluŋ kala he a che kudiilee. Kudiile-la jaŋ chei, ama má tima chiche kudiile-la si jaŋ pima miisi-la si bi deε. Kudiilee deeŋba mi-na Nuhuobiine Bie ne jaŋ pima, beε wiaa mi Nyimma Wia joŋ doluŋ hemi le ne di mii ŋaa ŋii.” <sup>28</sup> Ŋii ne ba piesu, “Eε ne la jaŋ wuo ŋaa a tiŋ Wia tiŋtiŋŋaa?” <sup>29</sup> Ŋii ne u bul, “Tiŋtimii-la Wia si cho di maa tiŋ ne ŋla: Má laa mi wiaa dii, mi ne nii-la Wia si tima.” <sup>30</sup> Ŋii ne ba piesu, “Wu-magili beε ne η jaŋ ŋaa di la na a laa η wiaa dii? Beε ne η jaŋ ŋaa? <sup>31</sup> Na la naabalimaba dii kudiilee ne giriŋ tuoŋ baa yire Mana. Wialiŋ ba si ŋmuŋse Wia teniŋ tuoŋ ne ŋla: Ba si, ‘U joŋ boroboro-la si lii wia nyuŋ ne a piba di ba dii.’ ”

<sup>32</sup> Ŋii ne Yesu bul, “Mi bul wutitii ne aa pima. Kialiŋ Moosis si pima, u dee bima pa, Wia ne pima. Kudiile-la bima miisi-la si bi deε ka pa.

Mi Nyimma ní pi niaa boroboro titii-la si lii Wia-jaŋ. Kudiile-la joŋ miisi-la si bi dere a pi dunia niaa. <sup>33</sup> Boroboro-la Wia si ta, u lii Wia-jaŋ ne a ku tuu. U ne pi dunia niaa miisiŋ.” <sup>34</sup> Ŋii ne ba bul, “La Tiina, ŋii-na vene joŋ boroboro deenŋ pipila.” <sup>35</sup> Ŋii ne Yesu bula piba a bul, “Mi ne ŋaa kudiile-la sí pi niaa miisiŋ. Nii-la kala si ko mi teenŋ, losuŋ bira bi jaŋ keŋ u tiina. Nii-la ma si laa mi wiaa dii, lii-nyuasuŋ ma bira bi jaŋ kenu. <sup>36</sup> Mi bula pipima ari ma nami ne, ama ma bi mi wiaa laa dii. <sup>37</sup> Nuu-na kala mi Nyimma si joŋo pimi, u jaŋ ko mi teenŋ. Niaa deenba kala si ko mi teenŋ, mi bi jaŋ ko di mi kiriba ta, <sup>38</sup> bee wiaa mi lii Wia-jaŋ ku tuu di mi ŋaa wialiŋ nii-la si tiŋmi sí che ne, mi titia tuotore wiaa dee. <sup>39</sup> Ŋla ne nii-la si tiŋmi chiche di mii ŋaa: di mi sí leŋe di nialiŋ u si joŋo pimi kuŋ-kala lel, ama di mi chuuleba kala dunia dideriŋ di ba keŋ miisiŋ. <sup>40</sup> Wialiŋ mi Nyimma sí che ne ŋla: Di nuu-na kala si na mi-na u Bie a laa mi wiaa dii, duu jaŋ keŋ miisi-la si bi dere. Dunia dideriŋ maa, ba ma jaŋ chisu suuŋ le duu keŋ miisiŋ.”

<sup>41</sup> Ŋii ne Juu timma-la suomo gugurime wiaa. U si si u ne ŋaa kudiile-la si lii Wia-jaŋ ku tuu, ŋii ne tii ba gugurime u wiaa ŋii. <sup>42</sup> Ŋii ne ba bul, “Baala deenŋ dee Josef bie Yesuu? La jiŋ u nyimma ari u naaŋ kala ne. Ee ne saa leelee u si duu lii Wia-jaŋ ne a ku tuu?” <sup>43</sup> Ŋii ne Yesu bira bula piba, “Má leŋ ma wialiŋ gurimuŋ. <sup>44</sup> Nuu-kala bi jaŋ wuo ko mi teenŋ, see di mi Nyimma-la si tiŋmi ne keŋ u tiina kaa ko mi teenŋ, di mi chisu suuŋ le dunia dideriŋ. <sup>45</sup> Nialiŋ sí bul

wiaa, Wia Diŋ-zoŋ-la doluŋ le, ba ŋmuŋse ŋla ne Wia teniŋ tuoŋ. Ba si,

‘Wia jaŋ dage niaa kala.’

Nuu-kala si ŋaa siri duu jegile nii wialiŋ Wia sii dagu, a gunne u teen, u ne jaŋ ko mi teen. <sup>46</sup> U ŋii ma saa bi nage ari nuu-kala na mi Nyimma Wia ne, see nii-la si lii Wia teen. U dunduŋa ne nau. <sup>47</sup> Wutitii ne mi bulaa pima, nii-la kala si laa mi wiaa dii, u jaŋ keŋ miisi-la si bi dere. <sup>48</sup> Mi ne ŋaa kudiile-la sii pi niaa miisiŋ. <sup>49</sup> Ma naabalimaba dii kudiile-la ba sii yire ‘Mana’ ne giriŋ tuoŋ. Ari ŋii kala ba-na ha suba ne. <sup>50</sup> Ama kudiile-la si lii Wia-jaŋ ku tuu, di nuu ne diiba, u bi jaŋ suu. <sup>51</sup> Mi-na ne ŋaa kudiile-la si keŋ miisiŋ a lii Wia-jaŋ ku tuu. Di nuu ne dii kudiilee deŋba, u jaŋ keŋ miisi-la si bi dere. Mi yaraa namia ne ŋaa kudiile-la mi si jaŋ joŋo pi dunia niaa di ba keŋ miisi-la si bi dere.”

<sup>52</sup> Yesu si bul ŋii, Juu tiŋŋaa suomo keŋ wii-la lilere a bul, “Ee ne baala deŋ jaŋ wuo ŋaa a joŋ u yaraa namia pila di la chaŋ?” <sup>53</sup> ŋii ne Yesu bula piba a bul, “Wutitii ne mi bulaa pima, di ma ne bi mi-na Nuhuobiine Bie yaraa namia chaŋa, a nyua mi chaliŋ maa, ma bi jaŋ keŋ miisi-la si bi dere. <sup>54</sup> Nii-la kala si chaŋ mi yaraa namia, a nyua mi chaliŋ maa, u jaŋ keŋ miisi-la si bi dere. Di dunia ma ne dere, mi jaŋ chise u tiina suuŋ le duu keŋ miisiŋ, <sup>55</sup> bee wiaa mi yaraa namia sene ŋaa kudiilee ne. Mi chaliŋ ma sene ŋaa lii-nyualuŋ ne. <sup>56</sup> Nii-la kala si chaŋ mi yaraa namia-la a nyua mi chal-la, u jaŋ he mi teen a kaa mu wuu, mi ma jaŋ he u teen a kaa mu wuu. <sup>57</sup> Mi Nyimma-la si keŋ

miisiŋ a tiŋmi ŋii, ŋii ne mi ma keŋ miisiŋ. Ŋii titia ne nii-la ma si chaŋ mi yaraa namia ma jaŋ keŋ miisiŋ a tiŋ mi wiaa. <sup>58</sup> Kudiile-la si lii Wia-jaŋ ku tuu ne ŋii. U bi naga kudiile-la ma naabalimaba si die aŋ ha suu ne. Nii-la kala si dii kudiilee deeŋba, u jaŋ keŋ miisi-la si bi deɛ.” <sup>59</sup> Yesu bul wiaa deeŋba duu he Kapenam tiŋteenŋ le ne aa dage niaa Wii-chuoɛ dia le.

*Wialiq si jaŋ pi niaa miisi-la si bi deɛ*

<sup>60</sup> Niaa yuga a faa to Yesu hariŋ, a nii wialiq u si bula a bul, “Wiaa deeŋba u sii dage, ba heye kiŋkeŋ. Kubee ne jaŋ wuo jegili wiaa deeŋba?” <sup>61</sup> Ba bi wii-kala bula, ka Yesu jiŋ ari u haritooro-la ka gurime wiaa ne a tiŋ wialiq u si bula le. Ŋii ne u pieɛba a bul, “Wiŋ deeŋ leŋe ma na baaniŋ nee? <sup>62</sup> Ka di ma ne saa fa na mi-na Nuhuobiine Bie di mi miiraa mu leela mi si liaa? <sup>63</sup> Wia Diŋ-zoŋ-la ne ku-la si pila miisi-la si bi deɛ. Nuhuobiine yaraa doluŋ-na ŋaa pei ne. U bi miisi-la si bi deɛ wuo pa. Wia Diŋ-zoŋ-la wiaa ne mi bula pima. Ba jaŋ pima miisi-la si bi deɛ. <sup>64</sup> Ama ma doŋsuŋ bi mi wiaa laa dii.” Buŋbuŋ kala Yesu fa jiŋ nialiq si bi u wiaa laa dii ne ari nii-la si jaŋ joŋu yalle. <sup>65</sup> Ŋii ne Yesu bira bul, “Wiŋ deeŋ wiaa ne tii mi bula pima ari nuu-kala bi jaŋ wuo ko mi teenŋ, see di mi Nyimma pi u tiina woŋbiŋ duu wuo ko.”

<sup>66</sup> A tiŋ wiŋ deeŋ wiaa ni-daŋ-la fa si to u hariŋ, ba miire hariŋ. <sup>67</sup> Ŋii ne Yesu pieɛ u haritooroo fii ari balia-la a bul, “Ma ma cho di ma miire mi hariŋ nee?” <sup>68</sup> Ŋii ne Saamoŋ Piita piesu a bul, “La Tiina, kubee teenŋ ne saa la ma



jaŋ mu? Wialiq ŋ síi bul níi pi niaa miisi-la si bi dɛɛ. <sup>69</sup> Lɛɛɛ la laa dii a jiq ari ŋ nɛ ŋaa Wia Tuɔ-pul Tiina.” <sup>70</sup> Ŋii nɛ Yesu piɛɛba a bul, “Ma niaa fii ari balia dee mi liisɛɛ? Ama ma dɔŋɔ ŋaa diŋdɔŋ nɛ a ŋaa Sitaani tiina.” <sup>71</sup> Judas, Saamɔŋ Isikarɔt bie wiaa nɛ u faa bul ŋii. U fa hɛ u haritooro-la fii ari baliamiŋ tuɔŋ nɛ, ama u nɛ fa jaŋ joŋ Yesu yallɛ.

## 7

### *Yesu mu gbieli-baliŋ Jerusalem lɛ*

<sup>1</sup> Ŋii hariŋ Yesu gugolle Galilii tiŋteenŋ. U bi cho duu mu golle Judiya tiŋteenŋ lɛ, bɛɛ wiaa Juu tiŋŋaa fa si hɛ Judiya tiŋteenŋ lɛ ka chɛ di ba kpɛu nɛ. <sup>2</sup> Di Juu tiŋŋaa gbieli-bal kubala yie. Gbiele-la lɛ ba yie leŋ ba diisiŋ aŋ hɛ leŋŋɛɛ nɛ a jujuu. Di gbiele-la nɛ dɛɛ, ba bira miira mu a jujuu ba diisiŋ. <sup>3</sup> Ŋii nɛ Yesu ŋaanaa bula pi Yesu a bul, “Sii daha a mu Judiya tiŋteenŋ, di ŋ haritooroo ma wuo na wialiq ŋ síi ŋaa. <sup>4</sup> Nii-la síi chɛ di ba jimu, u bi faa ŋiŋaa wiaa. Ŋ síi ŋaa wiaa deŋba, leŋ di dunia niaa kala na.” <sup>5</sup> Ba titia paala bi u wiaa laa dii, ŋii nɛ tii ba bul ŋii. <sup>6</sup> Ŋii nɛ Yesu bula piba a bul, “Bua-la si jaŋ yi di mi mu gbiele-la, u ha bi yie. Ma-na teenŋ bua-na kala maga nɛ. <sup>7</sup> Dunia niaa bima bɛɛ, ama ba bɛɛ mi-na nɛ. Mi venɛɛ bula piba ari baa ŋaa wu-bɔŋŋɔɔ nɛ. <sup>8</sup> Má-na lii mu gbiele-la, mi-na ha bi mu, bɛɛ wiaa bua-la si jaŋ yi di mi mu ha bi yie.” <sup>9</sup> U bul ŋii aŋ hɔŋ Galilii tiŋteenŋ lɛ nɛ.

<sup>10</sup> Yesu ŋaana-la si mu gbiele-la dɛɛ, Yesu ma sii mu. Ama u bi niaa hariŋ to. U luɔra

mu ne. <sup>11</sup> Juu tinŋaa si he gbiele-la le, ba bee chiche Yesu gbiele-la le, a pipiese di nii le ne u he? <sup>12</sup> Ŋii ne nialin si he gbiele-la lerin, ba jesin suomo a muŋsi a bubul Yesu wiaa. Doŋsuŋ si duu ŋaa ni-zoŋ ne. Doŋsuŋ ma bi seye aŋ bul duu nyise niaa ne. <sup>13</sup> Ama ba kala faa fá Juu timma-la ne, ŋii ne tii nuu-kala bi wuo faasa bul u wiaa.

<sup>14</sup> Gbiele-la si ku kpaá maga doŋo, Yesu juu Wia-dia a didage niaa. <sup>15</sup> U si dage niaa ŋii ŋaa Juu timma-la si jegile nii wialin wu-kpuŋkpere. Ba si, “Ee ne baala deen jin wiaa ŋla kinkeŋ aŋ bi lee yie?” <sup>16</sup> Ŋii ne Yesu bula piba a bul, “Wialin mi síi dagu, mi titia doluŋ le dee mii dage. Nii-la si tinmi ne dagemi wialin. <sup>17</sup> Nii-la kala síi che duu ŋaa wii-la mi si cho, u jaŋ wuo jin ari wialin mi síi dagu lii Wia teen ne, koo mi titia doluŋ le ne. <sup>18</sup> Nii-la si yie bubul wiaa u titia doluŋ le yie bula chiche u titia yirin ne. Ama nii-la síi che di nii-la si timu laa yirin, u ŋaa ni-titii ne. U bi wiaa ka nyia. <sup>19</sup> Moosis bil niin pima ne di maa to. Ama ma kuŋ-kala bi ŋii-la to. Bee ne tii maa che di ma kpumi?” <sup>20</sup> Ŋii ne nialin bula pu a bul, “Ŋŋ nyaase ne. Kubee níi che di u kpuŋ?” <sup>21</sup> Ŋii ne Yesu bula piba a bul, “Mi ŋaa wu-bala ne ma che-wiesii-la cheŋ, u ŋaa ma wu-kpuŋkpere. <sup>22-23</sup> Moosis fa bula pima di ma kikeri ma biirin penee. U dee bi ŋii suomo. U naabalimaba ne suomo ŋaa ŋii. U si ŋaa ma kisin ŋii, ma paala yie keri ma biirin penee che-wiesii-la cheŋ, di ba lulluŋ ne tel ŋii le. Di ma ne saa jaŋ wuo to Moosis niin aa keri ma biirin penee che-wiesii-

la cheeŋ, di ba lulluŋ ne tel che-wiesii-la cheeŋ, bee ne saa tii maa na baaniŋ a tiŋ mi si ŋaa puwuoloo duori che-wiesii-la cheeŋ? <sup>24</sup> Di nuu ne ŋaa wii, ma sí guu joŋ taali pu a tiŋ ma si biina ari u bi woruŋ ŋaa wiaa. Má biine wii-la tuoŋ a jiŋ u wutitii, aŋ-na joŋ taali pu.”

<sup>25</sup> Ŋii ne niaa doŋsuŋ si lii Jerusalem piése a bul, “Baala deeŋ dee ba chiche di ba kpu ŋii? <sup>26</sup> Na, u ne chiŋ niaa tuoŋ ŋii aa bul wiaa, ka nuu-kala bi wii wuo bul, koo nihiasi-la jima ari u ne ŋaa Kirisito, nii-la Wia si liisaa? <sup>27</sup> Nii-la Wia si jaŋ tiŋ, duu ne kɔ, nuu-kala bi jaŋ jiŋ u si lii lee-la, ama la kala ne jiŋ lee-la baala deeŋ si lia.” <sup>28</sup> Yesu síi dage niaa Wia-dia-la tuoŋ ŋii, ŋii ne u faasa piése, “Ma sene jiŋmi nee, a jiŋ lee-la mi si liaa? Ama mi saa bi mi titia doluŋ le ne kɔ. Nuu ne tiŋmi. Nii-la ma saa si tiŋmi ŋaa Wutitii Tiina ne. Ma buu jiŋ. <sup>29</sup> Mi-na jimu ne, bee wiaa mi fa he u teeŋ ne. Ŋii ne u tiŋmi.” <sup>30</sup> Ŋii ne ba chiche di ba kenu, ama bua-la le u si jaŋ suu ha bi yie. Ŋii ne tii nuu-kala nisiŋ buu dige. <sup>31</sup> Ama niaa yuga nialiŋ tuoŋ a laa u wiaa dii a piése a bul, “Ma biina di Kirisito, nii-la Wia si jaŋ liise ne kɔ, u jaŋ ŋaa wu-magilaa kii nia deeŋ?”

### *Ba tiŋ niaa di ba mu keŋ Yesu*

<sup>32</sup> Farisii tiŋŋaa si nia di nialiŋ muŋso bubul Yesu wiaa ŋii, ŋii ne ba di nialiŋ si kpu pusuŋ pipi Wia kuhiasiŋ tiŋ ba tiŋtinni-biisiŋ di ba mu keŋ Yesu. Ba si mu lee-la Yesu fa si he di ba kenu, ba nii wialiŋ u si bula pipi niaa. <sup>33</sup> U si, “Mi jaŋ he ma teeŋ tapulaa baŋmene, aŋ miira

mu nii-la si tin̄mi teen̄. <sup>34</sup> Ma jaŋ chemi ka. Lee-la mi si jaŋ he, ma bi jaŋ wuo mu dime.”  
<sup>35</sup> Ŋii ne Juu timma-la pieŋe di nii ne uu che duu mu ba bi jaŋ nau? Duu che duu mu Giriik tin̄teen̄, lee-la Juu tin̄ŋaa si guoli ba tuoŋ ne, a didagebaa? Ba bira si, <sup>36</sup> “U si di la jaŋ cheu ka, a bira bul di la bira bi jaŋ wuo mu lee-la u si jaŋ he. U si bul ŋii, u bubuoŋ ne beŋ?”

*Yesu bul wiaa a tige lii-la s̄ii pi niaa miisin̄ le*

<sup>37</sup> Gbiele-la che-derin̄, tapulii-la ne fa ŋaa gbiele-la siifiaŋ cheŋ. Ŋii ne Yesu sii chin̄ a faasa bul, “Nii-la kala lii-nyuasun̄ si keŋe, má leŋ duu k̄o mi teen̄ a nyua liin̄. <sup>38</sup> Nii-la kala si laa mi wiaa dii, u jaŋ nage lii-bulo u tuoŋ le a bubul. Ba bul ŋla ne Wia tenin̄ tuoŋ.” <sup>39</sup> Yesu bul wiaa deen̄ba a tige Wia Diŋ-zoŋ-la le ne u si jaŋ joŋo he nialin̄ si laa u wiaa dii le. Bua-la le di u ha bi Wia Diŋ-zoŋ-la joŋo heba le, beŋ wiaa u ha bi suun̄ le sie duu laa yirin̄.

*Nialin̄ pore doŋo le a tin̄ Yesu wiaa*

<sup>40</sup> Ni-dan̄-la fa si he dime a nii wialin̄ Yesu si bula, ŋii ne ba doŋsun̄ bul di nia deen̄ sene ŋaa nii-la s̄ii bul wiaa, Wia Diŋ-zoŋ-la dolun̄ le ne. <sup>41</sup> Doŋsun̄ ma si, duu ne ŋaa Kirisito, nii-la Wia si liisa. Ama doŋsun̄ ma si di nii-la Wia si liisa bi jaŋ lii Galilii tin̄teen̄. <sup>42</sup> Wia tenin̄ tuoŋ ba bula ari Kirisito, nii-la Wia si liisa, ŋaa Devit doho nuu ne a lii Betilehem. Devit jaŋ ne fa Betilehem. <sup>43</sup> Ŋii ne nialin̄ keŋ wiin̄ deen̄ lilere a pore doŋo le. <sup>44</sup> Ba doŋsun̄ chiche di ba keŋ Yesu, ama nuu-kala bi nisin̄ joŋo digu.

<sup>45</sup> Ɔii ne tiŋtinni-biisi-la ba si tima di ba mu keŋ Yesu, ba miira mu Farisii tiŋŋaa ari nialin si kpu pusun pipi Wia kuhiasin teen, ari nahillin. Ɔii ne ba pieseba a bul, “Bee ne tii ma buu kaa ko?” <sup>46</sup> Ɔii ne ba bul, “Nuu-kala ha bi wiaa bula ari baala deen sii bul nii.” <sup>47</sup> Ɔii ne Farisii kuhiasi-la pieseba a bul, “U nyisema ma nee? <sup>48</sup> Ma nia ari ma kuhiasin tuon koo la Farisii tiŋŋaa tuon kubala ma ha laa u wiaa dii? <sup>49</sup> Ama ni-dan deen kala si hilime, ba bi wialin Moosis si nmuŋsa bil jin. Wia jan kpuse ba nyusun.” <sup>50</sup> Baal kubala baa yire Nikodiimas, u ma fa ŋaa Farisii tiŋŋaa donon ne a he ba tuon. U-na fa laa sipaan mu Yesu teen ne an ka. <sup>51</sup> Ɔii ne u bula piba a bul, “La kisin ne di la jon cheerin a pi nuu duu ne ŋaa wii, see di la laa sipaan nii tiina nin, a jin wii-la u si ŋaa.” <sup>52</sup> Ɔii ne Farisii timma-la piesu a bul, “Ɔ ma ŋaa Galilii tiina nee? Karime Wia tenin. Di ŋ ŋaa nii, ŋ jan na ari nialin sii bul wiaa, Wia Dinzon-la dolun le, ba kun bi Galilii tinteen lia.” [  
<sup>53</sup> Ɔii ne ba kala sii pise a mu ba diisin.

## 8

### *Ba keŋ haal-la si pin nuu bala*

<sup>1</sup> Ɔii ne ka Yesu ma lii dime a jil peel kubala baa yire Oliv nyun. <sup>2</sup> Tan si pula chichuo-fiela, u bira miira mu a juu Wia-dia. Niaa ku gbaaru, u hon a bira suomo didageba. <sup>3</sup> Ɔii ne Wia tenin kerichiba ari Farisii tiŋŋaa keŋ haal kubala ku juu. Ba keŋ haal-la duu pin nuu bala. Ba len u chin ba tutuobaanin. <sup>4</sup> Ɔii ne ka ba bula pi Yesu

a bul, “La kuhian, la keŋ haala deen duu hiile nuu bala ne. <sup>5</sup> Wialin Moosis fa si bile di niaa tuto daga ari nuu-kala ne ŋaa ŋii, di la yaga kpuu ne ari tabiaa. Bee ne ŋ ma bul?” <sup>6</sup> Ba bul ŋii di ba ŋmoo Yesu fehe le ne, a wuo na worŋbiin a bul u teen. Ŋii ne Yesu keŋ u nyuŋ chugili tinteen aŋ keŋ u neniin tutuuri tinteen. <sup>7</sup> Ka ba ha chin aa pieŋe wiaa. Ŋii ne Yesu keŋ u nyuŋ wul wia nyuŋ a bula piba a bul, “Ma ku-la kala ha si bi haache wii ŋaa, má leŋ duu laa sipaan joŋ tabiin a yage haal-la, di ku-kaanaa ma pe.” <sup>8</sup> Ŋii ne u bira keŋ u nyuŋ chugili a bira keŋ u neniin a tutuuri tinteen. <sup>9</sup> Ba si nii wialin u si bula, ba kala lii kuŋ kuŋ. Ba tuon nihiasi-la ne laa sipaan lii, ka ku-kaanaa tuto, aŋ ka Yesu ari haal-la duŋduŋa lee-la. <sup>10</sup> Ŋii ne Yesu keŋ u nyuŋ jee a pieŋe haal-la a bul, “Nii ne nialin he? Nuukala tuo duu yagin kpuu?” <sup>11</sup> Haal-la si di nuukala tuo. Ŋii ne Yesu bula pu a bul, “Too, mi ma bi jaŋ ŋaan wii-kala. Viiri aŋ bira sí haache ŋaa.”]

### *Yesu si duu ne ŋaa dunia niaa pulumuŋ*

<sup>12</sup> Ŋii ne Yesu bira suomi a didage niaa. U bula piba a bul, “Mi ne ŋaa dunia niaa pulumuŋ. Nii-la kala si tomi bi jaŋ veŋ birimin tuon. U jaŋ veŋ pulumuŋ tuon. Miisi-la mi si jaŋ pu jaŋ chaane.” <sup>13</sup> Ŋii ne Farisii timmala bula pu a bul, “Ŋ titia wiaa ne ŋ bubul ŋii, wialin saa ŋ si bula bi wutitii kene.” <sup>14</sup> Ŋii ne Yesu bula piba a bul, “Di mi ne bul mi titia wiaa maa, wii-la mi si bula ŋaa wutitii ne, bee wiaa mi jin lee-la mi si lia ne, a jin lee-la mi si jaŋ mu.

Ama ma-na bi lee-la mi si lia jin, a bira bi lee-la mi si jaŋ mu ma jin. <sup>15</sup> Ma yie joŋ cheeriŋ pi nuu a tiŋ ma si biina ari u si bi woruŋ ŋaa wiaa. Mi-na bi nuu-kala cheeriŋ pa. <sup>16</sup> Di mi ne faa joŋ cheeriŋ pi niaa maa, u fa jaŋ ŋaa wutitii, beɛ wiaa mi duŋduŋa dee bi cheeriŋ joŋo pi tiina, mi Nyimma-la si tiŋmi ne pemi le la joŋ cheeriŋ a pi tiina. <sup>17</sup> Wialin Moosis fa si bile di niaa tuto daga ari niaa balia ne na wiin, a bul duu ŋaa wutitii ne, di wii-la sene ŋaa wutitii ne. <sup>18</sup> Mii bul mi titia wiaa ne, mi Nyimma-la ma si tiŋmi, u ma bubul mi wiaa.” <sup>19</sup> Ŋii ne ba piesu, “Nii ne ŋ Nyimma he?” Ŋii ne Yesu bul, “Ma bimi jin, ŋii wiaa ma bi mi Nyimma ma jin. Di ma ne fa jinmi, ma fa jaŋ jin mi Nyimma maa.” <sup>20</sup> Yesu bul wiaa deenba kala bua-la le u sii dage niaa Wia-dia le ne, lee-la ba si yie joŋ kialin bile pipi Wia. Ka nuu-kala buu kene, beɛ wiaa bua-la le ba si jaŋ kenu ha bi yie.

*Yesu si di niaa bi jaŋ wuo mu lee-la u si jaŋ mu*

<sup>21</sup> Ŋii ne Yesu bira bula pi nialin a bul, “Mi jaŋ viiri, ma jaŋ chemi ka, ma saa jaŋ suu ari ma haacheba. Lee-la mi sii mu, ma bi jaŋ wuo mu dime.” <sup>22</sup> Ŋii ne Juu timma-la piese doŋo a bul, “U si, la bi jaŋ wuo mu lee-la u sii mu. U saa bula magise ari u jaŋ kpu u titia ne koo ee ne u bul ŋla?” <sup>23</sup> Ŋii ne Yesu bira bula piba a bul, “Ma lii dunia deen ne, ka mi ma lii Wia-jaŋ. Ma lii dunia ne, aŋ ka mi ma bi dunia lia. <sup>24</sup> Mi laa sipaan bula pima ari ma jaŋ suu ari ma haacheba. Ma sene jaŋ suu ari ma haacheba,

see di ma laa mi wiaa dii ari mi si si mi ŋaa nii-la.” <sup>25</sup> Ŋii ne ba piesu a bul, “Kubεε ne ŋ ŋaa?” Ŋii ne Yesu bula piba a bul, “Mi si suomo dage niaa, mi dage nii-la mi si ŋaa ne a pima. <sup>26</sup> Mi keŋ wiaa yuge ne di mi bul a tigema le, a wuo to wialij le a joŋ cheerij pima. Nii-la si tiŋmi, u sene ŋaa Wutitii Tiina ne. Wialij mi sii nii, u niij le ne mi saa bula pi dunia niaa.” <sup>27</sup> U sii bul ŋii, nialij fa bi jij ari u Nyimma Wia wiaa ne u bulaa piba ŋii. <sup>28</sup> Ŋii ne Yesu bula piba, “Di ma ne keŋ mi-na Nuhuobiine Bie kpaase daa-gεεε nyuŋ, ma jaŋ jij ari mi ne ŋaa nii-la mi si si mi ŋaa. Ŋii ma le ne ma jaŋ to jij ari mi bi wii-kala ŋaa mi titia doluŋ le, ama mi yie bul wialij mi Nyimma si dagemi ne. <sup>29</sup> Nii-la ma saa si tiŋmi bimi duŋduŋa leŋe, u ma he mi teeŋ ne, beε wiaa mi yie ŋaa wialij sii tɔre u tuoŋ ne.” <sup>30</sup> U si bul wiij deen, niaa yuga a laa u wiaa dii.

### *Nialij si sene ŋaa Abiraham doho niaa*

<sup>31</sup> Ŋii ne Yesu bula pi Juu timma-la si laa u wiaa dii a bul, “Di ma ne nii mi niij wialij, ma jaŋ sene ŋaa mi haritooroo. <sup>32</sup> Ma jaŋ jij wutitii. Wutitii-la saa jaŋ leŋ di Wia laama ta di ma tii ma titia.” <sup>33</sup> Juu timma-la si laa Yesu wiaa dii ma bul, “La paala ŋaa Abiraham doho niaa ne. La ha bi nuu-kala yosu ŋaa. Beε ne saa tii ŋ bul di Wia jaŋ laala ta di la tii la titia?”

<sup>34</sup> Ŋii ne Yesu bula piba a bul, “Wutitii ne mi bulaa pima, nuu-na kala si ŋaa haache, u tiina ŋaa haache yoŋ ne. <sup>35</sup> Di yomo ne he nuu dia



le, u bi dia-la le jaŋ he deen deen. Ama di dia-la tiina ne keŋ bii, u-na jaŋ he dia-la le a kaa mu wuu. <sup>36</sup> Di mi-na Wia Bie ne saa laama ta, mi sene laama ta ne di ma tii ma titia. <sup>37</sup> Mi jima ari ma ŋaa Abiraham doho niaa ne, aŋ ka ma chiche di ma kpumi, bee wiaa wialij mi si dagema bi ma digilaa jua. <sup>38</sup> Mi-na yie bul wialij mi Nyimma si dagemi ne, ma ma ŋjaa wialij ma nyimma si dagema di ma ŋjaa.”

<sup>39</sup> Ŋii ne ba bula pu a bul, “Abiraham ne ŋaa la nyimma.” Ŋii ne Yesu ma bul, “Di ma ne sene fa ŋaa Abiraham biiri, ma fa jaŋ ŋjaa wialij Abiraham fa sii ŋaa. <sup>40</sup> Mi bul wutitii ne pima, wialij Wia si dagemi. A tiŋ wiij deen wiaa ne maa che di ma kpumi. Abiraham fa bi ŋii ŋaa. <sup>41</sup> Maa ŋaa wialij ma nyimma sii ŋaa ne.” Ŋii ne ba bul, “La bi mangaa-biiri ŋaa. La kala nyimma ne kubala. Wia ne ŋaa la Nyimma.” <sup>42</sup> Ŋii ne Yesu bula piba a bul, “Di Wia ne sene fa ŋaa ma Nyimma, ma fa jaŋ chomi, bee wiaa, Wia teen ne mi lii a ko daha. Mi titia doluŋ le dee mi ko. U ne tiŋmi. <sup>43</sup> Bee ne saa tii ma bi wialij mi si bula bubuŋ jij? Ma bi che di ma jegile nii wialij mi sii bul. Ŋii ne tii ma bi ba bubuŋ jij. <sup>44</sup> Ma nyimma ne ŋaa Sitaani. Ma ma saa cho di maa ŋaa u tuotore wiaa ne. Dunia di-suomuŋ kala le ne u ŋaa ni-kpuuru. U titia bi wutitii kene. Ŋii ne tii u bi wutitii ka to. Di u ne nyia wiaa maa, u nagisiŋ ne paala ŋii. U ŋaa wu-nyiaru ne, a paala ŋaa wu-nyiaraa kala nyimma maa. <sup>45</sup> Ama a tiŋ mi sii bul wutitii wiaa ne ma bi mi wiaa laa dii. <sup>46</sup> Ma kubee ne jaŋ wuo dage ari mi keŋ haache? Di mi nii bul

wutitii, bæε ne saa tii ma bi mi wiaa laa dii?  
 47 Nii-la kala si lii Wia teen yie jegile nii wialiq  
 Wia síi bul ne. Ma bi Wia teen lia, ŋii ne tii ma  
 bi wialiq u síi bul jegile nii.”

48 Ŋii ne Juu timma-la bula pi Yesu a bul, “La  
 bi wutitii bulaa, la si si ŋ ŋaa Samaria tiina  
 næε, jiq-bomun ma keninq?” 49 Ŋii ne Yesu bula  
 piba a bul, “Jiq-bon bimi kenε, ama mii pi mi  
 Nyimma jirima ne, aŋ ka ma-na bimi jirima ka  
 pa ŋii. 50 Mi bi yiriŋ che pipi mi titia. Ama nuu  
 ne he dime a che yiri-la pipimi. U ne saa jaŋ  
 dii nialiq si via mi wiaa sariya. 51 Wutitii ne mi  
 bulaa pima, nii-la kala síi to mi niinq wiaa, u bi  
 jaŋ suu.” 52 Ŋii ne Juu timma-la bula pu a bul,  
 “Lεεε la jima ari ŋ keŋ jiq-bon ne. Abiraham  
 suba ne. Nialiq ma síi bul wiaa, Wia Diŋ-zon-la  
 dolun le, ba ma suu. Aŋ ka ŋ bul di nii-la kala síi  
 to ŋ niinq wiaa bi jaŋ ko duu suba. 53 La nyimma  
 Abiraham suba ne. Ŋ saa biina di ŋ kiiu næε?  
 Nialiq síi bul wiaa, Wia Diŋ-zon-la dolun le ma  
 suu. Ŋ saa biina ŋ ŋaa kubεε ne?” 54 Ŋii ne  
 Yesu bira bula piba a bul, “Di mi níi pi mi titia  
 yiriŋ, yiri-la ŋaa yiri-peí ne. Mi Nyimma ne nii-  
 la síi pimi yiriŋ, nii-la ma si si u ŋaa ma Wia ne.  
 55 Ma buu jiq, ama mi-na jimu ne. Di mi ne jaŋ  
 bul ari mi buu jiq, mi jaŋ ŋaa wu-nyiaru, ari ma  
 si ŋaa wu-nyiaraa ŋii. Mi saa jimu ne a tuto u  
 niinq. 56 Ma naabalima Abiraham nia ari mi jaŋ  
 ko dunia duu nami. U si nii ŋii, u tuon fa tōre.  
 U paala nami ne.” 57 Ŋii ne Juu timma-la bula  
 pu a bul, “Ŋ ha paala bi jisinq mahinq balia ari  
 fii yie. Eε ne saa ŋ ŋaa a na Abiraham?” 58 Ŋii  
 ne Yesu bula piba a bul, “Wutitii ne mi bulaa

pima, ka di ba-na lul Abiraham, mi fa he dime ne.” <sup>59</sup> Ŋii ne ba paa tabiaa di ba yagu. U keŋ u titia faa a luora lii Wia-dia-la tuoŋ.

## 9

### *Yesu vaare baal-la ba si lulu duu nyulima*

<sup>1</sup> Yesu si joŋ woŋbiin viveŋ, u na baal kubala, ba lulu duu nyulima ne. <sup>2</sup> Ŋii ne Yesu hari-tooroo piesu a bul, “Kuhian, kubee haache ne ŋaa baala deen nyulime? Baal-la haache ne koo u nyimma ari u naaŋ haache ne?” <sup>3</sup> Ŋii ne Yesu bula piba a bul, “Baal-la nyulimuŋ bi u haacheba le lia, u nyimma ari u naaŋ haache ma dee bi tii u nyulime. U nyulima di niaa wuo na ŋii Wia dol-la si wuo tiŋ tiŋtiŋŋaa u le ne. <sup>4</sup> La si na woŋbiin, má leŋ di la tiŋ tiŋtimii-la nii-la si tiŋmi di mi tiŋ. Bua kubala jaŋ yi nuu-kala bira bi jaŋ wuo tiŋ tiŋtimii-la. <sup>5</sup> Mi ha si he dunia le ŋii, mi ne ŋaa dunia niaa pulumuŋ.” <sup>6</sup> Yesu si bul ŋii ne, u tu naŋtuoroŋ bil tiŋteŋ a kaa buu tiariŋ, a paa a taa baal-la siaa, aŋ bula pi baal-la a bul, <sup>7</sup> “Sii tuu fuo kubala baa yire Siloom (yirin deen bubuoŋ ne ŋaa ‘mi timu ne’) a soŋ ŋ siaa.” Ŋii ne baal-la sii tuu soŋ u siaa fuo-la le. U siaa suri, u miira ko. <sup>8</sup> Ŋii ne nialiŋ si kpagu, ari nialiŋ kala fa si na baal-la duu faa sul kiaa, ba pipiese doŋo, “Baala deen dee fa bi hoŋo susul kiaa ŋii?” <sup>9</sup> Doŋsuŋ si u ne, doŋsuŋ ma si duu dee, ama u ta nagu ne. Ŋii ne baal-la titia bul duu ne ŋii. <sup>10</sup> Ŋii ne ba piesu, “Ee ne ŋ ŋaa ŋ siaa suri?” <sup>11</sup> Ŋii ne baal-la bul di nii-la ba sii yire Yesu ne buu tiariŋ, a paa taa u siaa

le, aŋ bula pu duu tuu Siloom fuo-la a soŋ. U tuu soŋ, u siaa suri. <sup>12</sup> Ŋii ne ba piesu, “Nia le ne u he?” Baal-la bul di u bi jiŋ.

*Farisii tiŋŋaa piese nyuluŋ-la vaariŋ wiaa*

<sup>13</sup> Ŋii ne ba keŋ baal-la fa si nyulima a kaa mu Farisii tiŋŋaa teenŋ. <sup>14</sup> Tapulii-la Yesu si buu tiariŋ a taa baal-la siaa ba suri, u ŋaa che-wiesii-la cheeŋ ne. <sup>15</sup> Ŋii ne Farisii timma-la piese baal-la ŋii u si ŋaa u siaa suri. Baal-la bula piba a bul di Yesu ŋaa tiariŋ ne taa u siaa, u soŋ, u siaa suri. <sup>16</sup> Ŋii ne ba keŋ wii-la lilere. Farisii tiŋŋaa doŋsuŋ bula ari Wia dee bi baala deeŋ tima, bee wiaa u bi ba che-wiesii-la kisiŋ le ka to. Ŋii ne doŋsuŋ ma si di “Ee ne nuu si ŋaa haache tiina jaŋ wuo ŋaa wu-magilaa deeŋba?” <sup>17</sup> Ŋii ne Farisii timma-la bira piese baal-la a bul, “U si suri ŋ siaa ŋii, ni-bee ne ŋ biina ari u ŋaa?” Ŋii ne baal-la si u-na biina ari nialiŋ sii bul wiaa, Wia Diŋ-zoŋ-la doluŋ le doŋo ne.

<sup>18</sup> Ama Juu tiŋŋaa kuhiasi-la si, ba-na bi laa dii ari baal-la fa nyulima ne aŋ leele nina ŋii, see di ba yire u nyimma ari u naaŋ. <sup>19</sup> Ŋii ne ba yire baal-la nyimma ari u naaŋ a pieseba, “Ma bie ne ŋlaa? Ma si, ma lulu duu nyulima nee? Ee ne u ŋaa a nina leele?” <sup>20</sup> Ŋii ne baal-la nyimma ari u naaŋ bul, “La jima ari la bie ne ŋla. La jima la lulu maa duu nyulima ne. <sup>21</sup> Ama la bi jiŋ u si ŋaa ŋii u siaa suri, la bira bi jiŋ nii-la ma si ŋaa u siaa suri. Má piesu, u waa ne. U titia jaŋ wuo bula pima.” <sup>22</sup> Baal-la nyimma ari u naaŋ faa fá Juu timma-la ne.

Ŋii ne tii ba bul ŋii. Juu timma-la fa si di nii-la kala si bula ari Yesu ne ŋaa Kirisito, nii-la Wia si liisa, ba jaŋ kiru ba Wii-chuoŋe dia ɛ. <sup>23</sup> U naaŋ ari u nyimma jiŋ ŋii ne a bul duu waa ne, di ba piesu.

<sup>24</sup> Ŋii ne Farisii timma-la bira yire baal-la ba si lulu duu nyulima a bul, “La jima ari baala deeŋ ŋaa haache tiina ne. Wia sipaaŋ bul wutitii pila.” <sup>25</sup> Baal-la si, “Mi-na bi jiŋ di baal-la ŋaa haache tiina koo u bi haache tiina ŋaa. Ama wii-la mi-na si jima ne ŋla: Mi fa nyulima ne, ama leele mi siao suro ne.” <sup>26</sup> Ŋii ne ba piesu a bul, “Ee ne u ŋaa a suri ŋ siao?” <sup>27</sup> Ŋii ne baal-la bula piba a bul, “Mi laa sipaaŋ bula pima ne, ka ma bi jegile. Bee ne tii ma bira chiche di ma nii? Ma ma saa che di ma mu ŋaa u haritooro ne?” <sup>28</sup> Ŋii ne ba tuusu woruŋ aŋ bul, “Ŋ ne ŋaa u haritooro, ama la-na ŋaa Moosis haritooro ne. <sup>29</sup> La jima ari Wia fa bul wiaa pi Moosis ne, ama baal-la deeŋ-na, la bi jiŋ u si lii lee-la kala.” <sup>30</sup> Ŋii ne baal-la bul, “Wu-kpuŋkperere ne ŋla. Ma bi jiŋ lee-la u si lia, ama u ne suri mi siao. <sup>31</sup> La jima ari Wia bi haache tiŋŋaa wu-buluŋ ka jegili. Uu jegili nialiŋ sii zilu ne aŋ pe ŋiŋaa wialiŋ u si cho. <sup>32</sup> Dunia si suomo, ma ha nia ari nuu ba si lula duu nyulima, di nuu suri u siao? <sup>33</sup> Di nii-la ne bi Wia teeŋ lia, u bi wiŋ deeŋ wuo ŋaa.” <sup>34</sup> Ŋii ne ba bula pi baal-la a bul, “Ba paala luluŋ di ŋ ŋaa haache tiina ne, ka ŋ ma saa che di ŋ dagela koo?” Ŋii ne ba kiru ta u lii Wii-chuoŋe dia-la ɛ.

*Nii-la si bi Wia Diŋ-zoŋ-la keŋe, u nyulima*

*nɛ.*

<sup>35</sup> Yesu si nia di ba kiri baal-la ta u lii Wii-chuoɛ dia-la tuoŋ, u mu cheu, a nau a piesu, “Ŋ laa Nuhuobiine Bie wiaa dii koo?” <sup>36</sup> Ŋii nɛ baal-la piesu, “Kubɛɛ nɛ ŋii? Dagemi tiina di mi laa u wiaa dii.” <sup>37</sup> Ŋii nɛ Yesu bula pu a bul, “Ŋ paala nau nɛ. U nɛ nii-la síi bul wiaa ŋ teeŋ ŋii.” <sup>38</sup> Ŋii nɛ baal-la tuu kpirimi Yesu sipaaŋ a chuolu aŋ bul, “Mi Tiina, mi laa ŋ wiaa dii nɛ.” <sup>39</sup> Ŋii nɛ Yesu bul, “Mi kɔ dunia di mi ŋaa di nialii si nyulima, di ba siaa suri nɛ, ka di mi ŋaa di nialii si si di ba siaa suro nɛ, di ba nyulimɛ.” <sup>40</sup> Farisii timma-la si chiiŋ dime a nii Yesu si bul ŋii, ba piesu a bul, “Ŋ biina la ma nyulima nɛɛ?” <sup>41</sup> Ŋii nɛ Yesu bula piba a bul, “Di ma nɛ fa nyulima a bi wutitii jiiŋ, ma fa bi wii-kala cheye. Ama lɛɛɛ ma si folo bul di maa na nɛ a jiiŋ wutitii ŋla, ŋii-na ma cheeriiŋ ha hema le nɛ.”

## 10

### *Yesu si u nɛ ŋaa pie-daari-zɔmun*

<sup>1</sup> Ŋii nɛ Yesu mage namaga a bul, “Wutitii nɛ mi bulaa pima, nii-la kala si bi boiŋniiiŋ to juu pie-dia, aŋ wule to kɛɛ juu, u tiina ŋaa gaaru nɛ. <sup>2</sup> Ama nii-la si to pie-dia boiŋniiiŋ juu, u nɛ ŋaa piese-la pie-daara. <sup>3</sup> Pie-dia bibenne yie suri pie-dia boiŋniiiŋ nɛ a pu. Piese-la ma jiiŋ u yiikoro. U yie yiyireba kubala kubala, a laa ba sipaaŋ a kɛŋba lii. <sup>4</sup> Di u nɛ kɛŋ u kiaa kala lii, u yie laa ba sipaaŋ nɛ, ka piesee tuto u hariŋ, bɛɛ wiaa ba jiiŋ u yiikoro nɛ. <sup>5</sup> Ba bi nuhuoru hariŋ ka to, ba jaŋ miira fá u hariŋ, bɛɛ wiaa ba

bi nuhuoru-la yiikoro jiiŋ.” <sup>6</sup> Yesu mage namaga deenŋ piba, ka ba bi wii-la u si bula piba bubuonŋ jiiŋ.

<sup>7</sup> Ńii ne Yesu bira bula piba a bul, “Wutitii ne mi bulaa pima, mi ne ŋaa pie-dia-la boiŋniinŋ. <sup>8</sup> Nialinŋ kala si laa sipaanŋ ko mi le a nyia wiaa bul di Wia ne tinba, ba kala ŋaa gaaraa ne, pie-se-la ma bi ba yiikoro le ka to. <sup>9</sup> Mi ne ŋaa boi-la, nii-la kala si tomi le juu, mi janŋ laau ta. Nialinŋ kala si jua, mi janŋ beŋba ari niaa sii beŋ piesee ŋii, a leŋ ba lii didii yanŋ anŋ miira kuu juu. <sup>10</sup> Gaara-na yie ko duu gaa a kpu ne koo duu chei kiaa, ama mi-na ko di niaa wuo keŋ miisinŋ, di ba tuonŋ tutore woruŋ bua-na kala le.” <sup>11</sup> Yesu bira bula, “Mi ne ŋaa pie-daari-zomuŋ. Pie-daari-zomuŋ yie jonŋ u miisinŋ yoo suuŋ ne u piesee wiaa. <sup>12</sup> Ama nii-la si bi piesee tii anŋ didaa, ka ba titimu, u ne yie na gunguro duu ko, u leŋ pie-se-la anŋ fá. Gunguro-la ku keŋe ba donsunŋ anŋ ŋaa donsunŋ piŋe. <sup>13</sup> U yie fá, beŋ wiaa u daa pie-se-la, ka ba titimu ne. U sipaa kala tuo pie-se-la le. <sup>14</sup> Mi ne ŋaa pie-daari-zomuŋ. Mi jiiŋ mi piesee, mi piesee ma jiiŋmi. <sup>15</sup> Ńii titia ne mi Nyimma jiiŋmi, mi ma jimu. Mi jonŋ mi miisinŋ yoo suuŋ, mi piesee wiaa. <sup>16</sup> Mi keŋ piesee donsunŋ maa, anŋ ka ba tuo piesee deenba tuonŋ. Mi janŋ keŋba kaa ko. Ba ma janŋ jiiŋ mi yiikoro a kala ŋaa ni-bala piesee, ba pie-daara ma ŋaa kubala. <sup>17</sup> Mi jonŋ mi miisinŋ ne yoo suuŋ mi piesee wiaa, ka di mi bira laa. Ńii ne tii mi Nyimma cho mi wiaa ŋii. <sup>18</sup> Nuu-kala dee bi janŋ wuo leŋ mi jonŋ mi miisinŋ yoo suuŋ, mi titia tuotoruŋ le ne. Mi keŋ doluŋ di mi jonŋ

mi miisiŋ a yoo suuŋ, a bira keŋ doluŋ di mi laa mi miisiŋ maa. Mi Nyimma ne pimi doluŋ deeŋ.”

<sup>19</sup> Yesu si bul wiaa deeŋba, Juu timma-la bira keŋ wiaa lileɛ. <sup>20</sup> Ba jesiŋ si di beɛ ne tii ba jijegili u wiaa, di jiŋsiŋ ne keɛnu u nyinyaase. <sup>21</sup> Ba doŋsuŋ ma bul di nii-la jisiŋ si keɛ bi wiaa deeŋba wuo bul. U bira bi nyulimaa ma siaa wuo suri.

### *Yesu bula ari u ne ŋaa Wia Bie*

<sup>22</sup> Ŋii ne Juu tiŋŋaa gbiele kubala yi di ba gbieli Jerusalem le. Bua deeŋ le ne ba liliisi ba si saa ba Wia dia dere a joŋo pi Wia. <sup>23</sup> U fa ŋaa waariŋ chene tuuŋ ne. Bua deeŋ le ne Yesu viveŋ zawura-la tuuŋ ba sii yire Solomouŋ zawura a he Wia dia-la le. <sup>24</sup> Ŋii ne Juu tiŋŋaa gbaaru a piesu a bul, “Eɛ ne ŋ jaŋ keŋla dieni mage ŋla aŋ-na bula pila nii-la ŋ si ŋaa? Di ŋ ne ŋaa Kirisito, nii-la Wia si liisa, chaasa bula pila.” <sup>25</sup> Ŋii ne Yesu bula piba a bul, “Mi laa sipaan bula pima ne, ka ma bi laa dii. Tiŋtimii-la mi sii tiŋ mi Nyimma doluŋ le dage nii-la mi si ŋaa ne. <sup>26</sup> Ama ma bi mi piesee ŋaa, ŋii ne tii ma bi mi wiaa laa dii. <sup>27</sup> Mi piesee jiŋ mi yiikoro ne, mi ma jiŋba, ba tuto mi hariŋ. <sup>28</sup> Ŋii ne mi piba miisi-la si bi dere, ba bi jaŋ ko di ba suba. Nu ma saa bi jaŋ wuo keŋba kaa laa mi nisiŋ le da. <sup>29</sup> Mi Nyimma-la si joŋba pimi, u ne kii kuŋ-kala. Nu ma kala saa bi jaŋ wuo keŋba kaa laa u nisiŋ le. <sup>30</sup> La di mi Nyimma kala ŋaa kubala ne.”



31 Yesu si bul ηii, Juu timma-la bira paa tabiaa di ba yagu. 32 ηii ne Yesu bula piba a bul, “Mi ηaa wu-zoηηoo yuge ne ma sipaan di ma na. Mi Nyimma ne pimi doluη mii ηaa. Ba kubee wiaa ne tii maa che di ma yagemi?” 33 Juu timma-la ma miira bul, “La bi che di la yagin a tiη η si ηaa wu-zomoo-la wiaa, ama η ηaa nuhuobiin ne aη keη η titia a kaa birime Wia, a tutuuse Wia joηηoo. ηii ne tii.” 34 ηii ne Yesu bula piba a bul, “Wia teniη tuoη seme doηo ba ηmuηsa a bul di la nage Wia ne. Wia bul wiin deeη pi nialiη ba si ηmuηse Wia teniη pa ne. 35 U ηaa wutitii ne, la bi jaη wuo via Wia teniη.” 36 ηii ne Yesu bul, “Wia si liisemi, a tiηmi mi ku tuu dunia, ee ne saa ma jaη bul di mii tuuse Wia joηηoo ne di mi ne bula bul di mi ηaa Wia Bii ne? 37 Di mi ne bi mi Nyimma tiηtiηηaa ka tiη, ma sί mi wiaa laa dii. 38 Ama di mi nί tiη mi Nyimma tiηtiηηaa, má laa mi wiaa dii a tiη tiηtimii-la mi sίi tiη wiaa, ari ma sί bi wialiη mi si bula pima laa dii kala. ηii le ne ma jaη wuo to jiη a laa dii ari mi Nyimma hemi le ne. Mi ma heu le.” 39 U si bul ηii, ba bira chiche di ba kenu, u fori ba nisiη le.

40 ηii ne Yesu bira miira mu kieli Joodaη fuoη, a mu lee-la Jooη fa sίi fo niaa Wii-chuoie liiη a he dime. 41 Niaa yuga a ko u teenη. Ba si di Jooη fa bi wu-magil kala ηaa, ama wialiη kala u fa si bula a tige baala deeη le ηaa wutitii ne. 42 Niaa fa yuga a laa u wiaa dii lee-la.

# 11

## *Lazōros sii suuŋ ɛ*

<sup>1-2</sup> Baal kubala nɛ fa hɛ taŋ kubala ɛ, taŋ-la yiriŋ nɛ Betani. Baal-la yiriŋ nɛ fa Lazōros. U dihaalaa Mɛeri ari Maata ma fa hɛ lee-la nɛ. Mɛeri deen nɛ bua kubala ɛ joŋ tulaali a bisa hɛ la Tiina Yesu naasiŋ ɛ, aŋ kɛŋ u nyu-punaa a tiikɛ. Ŋii nɛ Lazōros fa wiwiile. <sup>3</sup> U dihaalaa tiŋ ba mu bula pi Yesu a bul, “La Tiina, nii-la ŋ si cho ka wiilu nɛ.” <sup>4</sup> Yesu si nii wiin deen, u si, “Nyanyalin deen dee bi maga di Lazōros wiila suu, ama di Wia yiriŋ to ŋii ɛ nɛ a yirɛ, di mi ma Wia Bie yiriŋ to dime yirɛ.”

<sup>5</sup> Yesu fa cho Maata ari u ŋaana ari Lazōros nɛ kiŋkɛŋ. <sup>6</sup> U si nia di Lazōros ka wiilu lee-la u fa si hɛ, ŋii nɛ u bira chua dime tapulaa balia. <sup>7</sup> Ŋii hariŋ nɛ u bula pi u haritooroo a bul, “Má leŋ di la miira mu Judiya tiŋteenŋ.” Betani fa hɛ Judiya tiŋteenŋ ɛ nɛ. <sup>8</sup> Ŋii nɛ Yesu haritooroo bula pu a bul, “La kuhianŋ, Juu tiŋŋaa faa chɛ di ba paa tabiaa yagiŋ lee-la nɛ, u bi diene, aŋ ka ŋ biraa chɛ di ŋ mu dime ŋii?” <sup>9</sup> Ŋii nɛ Yesu mage namaga a dage ari u suuŋ bua ha bi yie. U si, “Tapuluŋ kɛŋ hawaba fii ari balia nɛ. Ŋii wiaa, di nuu ní veŋ wiihɛyɛ, u bi jaŋ gigere kiaa, bɛɛ wiaa lerinŋ pulla nɛ. <sup>10</sup> Ama di ŋ ní veŋ titaniŋ, ŋ yie gigere kiaa nɛ, bɛɛ wiaa pulumuŋ tuo.” <sup>11</sup> Ŋii nɛ Yesu bira bula pi u haritooroo a bul, “La naŋdɔŋɔ Lazōros piŋ doŋ nɛ, ama mi saa jaŋ mu chisu doŋ ɛ.” <sup>12</sup> Ŋii nɛ u haritooroo bula pu, “Di u nɛ piŋ doŋ, ŋii-na u jaŋ duori.” <sup>13</sup> Yesu si bul ŋii, u si ari Lazōros

suba ne, aŋ ka u haritooroo biine ari doŋ titia ne u sene piŋ. <sup>14</sup> Ŋii ne Yesu chaasa bula piba ari Lazoros suba ne. <sup>15</sup> Ŋii ne Yesu bul, “A tiŋ ma wiaa mi tuoŋ toro ari bua-la le Lazoros si suba mi tuo lee-la. Ŋii le ne ma jaŋ to a wuo laa mi wiaa dii. Má leŋ di la mu u teeŋ.” <sup>16</sup> Yesu haritooroo tuoŋ doŋo yiriŋ ne fa Tomas. Ba kenu yiyire daaliəriŋ ma ne, beɛ wiaa ba fa ŋaa daaliəriŋ ne. Ŋii ne u bula pi u doŋsuŋ tiŋŋaa a bul, “Má leŋ di la kala to Yesu hariŋ, duu ne ŋaa suu maa, di la kala suu.”

<sup>17</sup> Ŋii ne Yesu ari u haritooroo mu Betani. Ba si mu yi lee-la, niaa bula pu ari ba si hugi Lazoros, u tapulaa banese ne ŋla. <sup>18</sup> Betani ari Jerusalem fa ŋaa ari meel-daasiŋ balia ne. <sup>19</sup> Juu tiŋŋaa fa yuga a lii Jerusalem ko Betani di ba lolle Maata ari Mɛeri a tiŋ ba dibaala si suba wiaa. <sup>20</sup> Maata si nia ari Yesu faa ko ne, u sii lii duu chemu weniiŋ le, aŋ ka Mɛeri-na fa he dia le. <sup>21</sup> Ŋii ne Maata bula pi Yesu a bul, “Mi Tiina, di ŋ ne fa he daha, mi dibaala fa bi jaŋ suu. <sup>22</sup> Ari ŋii ma ha, mi jima ari ŋ ne sul Wia chiche kuŋ-kala, u jaŋ piŋ.” <sup>23</sup> Ŋii ne Yesu bula pu ari u dibaala jaŋ bira sii a keŋ miisiŋ. <sup>24</sup> Ŋii ne Maata bula pu, “Mi jima ari dunia che-deriiŋ u jaŋ sii suuŋ le, bua-la le nialiŋ kala si suba si jaŋ sii.” <sup>25</sup> Ŋii ne Yesu bula pu, “Mi ne ŋaa nii-la si jaŋ sii suuŋ le, a chise niaa suuŋ le di ba keŋ miisiŋ. Nuu-kala si laa mi wiaa dii, di ŋ suba maa, ŋ jaŋ sii a keŋ miisiŋ. <sup>26</sup> Nii-la ma kala si weye aŋ laa mi wiaa dii, u bi jaŋ ko duu suba. Ŋ laa wiŋ deeŋ dii koo?” <sup>27</sup> Ŋii ne Maata bul, “Oo, mi Tiina. Mi laa dii ari ŋ ne ŋaa Kirisito,

nii-la Wia si liisa, a ŋaa Wia Bie maa, nii-la si maga duu ko dunia deen̄.”

<sup>28</sup> Maata si bul wiaa deen̄ba d̄ere, u miira juu dia a luora yire u ŋaana M̄eri, a muŋso a bula pu a bul, “M̄eri, la kuhian̄ ko ne aa yirin̄.” <sup>29</sup> M̄eri si nii ŋii, u sii lima a lii duu chemu. <sup>30</sup> Bua-la le di Yesu ha bi taŋ-la tuon̄ jua, u ha he lee-la Maata si chemu ne. <sup>31</sup> Juu timma-la ari M̄eri fa si he dia le baa nyagu, ba na M̄eri duu sii lima. Ba si na ŋii, ba sii to u hariŋ, bee wiaa ba fa biina duu che duu mu yel ne lee-la ba fa si hugi u dibaala. <sup>32</sup> M̄eri si yi lee-la Yesu fa si he a nau, u tuu tel u naasiŋ le aŋ bul, “Mi Tiina, di ŋ ne fa he daha, mi dibaala fa bi jaŋ suu.” <sup>33</sup> Yesu si na M̄eri ari Juu timma-la s̄ii to u hariŋ ko di baa yel, u tuon̄ faasa chei. U yaraa ma faasa ven̄. <sup>34</sup> ŋii ne u pieŋeba a bul, “Nii le ne ma hugu?” Ba bula pu, “La Tiina, ku na lee-la.” <sup>35</sup> Ba si bul ŋii, Yesu yel. <sup>36</sup> ŋii ne Juu timma-la bul, “Má bee na u si chou ŋii.” <sup>37</sup> Doŋsuŋ ma pieŋe a bul, “Ka u ne suri nyulimaa siaa ŋii, u saa fa bi jaŋ wuo ŋaa di Laz̄oos sí suu?”

<sup>38</sup> Ba si bul ŋii, Yesu yaraa bira ven̄. ŋii ne ba mu yi bua-la lerin̄. Bua-la fa he buŋ le ne. Ba jon̄ tabiin̄ to niin̄. <sup>39</sup> ŋii ne Yesu bul di ba suri tabii-la bua-la niin̄. ŋii ne Maata, baal-la si suba dihaala doŋo, bula pu, “Mi Tiina, u si suba, u tapulaa banese ne jinin̄. ŋla uu suoru.” <sup>40</sup> ŋii ne Yesu bula pu a bul, “Mi bi bula piŋ ari ŋ ne laa mi wiaa dii, ŋ jaŋ na ŋii Wia si keŋ doluŋ?” <sup>41</sup> ŋii ne ba keŋ tabii-la suri. Yesu wula beŋ wia nyuŋ aŋ bul, “Mi Nyimma, mii

lolluŃ ari Ń si jegile nii mi teenŃ. <sup>42</sup> Mi jima ari ŃŃ jegili mi teenŃ nŃ bua-na kala Ɣ. Ama mi bul wiinŃ deenŃ a tiŃ nialiŃ si hŃ daha wiaa nŃ, di ba wuo laa dii ari Ń nŃ tiŃmi.” <sup>43</sup> Yesu si bul Ńii dŃrŃ, Ńii nŃ u faasa bul, “LazaroŃ, ku lii!” <sup>44</sup> U si bul Ńii, baal-la si suba sii ku lii. U si ku lii, geri-kosumoo nŃ fa voo u naasiŃ ari u nisaa kala. GeriŃ doŃo ma to u siaa. Ńii nŃ Yesu bula pi nialiŃ a bul, “Má kenu puro ta duu viiri.” Ba kenu puri.

*Ba vuura di ba kpu Yesu*

*Mat. 26.1-5; Maak 14.1-2; Luuk 22.1-2*

<sup>45</sup> Juu timma-la fa si ko di ba chuole MŃeri, a to u hariŃ mu a na wii-la Yesu si Ńaa, ba tuoŃ niaa yuga a laa u wiaa dii. <sup>46</sup> Ka doŃsuŃ ma miira mu bula pi Farisii tiŃŃaa wii-la Yesu si Ńaa. <sup>47</sup> Ńii nŃ Farisii timma-la ari nialiŃ si kpu pusuŃ pipi Wia kuhiasiŃ ari niaa doŃsuŃ hilimi a hono vuure a bul, “BŃ nŃ la jaŃ Ńaa? Má na wu-magila-la kala baala deenŃ sii Ńaa nŃ. <sup>48</sup> Di la nŃ leŃe duu ŃiŃaa wiaa deenba, nuu-kala jaŃ laa u wiaa dii. Ńii hariŃ Rom tiŃteenŃ niaa jaŃ ko a keŃ la Wia-dia ari la tiŃteenŃ kala kaa laa.” <sup>49</sup> Juu nihiasi-la tuoŃ doŃo nŃ ba faa yire Kayafas. Jina-la Ɣ u nŃ fa Ńaa nialiŃ si kpu pusuŃ pipi Wia kuhianŃ. Ńii nŃ u bul, “Ma bi wii jiŃ. <sup>50</sup> Ma bi jiŃ di ni-bala nŃ laa tiŃteenŃ niaa kala nyuŃ suu, u nŃ kpia la tiŃteenŃ niaa kala si suba, koo ma bi wiinŃ deenŃ jiŃ?” <sup>51</sup> U si bul Ńii, u bi naga u titia doluŃ Ɣ nŃ u bul Ńii, ama u si Ńaa nialiŃ si kpu pusuŃ pipi Wia kuhianŃ

jina-la, ŋii ne tii u wuo bul wiaa, Wia Diŋ-zoŋ-la doluŋ le, ari Yesu jaŋ laa tiŋteenŋ niaa kala nyuŋ suu, <sup>52</sup> tiŋteenŋ deenŋ niaa ma dunduŋa wiaa dee, ama duu wuo pe keŋe Wia biiri-la si pisa he leree doŋsuŋ maa a he doŋo le. <sup>53</sup> A chiŋ tapulii-la a kaa mu Juu tiŋŋaa kuhiasi-la vuure ŋii ba si jaŋ to kpu Yesu.

<sup>54</sup> Ŋii wiaa Yesu bira bi chaasaa goŋle kpilii Juu tiŋŋaa tuoŋ. U lii dime a mu lee kubala baa yire Efirim a kpage giri-bine tuoŋ. Ba di u haritooroŋ he dime.

<sup>55</sup> Bua-la le di Juu tiŋŋaa diisiŋ kielinŋ gbiele-la kpaga. Ŋii ne Juu tiŋŋaa yuga a lii ba jasiŋ le a mu Jerusalem, di ba piise ba disinniŋ ta, aŋ ka di gbiele-la-na yi. <sup>56</sup> Ŋii ne ba bee chiche Yesu gbiele-la tuoŋ. Ba si hoŋ Wia-dia tuoŋ, ŋii ne ba pipiese doŋo, “Ma biina u jaŋ ko gbiele-la koo, u bi jaŋ ko?” <sup>57</sup> Bua-la le, di nialiŋ si kpu pusuŋ pipi Wia kuhiasiŋ ari Farisii tiŋŋaa pa niinŋ, di nuu-kala ne jinŋ Yesu si he lee-la, duu dage, di ba wuo kenu.

## 12

*Mɛeri ŋaa nuuŋ tise Yesu naasiŋ*

*Mat. 26.6-13; Maak 14.3-9*

<sup>1</sup> Leele u ka tapulaa balidu ne, ka di Juu tiŋŋaa diisiŋ kielinŋ gbiele-la-na yi. Ŋii ne Yesu sii mu Betani, lee-la Lazoroŋ si he, baal-la u fa si chisa suuŋ le. <sup>2</sup> Ŋii ne u juu Lazoroŋ dia. Ba ŋaa kudiilee di ba huoru. Ŋii ne Lazoroŋ ari niaa doŋsuŋ pe Yesu le di ba dii kudiile-la. Maata ne fa keŋ kudiile-la goŋloŋ kpaa. <sup>3</sup> Ŋii ne Mɛeri joŋ nuuŋ ari loŋ. U suora sima. U yalliŋ

ma heye. Ńii ne u joŃo bisa he Yesu naasiŃ le, a keŃ u nyu-punaa kaa tiike. Nuu-la suora su dia-la kala. <sup>4</sup> Di Yesu haritooroo doŃo baa yire Judas Isikarot, duu fa he dime, nii-la fa si jaŃ joŃ Yesu yalle. Ńii ne u bul, <sup>5</sup> “Beε ne tii ba bi nuuŃ deeŃ joŃo yalle siidi bui balia, a joŃ moribie-la pi summoo?” <sup>6</sup> U si bul Ńii, u bi naga duu cho summo-la ne tii, ama u fa Ńaa gaaru ne. U ne faa kori ba moribiee a yie liliise moribie-la si he dime. <sup>7</sup> Ńii ne Yesu bula piba a bul, “Má leŃ haal-la. Má leŃ duu Ńaa Ńii a gberε tapulii-la ba si jaŃ hugimi. <sup>8</sup> Ma di summoo jaŃ he dime bua-na kala le. Ama la di ma bi jaŃ he dime deeŃ deeŃ.”

<sup>9</sup> Niaa yuga Juu timma-la tuoŃ a nii di Yesu he Betani le, a sii mu dime. Yesu duŃduŃa wiaa dee ba mu dime. Ba mua ka di ba pe na Lazoros, nii-la u fa si chisa suuŃ le ne. <sup>10</sup> Ńii ne nialiŃ si kpu pusuuŃ pipi Wia kuhiasiŃ vuure di ba kpu Lazoros maa. <sup>11</sup> A tiŃ Yesu si chise Lazoros suuŃ le wiaa Juu tiŃŃaa yuga a via ba nihiasiŃ niŃ, aŃ laa Yesu wiaa dii.

*Ba zil Yesu kaa juu Jerusalem*

*Mat. 21.1-11; Maak 11.1-11; Luuk 19.28-40*

<sup>12</sup> TaŃ si pula, ni-daŃ-la si ko diisiŃ kieliiŃ gbiele-la nii ari Yesu ka ko Jerusalem ne. <sup>13</sup> Ńii ne ba kala kaare abεe pipaariŃ a kaa mu di ba chemu, a faasa Ńaa goŃ a bubul, “Tabarikala. Wia jaŃ pe nii-la sii ko la Tiina Wia doluuŃ le. U ne Ńaa la Iziral tiŃŃaa kuoro.” <sup>14</sup> Ba sii Ńaa Ńii, Ńii ne Yesu na kaku-bie a hoŃ u nyuuŃ. Ba fa ŃmuŃse Ńii ne Wia teniiŃ tuoŃ a bul,

15 “Ma nialiq sí he Zaayonq le, ma sí fawullunq fá.

Ma kuoro ní ko ma teenq a jil kaku-bie.”

16 Yesu haritooroo fa bi wii-la bubuonq jin, ama Yesu si suba aq sii suunq le a laa yiriq nji, bua-la le ne ba liisi ari wialiq ba si nmunsa a tigeu le ne, ba sene naau le nji. 17 Ni-danq-la fa si he dime a na Yesu duu yire Lazoros u sii a lii suunq bua le, nji ne baa bul wii-la. 18 Ni-danq-la si nia ari Yesu naa wu-magiliq deenq, ba kala lii di ba chemu. 19 Nji ne Farisii timma-la bula pi donq a bul, “La bi wii-kala wuo ninaa. Má bee na, dunia niaa kala ní to u hariq nji.”

### *Yesu bul u suunq wiaa*

20 Nialiq si lii Giriis tinteenq donsunq ma fa he nialiq si mu Jerusalem di ba chuole Wia gbiele-la le tuonq ne. 21 Nji ne niaa deenba mu Filip teenq. Filip fa lii Betisaada ne, Galilii tinteenq. Ba bula pi Filip ari baa che di ba na Yesu ne. 22 Filip ma mu bula pi Anduru. Nji ne ba balia-la mu bula pi Yesu. 23 Nji ne Yesu bula piba a bul, “Bua-la leele kpaga ne di mina Nuhuobiine Bie laa yiriq. 24 Wutitii ne mi bulaa pima, di n ne jonq mii-biinq duu, u yie pua ne tinteenq, aq nyu, a he mii-biee yuge. Di n ne bi jonq duu tinteenq duu pua, u bi jaq kenq biee. 25 U si nage nji mii-biinq n si jonq duu le, nji titia ne u nage nuhuobiine ma le. Nii-la kala sii che duu laa u miisinq, u jaq via u miisinq ta, ama nii-la kala si via u miisinq ta dunia deenq le, u tiina jaq kenq miisi-la si bi dere. 26 Nii-la kala si cho duu tima pipimi, see tiina to mi hariq. Lee-la kala mi si he, u tiina ma jaq he dime. Di



nuu-kala ne tima pipimi, mi Nyimma jaŋ zil u tiina.

27-28 Lεεε mi tuoŋ bi di-bala pina. Bεε ne saa mi jaŋ bul? Mi saa bul di mi Nyimma sí leŋe di wialiq kala si jaŋ ŋaami le ŋaa koo? Ai, mi bi jaŋ wuo bul ŋii. Wiaa deenba si jaŋ ŋaami le wiaa ne tii mi ko dunia. Mi Nyimma, leŋ di niaa yire ŋ yiriŋ.” Ŋii ne nuu yiikoro lii wia nyuŋ a bul, “Mi paala laa yiriŋ ne. Mi saa jaŋ bira leŋ di niaa yire mi yiriŋ.” 29 Ni-daŋ-la si chiŋ dime a nii nii-la yiikoro, doŋsuŋ si di taŋ ne doŋo. Doŋsuŋ ma si di Wia tiŋdaaru ne bul wiaa pu. 30 Ŋii ne Yesu bula piba, “Ma wiaa ne tii yiikoro deen bul ŋii, mi wiaa dee. 31 Bua-la le Wia si jaŋ dii dunia niaa sariya yie ne. Bua deen le ne u ma jaŋ kiri Sitaani ta, nii-la si ŋaa dunia niaa kuoro. 32 Ama di ba ne kpaasemi daa-gεεε nyuŋ, mi jaŋ ŋaa di niaa kala ko mi teen.” 33 U si bul wiŋ deen, u bula dage suu-la yiri u si jaŋ suu ne. 34 Ŋii ne nialiq bul, “Ba dagela ari ba ŋmuŋε Wia teniq tuoŋ a bul di Kirisito, nii-la Wia si liisa, bi jaŋ suu, duu jaŋ he dime deen deen. Eε ne saa ŋ bul di ba jaŋ keŋ Nuhuobiine Bie a kpaase daa-gεεε nyuŋ? Kubεε ne saa Nuhuobiine Bie deen wiaa ŋ sí bul?” 35 Ŋii ne Yesu bula pi nialiq a bul, “Puluŋ-la si he ma teen, u bi jaŋ dieni. Puluŋ-la ha si he dime ŋii, má veŋ puluŋ-la le, di birimiŋ síma to. Nii-la sí veŋ birimiŋ tuoŋ bi jiŋ lee-la u sí mu. 36 Puluŋ-la si he ma teen ŋii, má laa u wiaa dii. Di ma ne ŋaa ŋii, ma ma jaŋ keŋ pulumuŋ a ma chaane.”

Yesu si bul wiaa deenba deεε, u lii a keŋ u

titia faa di ba síu na. <sup>37</sup> U si ŋaa wu-magila-la kala ba na, ari ŋii kala, ba ha bi u wiaa laa dii.

<sup>38</sup> Ba si bi u wiaa laa dii ŋii, ŋii leŋe wialiq nii-la fa síi bul wiaa, Wia Diŋ-zoŋ-la doluŋ ɛ baa yire Azaaya si bula ŋaa wutitii ne. U fa bula, “Nuu-kala bi wialiq la si bula piba laa dii.

Nuu-kala ma bi la Tiina Wia doluŋ na.”

<sup>39</sup> Ba sene bi Wia wiaa wuo laa dii. Ŋla ne Azaaya bira bul a tigeɓa ɛ. <sup>40</sup> U si,

“Wia to ba siaa ne  
aŋ nyire ba tuoŋ,

di ba siaa sí kuŋ-kala wuo na,

di ba sí wiaa bubuɔsaa ma wuo jiq.

Di ŋii dee, ba fa jaŋ ko Wia teen duu pulle  
ba tuoŋ, di ba birima tutou.”

<sup>41</sup> Azaaya fa na Kirisito fa si jaŋ keŋ doluŋ, ŋii ne tii u bul ŋii. <sup>42</sup> Ari ŋii ma kala Juu tiŋŋaa kuhiasiq yuga a laa Yesu wiaa dii, ama a tiŋ Farisii tiŋŋaa wiaa fawulluŋ fa keŋba. Ba bi wuo chaasa bul ari ba laa u wiaa dii, di ŋii dee, ba fa jaŋ kiriba Wii-chuoɛ dia ɛ. <sup>43</sup> Ba fa cho di niaa ne bibeseɓa ɛ a kii Wia si beɓeɓa ɛ.

<sup>44</sup> Ŋii ne Yesu faasa bul, “Nii-la kala si laa mi wiaa dii, u ma laa nii-la si tiŋmi wiaa dii ne. Mi duŋduŋa wiaa dee u laa dii. <sup>45</sup> Nii-la kala si nami, u ma na nii-la si tiŋmi ne. <sup>46</sup> Mi ku tuu dunia di mi ŋaa dunia pulumuŋ ne a chaane. Nii-la kala si laa mi wiaa dii bira bi jaŋ he birimiŋ tuoŋ. <sup>47</sup> Nii-la kala si nii mi wubulaa aŋ bi baa to, mi bi u tiina sariya ka dii, beɛ wiaa mi bi ko di mi dii dunia niaa sariya. Mi ko di mi laa dunia niaa ta ne. <sup>48</sup> Wialiq mi si bula pima ne jaŋ dii tiina si bi mi wiaa laa dii

sariya cheε-la dunia si jaŋ dεre. <sup>49</sup> Wialiq mi si bula, mi titia doluŋ ε dee mi bul. Mi Nyimma-la si tiŋmi, u titia ne dagemi wialiq mi sii bul. <sup>50</sup> Mi jima ari wialiq u sii dagu jaŋ pi nialiq sii toba miisi-la si bi dεre. Ŋii wiaa, wialiq kala mi sii bul ŋaa mi Nyimma ne dagemi.”

## 13

### *Yesu soŋ u haritooroo naasiŋ*

<sup>1</sup> Lεεε u ka tapulii kubala ne, ka di Juu tiŋŋaa diisiŋ kieliq gbiele-la yi. Bua deeŋ ε Yesu jiŋ ari u jaŋ leŋ dunia deeŋ aŋ mu u Nyimma teeŋ. U cho nialiq sii to u hariŋ ne dunia deeŋ ε. Bua deeŋ ε saa dage ari u cho u haritooroo ne a mu kieli. <sup>2</sup> Tapulii-la didaaniŋ Yesu ari u haritooroo hoŋ di ba dii kudiilee. Bua deeŋ ε di Sitaani ku juu Saamōŋ bie Judas Isikarōt duu joŋ Yesu yallε. <sup>3</sup> Yesu fa jima ari u ne lii Wia teeŋ ne. U si lii Wia teeŋ ŋii, u jaŋ bira miira mu u teeŋ. U bira jima ari u Nyimma fa joŋ kuŋ-kala doluŋ ne a he u nisiŋ ε. <sup>4</sup> Ŋii ne Yesu sii kudiile-la nyuŋ, a wuri u geri-baliŋ bil, aŋ joŋ pōpō vōō u tiŋa, <sup>5</sup> a ŋaa liiŋ he taasi-gbaŋa ε, a suomo susōŋ u haritooro-la naasiŋ a keŋ pōpō-la titiike. <sup>6</sup> U si ku yi Saamōŋ Piita ε, ŋii ne Piita piεsu a bul, “Mi Tiina, ŋŋ che di ŋ ne soŋ mi naasiŋ?” <sup>7</sup> Ŋii ne Yesu bula pu, “Bua deeŋ ε ŋ bi jiŋ wii-la mi sii ŋaa, ama u hariŋ ε ŋ jaŋ jiŋ u bubuōŋ.” <sup>8</sup> Ŋii ne Piita bira bula pu a bul, “Ŋ bi jaŋ soŋ mi-na naasiŋ da.” Ŋii ne Yesu ma bul, “Di mi ne bi ŋ naasiŋ somō, ŋ bira bi mi haritooru ŋaa.” <sup>9</sup> Ŋii ne Piita bira bul, “Mi

Tiina, di ɲii-na ne, sí mi naasiŋ duɲduɲa soŋ, soŋ mi nyuŋ ari mi nisaa maa.” <sup>10</sup> Ɔii ne Yesu bul, “Nii-la kala si fo liiŋ, u yaraa kala zomɔ ne, u saa bira bi maga duu fo liiŋ, [see duu soŋ u naasiŋ duɲduɲa.] Ma kala saa bi disinniŋ keɛɛ, ama ni-bala duɲduɲa ne keŋ disinniŋ ma tuɔŋ.” <sup>11</sup> Yesu paala jiŋ nii-la síi che duu joŋu yalle ne. Ɔii ne tii u bul di ba kala tuɔŋ dee bi pulla ɲii.

<sup>12</sup> Yesu si soŋ u haritooro-la naasiŋ dere, u bira joŋ u geriŋ laale a bira mu hoŋ u di-honuŋ, ɲii ne aŋ piɛɛba a bul, “Ma jiŋ wii-la mi si ɲaama le bubuɔŋ neɛ? <sup>13</sup> Ma keŋmi kaa yire ma kuhiaŋ ari ma Tiina. U saa keŋ wonɓiiŋ ne di ma yiremi ɲii, beɛ wiaa mi ne sene ɲii. <sup>14</sup> Mi si ɲaa ma Tiina ari ma kuhiaŋ aŋ soŋ ma naasiŋ, u maga di ma saa soŋ ma doŋsuŋ tiŋɲaa naasiŋ. <sup>15</sup> Mi laa sipaŋ ɲaama-na ne, di ma saa wuo ɲiŋaa ɲii doŋɔ le. <sup>16</sup> Wutitii ne mi bulaa pima, tiŋtinnu kala bi u kuhiaŋ kii, nii-la ma ba si tima, u ma bi nii-la si timu kii. <sup>17</sup> Ma leɛle si jiŋ wiaa deɛɲba ɲii, di ma níi ɲaaba, ma tuɔŋ jaŋ tɔre. <sup>18</sup> Ma kala dee mi bul ari ma tuɔŋ jaŋ tɔre. Mi jiŋ nialiŋ mi si liisa ne. Wii-la ba si ɲmuɲsa Wia teniŋ tuɔŋ sene jaŋ ɲaa wutitii. Ba bula ari la di nii-la kala si pe doŋɔ le dii kudiilee ne jaŋ miira gollimi le. <sup>19</sup> Mi bul wiŋ deɛɲ pipima ne, ka duu-na ɲaa, di ɲii ne sene ko duu ɲaa, ma jaŋ laa mi wiaa dii ari mi ne ɲaa Kiriŋito, nii-la wiaa ba si ɲmuɲsa. <sup>20</sup> Wutitii ne mi bulaa pima, nii-la kala si keŋ nii-la mi si tima woruŋ, u tiina keŋ mi ma woruŋ ne. Nii-la ma kala si keŋmi woruŋ, u tiina ma keŋ nii-la si

tiŋmi woruŋ ne.”

*Yesu bula ari ba jaŋ joŋu yalle.*

*Mat. 26.20-25; Maak 14.17-21; Luuk 22.21-23*

<sup>21</sup> Yesu si bul wiaa deenba dere, u tuon bi dibala pina. Ŋii ne u chaasa bul, “Wutitii ne mi bulaa pima, ma donɔ ne jaŋ joŋmi yalle.” <sup>22</sup> Ŋii ne u haritooro-la miira didaase donɔ. Ba bi jin tiina u sii dagu. <sup>23</sup> Yesu haritooro-la tuon nii-la u fa si cho ne fa hono kpagu. <sup>24</sup> Ŋii ne Saamon Piita loge u haritooro-la donɔ duu piese Yesu-na di kubee ne u didage? <sup>25</sup> Ŋii ne haritooro-la fa si kpage Yesu wasa suusa mu yi Yesu a piesu a bul, “Mi Tiina, kubee ne?” <sup>26</sup> Ŋii ne Yesu bul, “Mi si jaŋ joŋ boroboro yuu disin a pi nii-la, u ne nii.” Ŋii ne u joŋ boroboro-la a yuu disin a joŋo pi Judas, nii-la si naa Saamon Isikarot bie. <sup>27</sup> Judas si yia laa boroboro-la dere, Sitaani ku juu-u. Ŋii ne Yesu bula pu, “Wii-la ŋ sii che di ŋ naa, naau lima lima.” <sup>28</sup> Nialin donsun kala fa sii dii kudiile-la, ba bi jin wii-la kala u fa si bula bubuon. <sup>29</sup> Judas fa sii kori ba moribee nii, Yesu haritooro-la donsun fa biina ari Yesu faa che duu mu yoo kialin ba sii che di ba dii ne gbiele-la le, koo duu joŋ kuŋ ne a pi summoo. <sup>30</sup> Judas si laa boroboro-la dere, u guu sii a lii lima lima. Bua-la le titaŋ ne.

*Yesu bil nii-falii ne a pi niaa*

<sup>31</sup> Judas si lia, nii ne Yesu bul di niaa jaŋ na u-na Nuhuobiine Bie dolun si mage nii. Niaa ma jaŋ tou le ne a na nii Wia si keŋ dolun.

<sup>32</sup> Ŋii ne Yesu bira bul, “Mi si jaŋ dage Wia

doluŋ si mage ɲii, ɲii ne Wia ma jaŋ dage mi-na Nuhuobiine Bie doluŋ si mage ɲii. U jaŋ ɲaa ɲii lima. <sup>33</sup> Mi biiriŋ, mi bira bi jaŋ he ma teen dieni. Ma jaŋ bee chemi. Ama mi si bul ɲii a pi Juu tiŋɲaa, mi jaŋ bul ɲii a pima maa. Lee-la mi si jaŋ mu, ma bi jaŋ wuo mu dime. <sup>34</sup> ɲii-falii ne mi bilee pima. U ne ɲla: Ma jima ari mi choma ne woruŋ. Má cho doŋɔ ari mi si choma ɲii. <sup>35</sup> Di ma ne cho doŋɔ, ɲii le ne niaa kala jaŋ to jiŋ ari ma sene ɲaa mi haritooroo ne.”

*Yesu bula pi Piita ari u jaŋ bul u buu jiŋ*

*Mat. 26.31-35; Maak 14.27-31; Luuk 22.31-34*

<sup>36</sup> ɲii ne Saamɔŋ Piita piese Yesu a bul, “Mi Tiina, nii ne ɲ mumu?” ɲii ne Yesu ma bula pu a bul, “Lee-la mi si jaŋ mu, ɲ bi jaŋ wuo to mu, ama u hariŋ ne ɲ jaŋ wuo to.” <sup>37</sup> ɲii ne Piita bira piesu a bul, “Mi Tiina, bee ne tii mi bi jaŋ wuo to ɲ hariŋ leele? Mi paala ɲaa siri di mi joŋ mi miisiŋ yoo suuŋ ne ɲ wiaa.” <sup>38</sup> ɲii ne Yesu piesu a bul, “ɲ sene ɲaa siri di ɲ joŋ ɲ miisiŋ yoo suuŋ ne mi wiaa? Wutitii ne mi bulaa piŋ, ka di ji-bele-na yel, ɲ jaŋ bul naaŋsiŋ butori ari ɲ bimi jiŋ.”

## 14

*Yesu si u ne ɲaa wonbii-la síi mu Wia teen*

<sup>1</sup> ɲii ne Yesu si, “Ma sí leŋe di ma tuɔŋ vugime. Má laa Wia wiaa dii a laa mi ma wiaa dii. <sup>2</sup> Mi Nyimma jaŋ le diisiŋ yuga he dime. Di ɲii fa dee, mi bi jaŋ bula pima ari mi jaŋ mu

wase leriŋ a bilma le. <sup>3</sup> Di mi ne mua a wase lee-la bilma le dɛɛ, mi jaŋ bira ko a keŋma kaa mu mi teenj Wia-jaŋ le, di la kala he di-bala. <sup>4</sup> Lee-la ma mi si jaŋ mu, ma jii wonjiiŋ ne.” <sup>5</sup> Jii ne Tomas bula pu a bul, “La Tiina, la bi jii lee-la ŋ sii mu, ee ne la jaŋ wuo ŋaa jii u wonjiiŋ?” <sup>6</sup> Jii ne Yesu bula pu a bul, “Mi ne ŋaa wonjiiŋ aa mu Wia-jaŋ. Mi ne bira Wutitii Tiina maa, a biraa pi niaa ma miisiiŋ. Nu-kala bi mi Nyimma teenj wuo mu, see duu tomi le. <sup>7</sup> Di ma ne jiiŋmi, ma jii mi Nyimma ma ne. A lii jiniŋ saa ma paala jimu ne a nau maa.”

<sup>8</sup> Jii ne Filip bula pu a bul, “Mi Tiina, dagela la Nyimma, wii-la kala la sii che ne jii.” <sup>9</sup> Jii ne Yesu piɛsu a bul, “Filip, la di ŋ he dime a dieni jii, ka ŋ ha bimi jiiŋ? Nii-la kala si nami, u na mi Nyimma ma ne. Bee ne saa tii ŋ bul di mi dagema mi Nyimma? <sup>10</sup> J bi laa dii ari mi he mi Nyimma le ne, mi Nyimma ma hemi lee? Wialiiŋ kala mi si yie bulaa pima, mi titia doluuŋ le dee mii bul. Wialiiŋ ma mi sii ŋaa, mi Nyimma hemi le nii ŋaa jii. <sup>11</sup> Má laa dii ari mi he mi Nyimma le ne, mi Nyimma ma hemi le. Di ma ne bi jii wuo laa dii, má laa dii a tiŋ wialiiŋ mi sii ŋaa wiaa. <sup>12</sup> Wutitii ne mi bulaa pima, nii-la kala si laa mi wiaa dii, u jaŋ wuo ŋiŋaa wialiiŋ mi sii ŋaa. U jaŋ paala wuo ŋaa kii wialiiŋ mi sii ŋaa, bee wiaa mi jaŋ miira mu mi Nyimma teenj. <sup>13</sup> Kuŋ-na kala ma si piɛɛ chiche mi doluuŋ le, mi jaŋ joŋo pima. Mi jaŋ ŋaa jii di niaa wuo tomi le a na mi Nyimma si keŋ doluuŋ jii, a yire u yiriŋ. <sup>14</sup> Di ma nii che kuŋ-kala mi doluuŋ le, mi jaŋ ŋaa pima.”

*Yesu bula ari u jaŋ joŋ Wia Diŋ-zoŋ-la a he niaa le*

<sup>15</sup> Ŋii ne Yesu bira bul, “Di ma ne chomi, ma jaŋ tuto mi niŋ wiaa. <sup>16</sup> Di ma ní ŋaa ŋii, mi jaŋ sul mi Nyimma duu joŋ u Diŋ-zoŋ-la pima, duu pipema le. U jaŋ he ma teen a kaa mu wuu. <sup>17</sup> U jaŋ didage ma wutitii. Dunia niaa buu jiŋ. Ba bi jaŋ wuo nau, ŋii ne tii u bi jaŋ wuo heba le. Ama ma-na jimu ne. U he ma teen ne. U saa jaŋ hema le.

<sup>18</sup> Mi bi jaŋ leŋ ma dunduŋa ta, mi jaŋ miira ko ma teen. <sup>19</sup> U ka mua dunia niaa bira bi jaŋ nami, ama ma-na jaŋ nami. Mi si jaŋ keŋ miisiŋ ŋii, ma ma jaŋ keŋ miisiŋ. <sup>20</sup> Tapulii-la Wia si jaŋ joŋ u Diŋ-zoŋ-la hema le ne, ma jaŋ jiŋ ari mi he mi Nyimma le ne, ma ma hemi le, mi ma hema le. <sup>21</sup> Nii-la kala si nii mi niŋ wiaa aa toba, u tiina ne chomi. Mi Nyimma ma saa jaŋ cho nii-la si chomi. Mi ma jaŋ cho tiina a keŋ mi titia kaa dagu.” <sup>22</sup> Ŋii ne Judas bul (nii-la ba sí yire Isikarot dee), “Mi Tiina, ee ne ŋ jaŋ ŋaa a keŋ ŋ titia dagela, aŋ bi ŋ titia kaa dage dunia niaa?” <sup>23</sup> Ŋii ne Yesu bula pu a bul, “Nii-la kala si chomi, u jaŋ tuto mi niŋ wiaa. U si ŋaa ŋii, mi Nyimma ma jaŋ chou. La di mi Nyimma kala ma jaŋ ku heu le. <sup>24</sup> Nii-la si bimi cho, u bi mi niŋ wiaa ka to. Wialiiŋ ma si nii saa, mi titia dee bi bul. Ama mi Nyimma-la si tiŋmi ne dagemi mii bul.

<sup>25</sup> Mi ha he ma teen ne, ŋii ne mi bul wiaa deenba pipima. <sup>26</sup> Ama mi Nyimma jaŋ joŋ u Diŋ-zoŋ-la duu ku tuu a hema le mi doluŋ le. U jaŋ pema le a wuo dagema wii-kala, a leŋ di



ma liisi wialiq kala mi si bula pima. <sup>27</sup> Mi sí mu nii, mi jaŋ leŋ di ma hoŋ ari yarifiela di ma tuoŋ tore. Yarifiela-la mi si pima, u bi naga yarifiela-la dunia niaa si kene ne. Ma sí leŋe di ma tuobiinaa vugime, a bira sí leŋe di fawulluŋ ma keŋma. <sup>28</sup> Ma nia ari mi si bula pima ari mi jaŋ miira viiri aŋ bira miira ko ma teeŋ. Di ma ne fa chomi, ma tuoŋ fa jaŋ tore ari mi si mu mi Nyimma teeŋ, bee wiaa u ne keŋ doluŋ a kiimi. <sup>29</sup> Mi laa sipaŋ bul wiaa deenba pipima ne, ka di ba-na ŋaa, ma jaŋ laaba dii. <sup>30</sup> Mi bi jaŋ wuo bul wiaa ma teeŋ a dieni, bee wiaa dunia kuoro ka ko ne. U bi dol kala kene mi le. <sup>31</sup> Ama mii che di dunia niaa jiŋ ari mi cho mi Nyimma ne. Ŋii ne tii mi ŋiŋaa wialiq kala u si si di mi ŋaa. Má leŋ di la lii. Má sii.”

## 15

### *Yesu ne ŋaa tii-titii-la ba síi yire vaiŋ*

<sup>1</sup> Ŋii ne Yesu si, “Mi nage tia-la titia ba síi yire vaiŋ ne. Ama mi ne tii-titii-la. Mi Nyimma ma nage nii-la síi beŋ tia-la ne. <sup>2</sup> Naakel-la kala si mere tia-la le aŋ bi neŋ, u yie kere ta ne, naakel-la kala síi neŋ, u yie buoro ta ne, ka di u wuo faasa neŋ woruŋ. <sup>3</sup> Ma tuoŋ paala bira bi disinniŋ kene a tiŋ wialiq mi si bula pima. <sup>4</sup> Má meremi le di mi ma merema le. Tia naakelee dunđuŋa bi jaŋ wuo neŋ, see di ba mere tia geŋtine le. Ma ma bi jaŋ wuo tiŋ tiŋtiŋ-zoŋŋoo, see di ma meremi le.” <sup>5</sup> Ŋii ne Yesu bira bul, “Mi nage tia ne, ma ma nage tia-la naakelee. Nii-la kala si meremi le, mi ma mere tiina le. Ŋii ne jaŋ wuo ŋaa duu tiŋ tiŋtiŋ-zoŋŋoo woruŋ, a

tiŋ beɛ wiaa di ma ne bimi le mere, ma bi jaŋ wuo ŋaa wii-kala. <sup>6</sup> Di nuu ne bimi le mere, ba jaŋ joŋ tiina yuo ta, a nage ba si yie keru tia naakelee ta, ba hil. Ba paaba a yuo he nyiniŋ le ba dii ŋii. <sup>7</sup> Di ma meremi le, mi niŋ wiaa mi si bula pima jaŋ he ma tuoŋ. Di ma ne ŋaa ŋii, kuŋ-kala ma si piesemi chiche, mi jaŋ wuo ŋaa pima. <sup>8</sup> Di ma ne tiŋ tiŋtiŋ-zoŋŋoo woruŋ, ŋla ne mi Nyimma yiriŋ jaŋ yire. Ma jaŋ wuo dage ŋii ari ma ŋaa mi haritooroo ne. <sup>9</sup> Mi choma ari mi Nyimma si chomi ŋii ne. Ŋii wiaa, má meremi le di mi choma a kaa mu wuu. <sup>10</sup> Di ma ní to mi niŋ wiaa, mi jaŋ choma a kaa mu, ari mi sí to mi Nyimma niŋ wiaa a meru le u chomi ŋii. <sup>11</sup> Mi bul wiaa deŋba pima di ma wuo na tuoturu-la mi si joŋo pima. Ŋii ne ma tuoŋ jaŋ faasa tore woruŋ a mu dere.

<sup>12</sup> Mi choma ne woruŋ. Wii-la mi si bula pima di maa ŋaa ne ŋla: Má cho doŋo ari mi si choma ŋii. <sup>13</sup> Di nuu ne ŋaa siri duu joŋ u miisiŋ yoŋ suuŋ u naŋdoŋo wiaa, u chou ne woruŋ. Nuukala bi nii-la cho mage nia deŋ. <sup>14</sup> Di ma ní ŋaa wialiŋ mi sí bula pima di maa ŋaa, ma jaŋ ŋaa mi naŋdoŋsuŋ. <sup>15</sup> Mi bira bi jaŋ keŋma kaa yire mi tiŋtinnaa, beɛ wiaa tiŋtinna bi wii-la u kuhiaŋ sí ŋaa jiŋ. Ama mi-na bul wialiŋ kala mi Nyimma si bula pimi pima ne. Ŋii ne tii mi keŋmaa yire mi naŋdoŋsuŋ. <sup>16</sup> Ma dee bimi liisa, mi ne liisema. Mi liisema di ma mu faasa ŋaa wu-zoŋŋoo ne, wu-zomo-la si bi jaŋ lel. Di ma ní ŋaa ŋii, mi Nyimma jaŋ pima kuŋ-kala ma si piesu chiche mi doluŋ le. <sup>17</sup> Wii-la mi si bula pima di maa ŋaa ne ŋla: Má cho doŋo.

*Yesu bul ŋii dunia niaa si jaŋ beɛ ba di u haritooro*

<sup>18</sup> Di dunia niaa ne berema, ma jiŋ ari ba laa sipaaŋ beremi ne. <sup>19</sup> Di ma ne fa ŋaa dunia niaa, dunia niaa fa jaŋ choma woruŋ, ari ba si cho doŋo ŋii. Ma di dunia niaa bi kubala ŋaa. Mi liisema dunia niaa tuoŋ ne. Ŋii ne tii ba berema. <sup>20</sup> Mi laa sipaaŋ bula pima ari tiŋtinnu bi u kuhiaŋ kii. Má liisi wiŋ deeŋ. Ba si doŋisemi ŋii, ba jaŋ doŋisema ma ŋii. Di ba ne fa sei mi niŋ wiaa, ba fa jaŋ sei ma ma niŋ wiaa. <sup>21</sup> Ba jaŋ ŋaa wiaa deeŋba kala a tiŋ ma sí to mi hariŋ wiaa. Ba si bi nii-la si tiŋmi jiŋ ne tii baa ŋaa ŋii. <sup>22</sup> Di mi ne fa bi ku bul wiaa piba, ba si ŋaa wu-bomo-la kala, mi fa bi jaŋ wuo bul di ba chei wii-kala. Ama mi si folo ku bul wiaa piba, ba bira bi jaŋ wuo bul ari ba bi wii-kala cheye. <sup>23</sup> Nii-la si beremi, tiina bere mi Nyimma ma ne. <sup>24</sup> Wialŋ kala mi si ŋaa, nuu-kala biba ŋaa. Di mi ne fa biba ŋaa di ba na, ba fa bi jaŋ chei wii-kala. Ama ba naba kala ne aŋ ha bere la di mi Nyimma kala. <sup>25</sup> Ba si beremi ŋii, wialŋ kala ba si ŋmuŋsa Wia tenŋ tuoŋ sene ŋaa. Ŋla ne ba ŋmuŋse, 'Mi bi wii-kala ŋaa chei, ka ba beremi.' <sup>26</sup> Ama mi jaŋ leŋ di Wia Diŋ-zoŋ-la lii mi Nyimma teen a ku tuu hema le. U jaŋ pema le a dagema wutitii. U ne jaŋ bul mi wiaa pima. <sup>27</sup> Ma ma jaŋ bul mi wiaa pi niaa, beɛ wiaa mi si suomo didage niaa, la di ma kala ní to doŋo.

## 16

<sup>1</sup> Mi bul wiaa deeŋba kala pipima di ma sí

hariŋ miiru ne. <sup>2</sup> Bua-la jaŋ yi di Juu tiŋŋaa kirima ta Wii-chuoŋe diisiŋ le. Bua ma doŋ jaŋ yi di niaa kpuma aŋ biine di baa to Wia woŋbiŋ ne ŋii. <sup>3</sup> Ba jaŋ ŋaa wiaa deenba kala a tiŋ ba sí bi mi Nyimma jiŋ, a bimi ma jiŋ. <sup>4</sup> Mi bul wiaa deenba kala pipima di bua-la ne ku yi di wiaa deenba ŋiŋaa, ma jaŋ liisi ari mi bula pima.

### *Wia Diŋ-zoŋ-la tiŋtiŋaa*

La di ma kala fa sí to doŋo, ŋii ne tii mi bi wiaa deenba bula pima faafaa. <sup>5</sup> Ama leele mii mu nii-la si tiŋmi ne, aŋ ka ma kuŋ-kala ha bi mi piesa a bul di nii ne mii mu? <sup>6</sup> Mi si bul wiaa deenba pima leele ŋla, ma tuoŋ cheye ne. <sup>7</sup> Ama wutitii ne mi bulaa pima ŋla. Mi sí mu ŋii, u jaŋ zoŋo pima. Di mi ne bi mua, Wia Diŋ-zoŋ-la si jaŋ ko a pema le bi jaŋ ko. Ama di mi ne mua, mi jaŋ leŋ duu ko. <sup>8</sup> Duu ne saa ko, u jaŋ leŋ di dunia niaa jiŋ ari ba ŋaa haacheba ne. U jaŋ bira dageba ŋii ba si jaŋ to a keŋ tuo-pula Wia sipaaŋ, a bira dageba ari Wia jaŋ dii ba sariya. <sup>9</sup> Ba jaŋ jiŋ ari ba si bi mi wiaa laa dii, u ŋii ŋaa haache ne. <sup>10</sup> Mi si miira mu mi Nyimma teen ŋii, ma bira bi jaŋ nami. U ŋii ma jaŋ dage ari mi keŋ tuo-pula ne Wia sipaaŋ. <sup>11</sup> Wia si folo dii dunia kuoro Sitaani sariya ŋii, ba ma jaŋ jiŋ ari Wia ma jaŋ dii ba sariya.

<sup>12</sup> Wiaa yuga ne mi ha keŋ di mi bula pima, ama ma biba wuo nyalime. <sup>13</sup> Ama di Wia Diŋ-zoŋ-la ne ko, u jaŋ dagema wutitii kala. U bi jaŋ bubul wiaa u titia doluŋ le, ama wialiŋ kala u si nii mi Nyimma niŋ le ne u jaŋ bul. U ma jaŋ dagema wialiŋ kala si jaŋ ŋaa. <sup>14</sup> U jaŋ leŋ

di niaa yire mi yiriŋ, bæe wiaa wialiŋ kala mi si kene mi bul, u jaŋ kaa ku bula pima. <sup>15</sup> Ku-la kala mi Nyimma si kene ŋaa mi kuŋ ne. Ŋii ne tii mi bula pima ari wialiŋ kala mi si kene mi bul, Wia Diŋ-zoŋ-la jaŋ kaa ku bula pima.”

*Yesu bula pi u haritooroo ari ba tuoŋ jaŋ tore*

<sup>16</sup> Ŋii ne Yesu bira bula piba a bul, “Ma bira bi jaŋ nami. Tapulaa baŋmene cheeŋ ne ma jaŋ bira nami.” <sup>17</sup> Ŋii ne u haritooroo doŋsuŋ pipiese doŋo a bul, “Wiin deeŋ bubuoŋ ne bæe? U bula pila ari tapulaa baŋmene la bi jaŋ nau, di tapulaa baŋmene cheeŋ ne la bira jaŋ nau. U bira bula ari u si jaŋ mu u Nyimma teen ne tii la bira bi jaŋ nau. <sup>18</sup> U si yie bul di tapulaa baŋmene deeŋ, u bubuoŋ ne bæe? La bi u bubuoŋ jiŋ.” <sup>19</sup> Yesu jima ari baa che di ba piesu ne. Ŋii ne u bula piba, “Mi si si tapulaa baŋmene ma bi jaŋ nami, di tapulaa ma baŋmene cheeŋ ma jaŋ bira nami, ŋii wiaa ne ma pipiese doŋo? <sup>20</sup> Wutitii ne mi bulaa pima, ma jaŋ ŋmuŋmoo niŋ kala, di dunia niaa tuoŋ tore, ma tuoŋ jaŋ chei, ama ma tuo-chei-la jaŋ miira birime tuotoŋ. <sup>21</sup> Di haala luoroŋ ní wii duu che u lul, u yie tuune niŋ ne. U heeŋ yie ne. Duu ne saa ku lul bile dere, u yu u hee-la kala le. U si lul bie ne tii u tuoŋ yie tore. <sup>22</sup> Ŋii ne saa u jaŋ nagemma ma le. Leele ma tuune niŋ ne, ama mi jaŋ bira nama di ma tuoŋ kala tore. Bua-la le nuu-kala bi jaŋ wuo ŋaa di ma tuoŋ bira chei. <sup>23</sup> Di tapulii-la ne yie, ma bi jaŋ piesemi chiche kuŋ-kala. Wutitii ne mi bulaa pima, mi Nyimma jaŋ pima kuŋ-kala ma

si piɛsu chiche mi doluŋ ɛ. <sup>24</sup> Lɛɛɛ ɲla ma ha bi kuŋ-kala piɛsu chiche mi doluŋ ɛ. Ŋii wiaa má saa piɛsu, u jaŋ joŋo pima, di ma tuɔŋ faasa toɾɛ a mu dɛɾɛ.

<sup>25</sup> Wiaa deenba kala mi síi bul, namagaba nɛ mii mage. Ama bua kubala jaŋ yi, mi bira bi jaŋ mage namagaba, mi jaŋ chaasa bul wiaa pima a mu tige mi Nyimma ɛ, di ma jiŋ ba bubuɔsaa woruŋ. <sup>26</sup> Di tapulii-la nɛ yie, ma nɛ jaŋ piɛsu chiche kiaa mi doluŋ ɛ. Mi bi si mi nɛ jaŋ sula pima, <sup>27</sup> bɛɛ wiaa mi Nyimma titia ma choma nɛ. Ma chomi nɛ a laa mi wiaa dii ari mi lii u teen nɛ. Ŋii nɛ tii u ma choma. <sup>28</sup> Mi lii mi Nyimma teen nɛ a ku tuu dunia. Lɛɛɛ mi saa jaŋ leŋ dunia aŋ miira mu mi Nyimma teen.”

<sup>29</sup> Ŋii nɛ u haritooro-la bula pu a bul, “Lɛɛɛ ɲ chaasaa bul wiaa nɛ. Ŋ bira bi namagaba ka mage. <sup>30</sup> Lɛɛɛ la jima di ɲ jiŋ wii-wii-kala nɛ, ɲ bí che di nuu-kala piɛsiŋ wii-kala. Wiin deŋ nɛ ɲaa di la jiŋ ari ɲ lii Wia teen nɛ.” <sup>31</sup> Ŋii nɛ Yesu piɛsɛba, “Lɛɛɛ saa ma laa mi wiaa dii nɛɛ? <sup>32</sup> Bua-la jaŋ yi, u saa paala yi ma nɛ, ma kala jaŋ piɛɛ a mu ma diisiŋ, aŋ ka mi duŋduŋa. Ama saa, mi bi jaŋ ɲaa mi duŋduŋ. Mi Nyimma hɛmi ɛ nɛ. <sup>33</sup> Mi bul wiaa deenba pima di ma wuo hoŋ ari yarifiɛlaa nɛ. Dunia deŋ tuɔŋ ma jaŋ na hɛɛŋ. Ama má leŋ di ma nyuŋ nyaase. Mi yuo dii dunia nɛ.”

## 17

### *Yesu chuɔɛ Wia pi u haritooroo*

<sup>1</sup> Yesu si bul wiaa deenba dɛɾɛ, u wula beŋ wia nyuŋ aŋ bul, “Mi Nyimma, bua-la yie nɛ.

Leŋ di mi-na ŋ Bie laa yiriŋ, di mi ma leŋ di ŋ yiriŋ yire. <sup>2</sup> ŋ ne joŋ doluŋ pimi di mi biben nuhuobiinee kala, a joŋ miisi-la si bi dɛɛ a pi nialiŋ kala ŋ si liisa pimi. <sup>3</sup> Nialiŋ si jima ari ŋ ne sene ŋaa Wia, Wia bira tuo, aŋ pɛ jiŋ mi-na Yesu Kirisito, nii-la ma ŋ si tima, ba ne keŋ miisi-la si bi dɛɛ. <sup>4</sup> Mi leŋe ŋ laa yiriŋ ne tiŋteen deŋ ɛ. Mi tiŋ tiŋtimii-la dɛɛ ne, tiŋtimii-la ŋ si joŋo pimi di mi tiŋ. <sup>5</sup> Oo, mi Nyimma, leŋ di mi yiriŋ yire ŋ sipaŋ lɛɛɛ, yiri-la la di ŋ kala fa si laa, aŋ ka ŋ-na suomo ŋaa dunia.

<sup>6</sup> Mi leŋe nialiŋ ŋ si liisa pimi dunia niaa tuŋ jimiŋ ne. Ba fa ŋaa ŋ kiaa ne, ŋ ne liiseba pimi. Ba ne sei ŋ niŋ wiaa. <sup>7</sup> Lɛɛɛ ba jima ari wii-kala mi si ŋaa, mi ŋaa ŋ doluŋ ɛ ne. <sup>8</sup> Mi bul ŋ niŋ wialiŋ ŋ si bula pimi piba ne. Ba laa dii a jiŋ ari wutitii ne, mi sene lii ŋ teen ne. Ba ma laa dii ari ŋ ne tiŋmi. <sup>9</sup> Mi suluŋ pipiba ne. Mi biŋ sula pipi dunia niaa, see nialiŋ ŋ si liisa pimi dunɔɔ. Ba ne ŋaa ŋ kiaa. <sup>10</sup> Nialiŋ kala mi si kene ŋaa ŋ niaa ne. Nialiŋ kala ŋ ma si kene ŋaa mi ma niaa ne. Ba ne leŋe mi laa yiriŋ. <sup>11</sup> Lɛɛɛ mii kɔ ŋ teen ne, mi bira bi jaŋ he dunia ɛ, ama ba-na jaŋ he dunia ɛ. Mi Nyimma, ŋ ne ŋaa nii-la si bi disinniŋ kene. Beŋ nialiŋ ŋ si liisa pimi woruŋ ŋ doluŋ ɛ, a leŋ di ba ŋaa kubala, ari la di ŋ kala si ŋaa kubala ŋii. <sup>12</sup> Mi fa si he ba teen, mi beŋ ba nyuŋ ne woruŋ ŋ doluŋ ɛ, dol-la ŋ si joŋo pimi ne mi kaa beŋba. Mi si ŋaa ŋii, ba kubala ma bi leɛ, see nii-la si maga duu lel, di wialiŋ ba fa si ŋmuŋsa Wia teniŋ tuŋ sene ŋaa. <sup>13</sup> Lɛɛɛ saa mii kɔ ŋ teen

ne. Mi ha si he dunia le nii, nii ne mi bul wiaa deenba piba di ba tuon faasa tore, ari mi tuon si tore nii. <sup>14</sup> Mi bul η niin wiaa piba ne. Ba di dunia niaa bi kubala ηaa, ari la di dunia niaa si bi kubala ηaa nii. Ŋii ne tii dunia niaa bereba. <sup>15</sup> Mi bi si di η liiseba dunia le, ama mi si di η poba ne a liiseba Sitaani nisin le. <sup>16</sup> Ba di dunia niaa bi kubala ηaa, ari la di dunia niaa si bi kubala ηaa nii. <sup>17</sup> Ŋ niin wiaa ηaa wutitiiba ne. Dageba, di ba bira si disinnin ken. <sup>18</sup> Ŋ ne tinmi dunia niaa teen. Ŋ si tinmi nii, nii titia ne mi ma tinba dunia niaa teen. <sup>19</sup> Mi jon mi miisin ne a yoo suun ba wiaa. Mi ηaa nii di ba ma ηaa siri di ba jon ba miisin yoo suun wutitii wiaa ne.

<sup>20</sup> Mi bin sula pipiba dunɗun, mi pe sula pi nialin si laa mi wiaa dii a tin ba si bul mi wiaa piba le ne. <sup>21</sup> Mii sulun nii di ba kala wuo ηaa kubala ne. Ŋ hemi le ne. Mi ma hen le. Len di ba kala ma wuo hela le. Di η ne ηaa nii, dunia niaa jan wuo laa dii ari η ne tinmi. <sup>22</sup> Ŋ si len mi laa yirin nii, nii ne mi ma len ba laa yirin. Mi ηaa nii di ba kala wuo ηaa kubala ne, ari la di η kala si ηaa kubala nii. <sup>23</sup> Mi heba le ne, η ma hemi le. La he dono le nii di ba wuo ηaa kubala ne. Ŋii ne dunia niaa jan jin ari η ne tinmi. Ba ma jan jin ari η choba ne ari η si chomi nii. <sup>24</sup> Mi Nyimma, η paala chomi ne a len mi laa yirin, ka dunia-na suomi. Mi saa che di η len di nialin η si liisa pimi, di ba he mi teen lee-na kala mi si jan he, di ba wuo na nii η si leje mi laa yirin. <sup>25</sup> Mi Nyimma, η ken wutitii. Dunia niaa bin jin, ama mi-na jimini ne. Niaa



deenba ma jing ari ŋ ne tingmi. <sup>26</sup> Mi saa ŋaa ba jimiŋ ne, mi saa ha jaŋ leŋ di ba jimiŋ. Mi ŋaa ŋii, di ŋii ŋ si chomi, di ba ma cho doŋo, di mi ma heba le.”

## 18

*Ba keŋ Yesu*

*Mat. 26.47-56; Maak 14.43-50; Luuk 22.47-53*

<sup>1</sup> Yesu si bul wiaa deenba dεε, ba duu haritooroo sii kieli fuo-naaŋ kubala ba kaa yire Kidiroŋ. Lee kubala ne fa he dime ba choŋse tiisiŋ. Ŋii ne Yesu ari u haritooroo juu lee-la. <sup>2</sup> Ba venεε mu lee-la ne, ŋii ne tii Judas, nii-la si joŋu yalle, ma wuo jing dime. <sup>3</sup> Ŋii ne Judas keŋ laali-yuoroo doŋsuŋ ari nialiŋ si kpu pusuŋ pipi Wia kuhiasiŋ tinginni-biisiŋ, ari Farisii tingaa tinginni-biisiŋ, di ba mu keŋ Yesu. Ba mu lee-la Yesu si he. Ba sii mu ŋii, ba kori chaanaa, ka-pilaa ari nyiniŋ ari ba ba-kiaa. <sup>4</sup> Yesu jing wiila kala fa si jaŋ ŋaau le ne. Ŋii ne u mu cheŋba a pieεba, “Kubεε ne maa cheε?” <sup>5</sup> Ŋii ne ba si, “Yesu si lii Nazaret ne la chicheε.” Ŋii ne u bula piba, “Mi ne ŋla.” Judas, nii-la fa si jaŋ joŋu yalle, u ma fa he ba tuoŋ ne. <sup>6</sup> Yesu si bul ŋii, ba miira yala mu hariŋ a tuu tel. <sup>7</sup> Ŋii ne Yesu bira pieεba a bul, “Kubεε ne maa cheε?” Ba si, “Yesu si lii Nazaret.” <sup>8</sup> Ŋii ne Yesu bula piba, “Mi laa sipaaŋ bula pima ari mi ne ŋla. Di ma nii chemi, má leŋ di ni-kaanaa viiri.” <sup>9</sup> (U bul ŋii di wii-la u fa si bula, duu wuo sene ŋaa wutitii. U fa bula ari nialiŋ kala Wia si liisa pu, ba kuŋ-kala bi lele.) <sup>10</sup> Saamoŋ Piita fa kori

tokobii nε. Ŋii nε u tuure a ta nialin si kpu pusun pipi Wia kuhian dia-yomo na-diiŋ digilin a keru. Yomo-la yirin nε fa Malikas. <sup>11</sup> Ŋii nε Yesu bula pi Piita a bul, “Joŋ η tokobii-la hε u pεeŋ le. U bi maga di mi na hεε-la, mi Nyimma sii che di mi na, koo?”

*Ba keŋ Yesu kaa mu Anas sipaan*

<sup>12</sup> Ŋii nε laali-yuoroo ari ba kuhian ari Juu tinŋaa titinni-biisi-la keŋ Yesu a vobu. <sup>13</sup> Ba laa sipaan kenu kaa mu Anas teen nε. Anas nε fa ŋaa Kayafas hiili-baala. Jina-la Kayafas ma nε fa ŋaa nialin si kpu pusun pipi Wia kuhian. <sup>14</sup> Kayafas nε fa laa sipaan bula pi Juu tinŋaa ari ni-bala nε laa tinŋeen niaa kala nyun suu, u nε kpia ni-dan si suba.

*Piita si u bi Yesu jin*

*Mat. 26.69-70; Maak 14.66-68; Luuk 22.55-57*

<sup>15</sup> Saamŋ Piita ari Yesu haritooroo doŋo to Yesu hariŋ, a juu nialin si kpu pusun pipi Wia kuhian kaala. Kuhian-la fa jin Yesu haritooro deen nε. Ŋii wiaa haritooru-la to Yesu hariŋ a juu kaala-la tuŋ. <sup>16</sup> Ka Piita chin kaala-la jeen hariŋ boinŋin. Ŋii nε Yesu haritooro-la doŋo, nii-la nialin si kpu pusun pipi Wia kuhian si jima, u miira lii, a bula pi toli-bie kubala si po boinŋ-la niin duu leŋ di Piita ku juu, aŋ keŋ Piita ku juu. <sup>17</sup> Ŋii nε tolo-la si chin boi-la niin piesε Piita, “Ŋ ma bi baal-la haritooroo doŋo ŋaa?” Ŋii nε Piita si, “Ai, mi dee.” <sup>18</sup> Di waariŋ fa hε dime. Ŋii nε dia-la tinŋinnaa ari nialin si kpu pusun pipi Wia kuhian tinŋinni-biisiŋ hε

nyiniŋ a china golli aa wieni. Piita ma mu chinŋ ba teenŋ aa wieni nyiŋ-la.

*Yesu bul u suuŋ wiaa*

*Mat. 26.59-66; Maak 14.55-64; Luuk 22.66-71*

<sup>19</sup> Ŋii ne nialiŋ si kpu pusunŋ pipi Wia kuhianŋ piɛɛ Yesu wiaa a tige u haritooroo le ari wialiŋ u fa sii dagu. <sup>20</sup> Ŋii ne Yesu bul, “Wialiŋ kala mi si bula, mi yie chinŋ ni-danŋ tuonŋ ne a bul. Mi yie chaasa chinŋ Wii-chuoɛ diisiŋ tuonŋ ne ari Wia-dia tuonŋ, lee-la Juu tinŋaa kala si yie ku hilimi ne a bul. Mi ha bi wii-kala luora bul. <sup>21</sup> Bɛɛ ne saa tii ŋ piɛɛmi? Piɛɛ nialiŋ si nii wialiŋ mi si bula, di ba dagiŋ. Ba jinŋ wialiŋ mi si bula ne.” <sup>22</sup> Yesu si bul ŋii, nialiŋ si kpu pusunŋ pipi Wia tintinni-bie donŋo fallɛ Yesu chanŋkpaŋinŋ le aŋ bul, “Ŋla ne u mage di ŋ bul wiaa nialiŋ si kpu pusunŋ pipi Wia kuhianŋ teenŋ koo?” <sup>23</sup> Ŋii ne Yesu bul, “Di mi ne bul wii chei, u maga di ŋ bul di nuu-kala nii ne. Ka di wii-la mi si bula ne ŋaa wutitii, bɛɛ ne tii ŋ fallɛmi?” <sup>24</sup> Ba si voo Yesu ŋii, ŋii ne Anas leŋ ba kɛnu ŋii kaa mu nii-la si kpu pusunŋ pipi Wia kuhianŋ Kayafas teenŋ.

*Piita bira bula ari u bi Yesu jinŋ*

*Mat. 26.71-75; Maak 14.69-72; Luuk 22.58-62*

<sup>25</sup> Ka Piita ha chinŋ kaala-la tuonŋ aa wieni nyiŋ-la. Ŋii ne nialiŋ donsunŋ piɛsu a bul, “Ŋ ma bi baala deenŋ haritooroo donŋo ŋaa?” Piita kaa via aŋ bul, “Ai, mi dee.” <sup>26</sup> Ŋii ne nialiŋ si kpu pusunŋ pipi Wia kuhianŋ dia tintinnaa donŋo ma pɛu le. U fa ŋaa nii-la Piita si ta u digilinŋ keri, u naanbii ne. U piɛsu a bul, “Mi fa bi ma

di baal-la na, lee-la ba si choŋse tiisiŋŋ?” <sup>27</sup> Ŋii ne Piita bira kaa via aŋ bul di ai, u dee. U bul ŋii dεre di ji-bele ye.

*Ba keŋ Yesu kaa mu Paalit teenŋ*

*Mat. 27.1-2, 11-14; Maak 15.1-5; Luuk 23.1-5*

<sup>28</sup> Chichuo-fiela felele ba keŋ Yesu lii Kayafas dia le, a kenu kaa mu baal kubala dia baa yire Paalit. Paalit ne fa hoŋ Rom kuori-baliŋ nyuŋ lee-la. Juu tiŋŋaa bi to juu. Ba bi che di ba ŋaa disinniŋ a chei ba kisiŋ le, aŋ wuo dii diisiŋ kieliiŋ gbiele kudiilee. <sup>29</sup> Ŋii ne Paalit lii a pieseba a bul, “Bεε ne ma si baala deenŋ ŋaa chei?” <sup>30</sup> Ŋii ne ba bula pu a bul, “Di u ne fa bi wii ŋaa chei, la fa bi jaŋ kenu kaa ko η teenŋ.” <sup>31</sup> Ŋii ne Paalit bula piba a bul, “Má kenu kaa mu to ma titia woŋbiinŋ le a dii u sariya.” Ŋii ne ba bula pu a bul, “La bi woŋbiinŋ kene di la kpu nuu-kala.” <sup>32</sup> Yesu fa si daga ari u jaŋ suu daa-gεseε nyuŋ, u ŋii sene ŋaa wutitii. <sup>33</sup> Ŋii ne Paalit miira juu dia a yire Yesu a piesu, “Ŋ ne ŋaa Juu tiŋŋaa kuoroo?” <sup>34</sup> Ŋii ne Yesu piesu, “Ŋ titia ne bul wiinŋ deenŋ koo nuu ne bul ŋii piŋ a tigemi le?” <sup>35</sup> Ŋii ne Paalit bira bul, “Mi bi Juu tiina ŋaa. Ŋ titia nia ari nialiŋ si kpu pusuŋ pipi Wia kuhiasiŋ ne joŋuŋ he mi nisiŋ le. Bεε ne η ŋaa chei?” <sup>36</sup> Ŋii ne Yesu bul, “Mi kuoruŋ tuo dunia deenŋ le, di mi kuoruŋ ne fa he dunia deenŋ le, mi niaa fa jaŋ yuo laami, di Juu tiŋŋaa sími wuo keŋ. Ama mi kuoruŋ tuo daha.” <sup>37</sup> Ŋii ne Paalit piesu a bul, “Ŋ saa ŋaa kuoru ne koo?” Ŋii ne Yesu bul, “Wii-la η si bula ŋaa wutitii ne. Ba paala lulmi di mi ku ŋaa kuoru ne. Mi

ku tuu dunia di mi dage niaa, di ba jin wutitii ne. Nii-la kala si cho duu jin wutitii yie jegile nii mi teen ne.” <sup>38</sup> Nii ne Paalit piesu, “Wutitii ne bee?”

*Ba bula ari ba jan kpu Yesu*

*Mat. 27.15-31; Maak 15.6-20; Luuk 23.13-25*

Nii ne Paalit miira lii di-jalin Juu timma-la teen a bula piba a bul, “Mi bi wii-la na baala deen si cheye. <sup>39</sup> Ama jina-na kala, di diisin kielin gbiele-la ne yie-na kala, mi yie vene liise nialin ba si kaa to dia dono ne pima. U nii nage ari ma kisin ne. Ma saa che di mi liise Juu tinjaa kuoru-la ne ta pima?” <sup>40</sup> Nii ne ba kpia gon a bul, “Ai, nia deen dee! Liise Barabas ta. (Barabas fa naa gaaru ne.)”

## 19

<sup>1</sup> Nii ne Paalit lejan ba ken Yesu a viiru. <sup>2</sup> Ba si viiru dere, laali-yuoroo ken sosun sua nyun-chuulo a nage kuoro nyun-chuulo a jono chuu, a jon geri-fian laalu <sup>3</sup> an chuolu a bul, “Juu tinjaa kuoro, laa chuolun!” an pe fallu. <sup>4</sup> Nii ne Paalit bira miira lii nialin teen a bula piba a bul, “Ma bee na, mi kenu kaa kuu lii ma teen ne di ma jin ari mi-na bi wii-kala na u si cheye a mage di ba kpuu.” <sup>5</sup> Nii ne Yesu ku lii a ha chu sosun nyun-chuulo-la ari geri-fian-la ba si jono laalu. Nii ne Paalit bula piba, “Ma na baal-la.” <sup>6</sup> Nialin si kpu pusun pipi Wia kuhiasin ari ba tintinni-biisin si nau, ba kpia gon a bul, “Lejan di ba kpaasu daa-gese nyun.” Nii ne Paalit bula piba, “Ma titia kenu kpaase daa-gese nyun.

Mi-na bi wii-la u si cheye na.” <sup>7</sup> Ŋii ne Juu timma-la bira bul, “U keŋ u titia yire Wia Bii ne. La kisiŋ le nii-la kala si ŋaa ŋii, u maga di ba kpuu ne.” <sup>8</sup> Fawulluŋ fa paala keŋ Paalit ne. U si nia ari ba bul ŋii, fawulluŋ wasa kenu. <sup>9</sup> Ŋii ne u bira miira juu dia-la a piесе Yesu a bul, “Nii ne ŋ lii?” Yesu bi wii-kala bula. <sup>10</sup> Ŋii ne Paalit piесu, “Ŋ tɔre ŋ niŋ nee? Ŋ bi jiŋ mi keŋ doluŋ di mi joŋuŋ taa, a bira keŋ doluŋ di mi leŋ di ba kpaasiŋ daa-geсеe nyuŋ?” <sup>11</sup> Ŋii ne Yesu bula pu, “Ŋ fa bi dol kala kene mi le. Wia ne piŋ dol-la. Ama nii-la si joŋmi he ŋ nisiŋ le ne faasa keŋ haacheba a kiŋ.”

<sup>12</sup> Paalit si nii ŋii, u fa cho duu joŋ Yesu ta. Ŋii ne Juu tiŋŋaa faasa kpia goŋ a bul, “Di ŋ ne joŋu ta, ŋ bira bi la tiŋteenŋ kuori-baliŋ ba sii yire Siiza naŋdoŋ ŋaa. Nii-la kala si keŋ u titia yiyire kuoru, u tiina ŋaa kuori-baliŋ diŋdoŋ ne.” <sup>13</sup> Paalit si nii ŋii, u keŋ Yesu kaa ku lii, aŋ mu hoŋ u sariya diiri kpaasa nyuŋ. Ba keŋ lee-la kaa yire Gabata ne Hiiburu yiikoro le. U bubuŋ ne: Lee-la tabiaa ŋaa mula mula ne. <sup>14</sup> Di wia jil nyu-gbaŋa. Tapulii-la ne Juu tiŋŋaa ŋaa siri di u taŋ ne pula di ba gbieli diisiŋ kielŋ gbiele-la. Ŋii ne Paalit bula piba a bul, “Má na ma kuoro.” <sup>15</sup> Ŋii ne ba faasa kpia goŋ a bul, “Leŋ di ba kenu kaa mu kpaasu daa-geсеe nyuŋ.” Ŋii ne Paalit piесеba a bul, “Maa che di mi kpaase ma kuoro daa-geсеe nyuŋ nee?” Ŋii ne nialiŋ si kpu pusuŋ pipi Wia kuhiasiŋ bul, “La bi kuoru kala kene a pe Siiza le.” <sup>16</sup> Ŋii ne u joŋ Yesu piba di ba kaa mu kpaase daa-geсеe nyuŋ.

*Ba kpaase Yesu daa-geɛɛ nyuŋ*

*Mat. 27.32-44; Maak 15.21-32; Luuk 23.26-43*

<sup>17</sup> Ŋii nɛ ba kɛŋ Yesu lii. U lii a baase u titia daa-geɛɛ a mu lee-la ba sɪi chɛ di ba kpaasu. Lee-la yiriŋ nɛ nyu-kunʒkogulo. Hiiburu yiikoro lɛ baa yirɛ lee-la Goliɔta nɛ. <sup>18</sup> Lee-la nɛ ba kpaasu daa-geɛɛ nyuŋ. Ba fa kpaase niaa balia ma nɛ daa-geɛɛ nyuŋ a pɛ Yesu lɛ. Dɔŋɔ hɛ u na-diiŋ, dɔŋɔ ma hɛ u na-gua. Ka Yesu hɛ tutuɔbaaniŋ. <sup>19</sup> Ŋii nɛ Paalit ŋmuŋsa mɛrɛ daa-geɛɛ-la lɛ a bul, “Ju u tiŋŋaa kuoro Yesu a lii Nazaret.” <sup>20</sup> Lee-la kpage Jerusalem nɛ. Ŋii nɛ Ju u tiŋŋaa yuga a karimɛ wii-la Paalit si ŋmuŋsa mɛrɛ daa-geɛɛ-la lɛ. U ŋmuŋsɛ wii-la ari yiikorusuŋ batori nɛ. U kɛŋ Hiiburu tiŋŋaa yiikoro ŋmuŋsɛ, a kɛŋ Latiiŋ yiikoro ma ŋmuŋsɛ, a kɛŋ Giriik tiŋŋaa yiikoro ma ŋmuŋsɛ. <sup>21</sup> Ŋii nɛ Ju u tiŋŋaa nialiŋ si kpu pusuŋ pipi Wia kuhiasiŋ bula pi Paalit ari u sɪi ŋmuŋsa bul di Ju u tiŋŋaa kuoro nɛ, ama duu bul di baala deɛŋ nɛ si u nɛ ŋaa Ju u tiŋŋaa kuoro. <sup>22</sup> Ŋii nɛ Paalit bul, “Wii-la mi si folo ŋmuŋsɛ ŋii, mi bira bi kaa birimɛ.”

<sup>23</sup> Laali-yuoro-la si kpaase Yesu daa-geɛɛ-la nyuŋ dɛrɛ, ba paa u genniŋ a kaa kpaalɛ lɛrɛ banɛsɛ. Laali-yuoru kala kɛŋ dɔŋɔ. Geri-bal kubala ma nɛ fa hɛ dimɛ. Ba yie yuo ŋii nɛ, ba bi geripɛɛ kala yɛrɛ mɛrɛu lɛ. <sup>24</sup> Ŋii nɛ laali-yuoro-la bula pi dɔŋɔ a bul, “Ma sɪi lɛŋɛ di la kɛŋ geri-la kiɛsɛ, mǎ lɛŋ di la tɔŋsɛ, a na nii-la si jaŋ dii duu laa geri-la.” Wiinŋ deɛŋ ba ŋaa di wialiŋ ba fa si ŋmuŋsa Wia teniŋ tuɔŋ, duu ŋaa

wutitii nɛ. Ba fa si,  
 “Ba paa mi genniŋ kpaa doŋo nɛ  
 aŋ tiŋ mi geriŋ doŋo wiaa a toŋse.”

<sup>25</sup> Nialiŋ fa si china kpaga Yesu daa-gese-la nɛ ŋla: Yesu naaŋ, ari u naaŋ dihaala, ari Kilopas haala Mɛeri, ari Mɛeri Magidaliŋ.

<sup>26</sup> Yesu si na u naaŋ ari u haritooru-la u fa si cho, di ba china, ŋii nɛ u bul u naaŋ lɛ a bul, “Haal, bee na ŋ bie nɛ ŋla,” <sup>27</sup> aŋ bira bula pi u haritooru-la ma a bul, “Na ŋ ma naaŋ nɛ ŋla.” A chiŋ bua-la lɛ u haritooru-la keŋ Yesu naaŋ-la a kaa mu u dia ba hɛ dime.

*Yesu suba*

*Mat. 27.45-56; Maak 15.33-41; Luuk 23.44-49*

<sup>28</sup> Yesu jima ari leele wii-wii-kala dere nɛ, ka duu wuo leŋ di wialiŋ ba si ŋmuŋsa Wia teniŋ tuoŋ, di ba ŋaa wutitii, ŋii nɛ u si lii-nyuasun nɛ kɛnu. <sup>29</sup> Di siniŋ si nyala su gbaŋa chiŋ dime. Ba joŋ suosuo a siŋ siŋ-la lɛ, a keŋ sakeliŋ liise suosuo-la, a kaa jila hɛ Yesu niŋ lɛ. <sup>30</sup> ŋii nɛ Yesu nyua siŋ-la. U si nyua siŋ-la dere, ŋii nɛ u bul, “Wii-kala dere nɛ”, aŋ keŋ u nyuŋ chugili a suu.

<sup>31</sup> Tapulii-la nɛ Juu tinŋaa ŋaa siri a gberɛ ba diisiŋ kieliiŋ gbiele-la. Tapulii-la ma ŋaa che-wiesii-la cheeŋ nɛ. ŋii nɛ tii ba bi che di nialiŋ sage daa-gese-la nyuŋ chee-la. ŋii nɛ ba mu sul Paalit duu leŋ di laali-yuoroo mu bori ba naasiŋ aŋ soriba daa-gese-la nyuŋ. U sei. <sup>32</sup> ŋii nɛ laali-yuoro-la mu keŋ baala-la ba si kpua a pɛ Yesu lɛ naasiŋ kaa bori. <sup>33</sup> Ba kɔ Yesu leriŋ duu suba. ŋii wiaa ba bi u naasiŋ boro. <sup>34</sup> Ama laali-yuoro-la doŋo joŋ u timiŋ a toɔ Yesu seme



le u luri. Ŋii ne chaliŋ ari liiŋ lii. <sup>35</sup> Mi-na Joŋŋ ne na wiaa deenba ari mi siinŋ aa bulba. Wutitii ne mi bul. Mi bul wiaa deenba pipima di ma ma laa dii. <sup>36</sup> Wiaa deenba kala ŋaa di wialiŋ ba si ŋmuŋsa Wia teniŋ tuŋŋ ŋaa wutitii ne. Ba ŋmuŋsa a bul,

“Ba bi jaŋ bori u hangbel-bala maa.”

<sup>37</sup> Wia teniŋ seme doŋŋ ba bira bula ari ba jaŋ beŋ nii-la ba si tobo.

### *Ba hugi Yesu*

*Mat. 27.57-61; Maak 15.42-47; Luuk 23.50-56*

<sup>38</sup> Yesu si suba, baal kubala ma fa he dime. Baa yire Josef. U fa lii Arimatiya tiŋteenŋ ne. U ma fa ŋaa Yesu haritooroo doŋŋ ne. Ama u-na faa luŋru ne a tiŋ Juu tiŋŋaa wiaa. Uu fába ne. Ŋii ne u mu sul Paalit duu leŋ duu sori Yesu ku-suunŋ. Paalit pu wonbiinŋ. Ŋii ne u mu sori. <sup>39</sup> Nikodiimas, nii-la fa si laa sipaanŋ mu Yesu teenŋ titaniŋ, u ma to Josef hariŋ mu, a pe keŋ tii-keli-zŋŋ kubala baa yire mee ari doŋŋ maa baa yire alois. Ba yuŋuŋ mage nuhuobiine yuŋuŋ ne. <sup>40</sup> Ba balia ne mu joŋ Yesu ku-suunŋ, a joŋ geripe-pula, a joŋ kialinŋ mise geripe-pulala, a kaa be Yesu. Juu tiŋŋaa yie ŋaa ŋii ne a huhugi ba suunŋ. <sup>41</sup> Lee kubala ne kpage lee-la ba fa si kpaase Yesu daa-gese-la nyuŋ. Ba choŋse tiisinŋ. Tiisi-la tuŋŋ buŋ kubala ne fa he dime ba lose. Ama ba ha bi nuu-kala hugo dime. <sup>42</sup> U si ka tapul-bala ka di Juu tiŋŋaa gbieli-balinŋ yi, ka bua-la ma kpage lee-la, ŋii ne ba joŋ Yesu hugi dime.

## 20

*Yesu lii u bua le*

*Mat. 28.1-8; Maak 16.1-8; Luuk 24.1-12*

<sup>1</sup> Lahadi chεεŋ siipuuraa di leriŋ kala ha bire, Mεeri Magidaliŋ mu bua-la leriŋ a na tabii-la ba si joŋo to bua-la niŋ duu suro. <sup>2</sup> Ŋii nε u fá mu Saamŋ Piita ari Yesu haritooro-la dŋŋo teen, nii-la Yesu fa si cho woruŋ, a bula piba a bul, “Ba liise la Tiina Yesu bua-la tuŋ nε. La bi jiŋ lee-la kala ba si joŋu bil.” <sup>3</sup> Ŋii nε Piita ari Yesu haritooro-la dŋŋo-la sii mu bua-la leriŋ. <sup>4</sup> Ba kala balia fá. Ŋii nε dŋŋo-la tiina kieli Piita, a laa sipaŋ fá mu bua-la leriŋ. <sup>5</sup> U si yi bua-la leriŋ, u bi bua-la tuŋ jua. U tuu tiŋ nε a nyilimi a na genni-la ba fa si joŋo bε Yesu, di ba pina, ka u buu na. <sup>6</sup> Ka Piita to hariŋ ko a ku juu bua-la tuŋ, a na genni-la ba fa si joŋo bε Yesu, di ba pina. <sup>7</sup> Ka geri-la ba fa si joŋo vŋo Yesu nyuŋ ma, duu chuolo piŋ u duŋduŋa. <sup>8</sup> Ŋii nε nii-la si laa sipaŋ mu bua-la leriŋ ma juu bua-la tuŋ a na wii-la si ŋaa, a laa dii ari Yesu sii suuŋ le nε. <sup>9</sup> Ama ba bi wii-la ba fa si ŋmuŋsa Wia teniŋ tuŋ bubuŋ jiŋ ari u maga di Yesu sii suuŋ le nε. <sup>10</sup> Ŋii nε Yesu haritooro-la miira mu ba diisiŋ.

*Yesu keŋ u titia ku dage Mεeri*

*Mat. 28.9-10; Maak 16.9-11*

<sup>11</sup> Bua-la le di Mεeri miira mu bua-la teen. Ŋii nε u chiŋ dime aa yel. Uu yel ŋii nε aŋ pe nyinyilimi bua-la tuŋ. <sup>12</sup> U nyilimi bua-la tuŋ ŋii nε a na Wia tiŋdaaraa balia bua-la tuŋ a laale geri-pulluŋ. Dŋŋo hoŋ Yesu nyuŋ fa si

mu lee-la. Dɔŋɔ ma hɔŋ u naasiŋ fa si mu lee-la. <sup>13</sup> Ńii nɛ ba piɛsu a bul, “Haal, bɛɛ nɛ tii ŋ yiyel?” Ńii nɛ u bul, “Ba joŋ mi Tiina Yesu kaa lɛl nɛ. Mi bi jiŋ ba si joŋu kaa mu bil lee-la.” <sup>14</sup> U si bul ŋii dɛrɛ aŋ ŋaa duu birimɛ, duu na baal duu chinɛ dimɛ. Yesu nɛ fa ŋii. Ama Mɛɛri fa bi jiŋ ari Yesu nɛ. <sup>15</sup> Ńii nɛ Yesu ma piɛsɛ Mɛɛri, “Bɛɛ nɛ tii ŋ yiyel? Kubɛɛ nɛ ŋ chichɛ?” Mɛɛri fa biina baal-la sɪi beŋ tiisi-la nɛ. Ńii nɛ u piɛsu, “Kuhiaŋ, di ŋ nɛ joŋo, dagemi lee-la ŋ si kaa mu bil, di mi mu joŋu kaa viiri.” <sup>16</sup> Ńii nɛ Yesu yiru a bul, “Mɛɛri.” Ńii nɛ u miira daasɛ aŋ bul ari Hiiburu yiikoro, “Rabboni, ŋ nɛɛ?” (Rabboni bubuɔŋ nɛ kuhiaŋ.) <sup>17</sup> Ńii nɛ Yesu bula pu a bul, “Sɪmi kɛŋ. Mi ha bi mi Nyimma teenɛ jila. Ama mu bula pi mi naaŋbiirinɛ ari mi jaŋ jil mi Nyimma teenɛ. U ŋaa ma ma Nyimma nɛ a ŋaa mi Wia, a ŋaa ma ma Wia.” <sup>18</sup> Ńii nɛ Mɛɛri Magidalinɛ mu Yesu haritooro-la teenɛ, a bula piba a bul duu na u Tiina Yesu nɛ, a bul wialinɛ ma kala u si bula pu.

*Yesu kɛŋ u titia ku dage u haritooroo*

*Mat. 28.16-20; Maak 16.14-18; Luuk 24.36-49*

<sup>19</sup> Lahadi cheɛŋ titaninɛ u haritooroo hilimi dia tuɔŋ aŋ kɛŋ boinɛ yagɛ. Baa fá Juu timma-la nɛ. Ńii nɛ tii ba kɛŋ borusunɛ tɔ a yagɛ. Ńii nɛ Yesu ku chinɛ ba tutuɔbaaninɛ aŋ bul, “Ma jaŋ hɔŋ ari yarifiɛlaa.” <sup>20</sup> U si bul ŋii dɛrɛ, u kɛŋ u nisaa ari u semɛ dageba. U haritooroo kala tuɔŋ tɔrɛ ba si na ba Tiina Yesu. <sup>21</sup> Ńii nɛ Yesu bira bula piba, “Ma jaŋ hɔŋ ari yarifiɛlaa. Mi Nyimma si tinɛmi ŋii, ŋii titia nɛ mi maa tinɛma

di ma tiŋ mi tiŋtiŋŋaa.” <sup>22</sup> U si bul ŋii dɛrɛ, u wiese hɛba lɛ aŋ bul, “Má laa Wia Diŋ-zɔŋ-la duu hɛma lɛ. <sup>23</sup> Di ma nɛ joŋ nuu haacheba a cheu, u bira bi haache kɛnɛ. Di ma nɛ bira bi nuu haacheba joŋo cheu, u ha kɛŋ u haacheba nɛ.”

### *Yesu kɛŋ u titia ku dage Tɔmas*

<sup>24</sup> Bua-la lɛ Yesu si kɛŋ u titia ku dage u haritooro-la, u haritooro-la dɔŋɔ fa tuo. U yiriŋ nɛ Tɔmas. Ba fa ŋaa daalieri nɛ. Ŋii nɛ tii baa yiru daalieriŋ maa. <sup>25</sup> Ŋii nɛ u haritooro-la dɔŋsuŋ bula pu a bul di ba na Yesu. Ŋii nɛ Tɔmas bula piba a bul, see duu na hɛmɛ-la buasuŋ u nisaa lɛ, a joŋ u neniŋ hɛ bua-la lɛ, a joŋ u neniŋ hɛ u sɛmɛ bua-la ma lɛ, u bi jaŋ laa dii ari wialiŋ ŋaa wutitii.

<sup>26</sup> Tapulaa chori pɛgɛ Yesu haritooro-la bira juu dia a kɛŋ boiŋ yagɛ. Bua-la-na lɛ di Tɔmas hɛ ba tuɔŋ. Di Yesu ku juu chiŋ ba tutuɔbaaniŋ aŋ bul, “Ma jaŋ hɔŋ ari yarifiɛlaa.” <sup>27</sup> Ŋii nɛ aŋ ka u bula pi Tɔmas, “Joŋ ŋ neniŋ a hɛ mi nisiŋ bua-la lɛ aŋ beŋ mi nisaa, aŋ kɛŋ ŋ nisiŋ hɛ mi sɛmɛ bua-la ma lɛ a na, aŋ laa mi wiaa dii, aŋ sí kaa lɛrɛ.” <sup>28</sup> Ŋii nɛ Tɔmas yiru a bul, “Mi Tiina, ŋ nɛ mi Wia!” <sup>29</sup> Ŋii nɛ Yesu piɛsu, “Ŋ si nami nɛ tii ŋ laa mi wiaa dii koo? Nialiŋ si bimi na aŋ laa mi wiaa dii, ba tuɔŋ jaŋ tɔrɛ.”

<sup>30</sup> Yesu ŋaa wu-magilaa yugɛ u haritooroo na a pɛ wialiŋ mi si ŋmuŋsa teniŋ deɛŋ tuɔŋ. Aŋ ka mi bi ba-na ŋmuŋsa hɛ teniŋ deɛŋ tuɔŋ. <sup>31</sup> Ama mi ŋmuŋsɛ wiaa deɛŋba di ma wuo laa dii ari Yesu nɛ ŋaa Kirisito, nii-la Wia si liisa aŋ

pe ŋaa Wia Bie maa. Di ma ne laa wiaa deenba dii, ma jaŋ keŋ miisiŋ u doluŋ le.

## 21

### *Yesu keŋ u titia dage u haritooroo balipe*

<sup>1</sup> Yesu bira keŋ u titia dage u haritooroo doŋsuŋ muga kubala niŋ baa yire Tabiiras. U haritooro-la ne ŋla: <sup>2</sup> Saamoŋ Piita ari Tomas, nii-la ba fa si kaa yire daalieriŋ maa, ari Natania fa si lii taŋ kubala ne baa yire Keena a he Galilii tiŋteen. Zebidii biiriŋ balia ma ne fa he dime, ari Yesu haritooroo balia maa. <sup>3</sup> Ŋla ne u to a keŋ u titia ku dageba: Ba fa chiŋ muga-la niŋ ne. Ŋii ne Saamoŋ Piita bula pi haritooro-la ku-kaanaa ari uu mu duu keŋe cheŋfilee ne. Ŋii ne ba kala bul di ba jaŋ to mu. Ŋii ne ba mu joŋ liiŋ daboro a juu liiŋ tuoŋ, ama titaŋ-la kala ba bi cheŋfilii kala keŋe.

<sup>4</sup> Taŋ si pulaa ko di Yesu chiŋ lii-la niŋ, ama u haritooro-la bi jiŋ ari u ne. <sup>5</sup> Ŋii ne Yesu piŋeŋba, “Mi naŋdoŋsuŋ, ma keŋe cheŋfilee neŋe?” Ŋii ne ba bul di ba bi kubala ma keŋe. <sup>6</sup> Ŋii ne u bula piba di ba joŋ ba joŋba, a yuo he liiŋ tuoŋ liiŋ daboro-la na-diiŋ seme, di ba ne ŋaa ŋii, ba jaŋ keŋe cheŋfilee. Ŋii ne ba joŋ joŋ-la yuo keŋe cheŋfilee su. U si suo ŋii, ba bi wuo lilerε. <sup>7</sup> Ŋii ne haritooro-la Yesu si cho woruŋ bula pi Piita a bul, “La Tiina Yesu ne!” Bua-la le di Piita fa wuri u geriŋ ne. U si nii ŋii, u joŋ u geriŋ a laale, aŋ lii liiŋ daboro-la le, a fula juu liiŋ duu duoro mu Yesu teeŋ. <sup>8</sup> Lee-la ari lii-la niŋ fa bi bol. U fa yi naakieliŋ zolo ne.

Ka Yesu haritooro-la ku-kaanaa lere joŋ-la ari cheŋfilie-la ku lii lii-la niŋ.

<sup>9</sup> Ba si ku lii lii-la niŋ, ba na holoŋ nyiniŋ di cheŋfilee chebe, ka ba na boroboro maa. <sup>10</sup> Ŋii ne Yesu bula piba a bul, “Má liise cheŋfilie-la doŋsuŋ ma si kese lele a kaa ko.” <sup>11</sup> Ŋii ne Saamŋ Piita mu lere joŋ-la ku lii lii-la niŋ, di cheŋfili-balaa suo. Cheŋfilie-la fa ŋaa zolo ari mahiŋ balia ari fii ari batori ne. Cheŋfilie-la yuga ŋii ma ne, aŋ ka joŋ-la bi kiesa. <sup>12</sup> Ŋii ne Yesu bula piba a bul, “Má ku lii bille ma niŋ.” U si bul ŋii, u haritooroo kuŋ-kala bi piese a bul di kubee nee? Ba kala jima ari ba Tiina Yesu ne. <sup>13</sup> Ŋii ne Yesu joŋ boroboro-la a piba, a joŋ cheŋfilie-la ma a piba di ba dii. <sup>14</sup> U si sii suuŋ le u butori ne ŋii u si keŋ u titia kaa ku dage u haritooroo.

### *Yesu bul wiaa a pi Piita*

<sup>15</sup> Ba si dii boroboro-la ari cheŋfilie-la dere, ŋii ne Yesu piese Saamŋ Piita a bul, “JƆƆŋ bie Saamŋ, ŋ chomi a kii niaa deŋba nee?” Ŋii ne Piita si, “Oo mi Tiina, ŋ titia jima ari mi choŋ ne.” Ŋii ne Yesu bula pu, “Beŋ mi niaa nyuŋ, ari pie-daara si yie beŋ u piesee nyuŋ ŋii.” <sup>16</sup> Ŋii ne Yesu bira piesu, “JƆƆŋ bie Saamŋ, ŋ chomi nee?” Ŋii ne u bira bul, “Oo mi Tiina, ŋ jima ari mi choŋ ne.” Ŋii ne Yesu bira bula pu, “Beŋ mi niaa nyuŋ, ari pie-daara si yie beŋ u piesee nyuŋ ŋii.” <sup>17</sup> Ŋii ne Yesu bira piesu torimuŋ a bul, “JƆƆŋ bie Saamŋ, ŋ chomi nee?” Yesu si piesu torimuŋ ŋii, u tuŋ chei. Ŋii ne Piita bula pu, “Mi Tiina, ŋ jiŋ wii-kala ne, ŋ jima ari mi choŋ ne.” Ŋii ne Yesu bira bula pu, “Beŋ

mi niaa nyuŋ, ari pie-daara si yie beŋ u piesee nyuŋ ŋii. <sup>18</sup> Wutitii ne mi bulaa piŋ, ŋ fa si ŋaa haŋbie, ŋ yie keŋ ŋ damere kaa voo ŋ tiŋa ne aa mu lee-la kala ŋ si cho. Ama di ŋ ne ku hiese, ŋ jaŋ keŋ ŋ nisaa jee, aŋ ka di nuu doŋ ne joŋ damere-la a vobuŋ aŋ keŋiŋ mu lee-la ŋ si bi cho di ŋ mua.” <sup>19</sup> Yesu si bul wiŋ deeŋ, u dage Piita si jaŋ suu ŋii a laa yiriŋ pi Wia. ŋii hariŋ le ne Yesu bula pu duu to u hariŋ.

<sup>20</sup> ŋii ne Piita daase hariŋ a na Yesu haritooru-la Yesu fa si cho woruŋ, nii-la fa si suusa mu kpage Yesu bua-la le ba fa sii dii diisiŋ kielŋ gbiele-la kudiilee, a fa piesu, “Mi Tiina, kubee ne che duu joŋuŋ yalle?” <sup>21</sup> Piita si nau, ŋii ne u piese Yesu a bul, “Mi Tiina, ka baala deeŋ, bee ne jaŋ ŋaau le?” <sup>22</sup> ŋii ne Yesu bula pu, “Di mi nii che duu he dime ka di mi-na miira ko dunia, ŋ sipaa tuo dime. To mi hariŋ.” <sup>23</sup> ŋii ne ba ŋmoo doworo pi nialiŋ kala si laa Yesu wiaa dii ari Yesu haritooro deeŋ-na bi jaŋ suu. Ama Yesu bi ŋii bula. U si duu nii che di haritooru-la he dime ka di u-na miira ko dunia, Piita sipaa tuo.

<sup>24</sup> Mi-na Jooŋ ne na wiaa deeŋba aa ŋmuŋse teniŋ deeŋ. La saa jima ari wialiŋ kala mi si bula ŋaa wutitii ne. <sup>25</sup> Yesu ŋaa wiaa doŋsuŋ yuge a pe wialiŋ mi si ŋmuŋsa he teniŋ deeŋ le. Wialiŋ-na mi bi ŋmuŋsa. Di mi ne fa ŋmuŋse wialiŋ kuŋ-kuŋ-kala, teŋ-la fa jaŋ yuga kii dunia kala.

**Yesu Kiristito Wu-Zɔŋɔɔ (Ghana)  
Sisaala-Tumulung NT Ghana**

copyright © 2014 Wycliffe Bible Translators, Inc.

Language: (Sisaala, Tumulung)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 22 Sep 2022 from source  
files dated 13 Jun 2022  
b3eb8618-120f-5a96-8c1c-1dbc16914330